

UGÁNU BUÍTI LE LABŪRŪJABEI MATÉO LUÁGU JESÚSU

Linébaanfaangu Jesúsu
(Lc. 3.23-38)

1 ¹Niján jíri linébaanfaangu Jesucrístu le jádaangiñebei meja
ladúgawagun Davíd lúma Abrahám.

²Abrahám lúguchibei Isáac, Isáac lúguchi Jacób, Jacób lúguchi Judá
jáu lamúleni, ³Judá lúguchi Fáres lúma Zára, Tamar tugúya jáguchu,
Fáres lúguchi Esróm, Esróm lúguchi Arám, ⁴Arám lúguchi Aminadáb,
Aminadáb lúguchi Naasón, Naasón lúguchi Salmón, ⁵Salmón lúguchi
Booz, Raháb lúguchu, Booz lúguchi Óbed, Rut lúguchu, Óbed lúguchi
Isaí, ⁶Isaí lúguchi urúei Davíd, urúei Davíd túma tó meja lúmari Urías,
jagía lagúbürigubaña Salomón.

⁷Salomón lúguchibei Roboám, Roboám lúguchi Abías, Abías lúguchi
Ása, ⁸Ása lúguchi Josafát, Josafát lúguchi Jorám, Jorám lúguchi
Uzías, ⁹Uzías lúguchi Jótam, Jótam lúguchi Ácaz, Ácaz lúguchi
Ezequías, ¹⁰Ezequías lúguchi Manasés, Manasés lúguchi Amón, Amón
lúguchi Josías, ¹¹Josías lúguchi Jeconías jáu lamúleni lídan dan le
janáanwagunbei Israelítagu adáürawagua Babilónia.

¹²Lárigiñe le, Jeconías lúguchibei Salatiél, Salatiél lúguchi Zorobabél,
¹³Zorobabél lúguchi Abiúd, Abiúd lúguchi Eliaquím, Eliaquím lúguchi
Azór, ¹⁴Azór lúguchi Sadóc, Sadóc lúguchi Aquím, Aquím lúguchi Eliúd,
¹⁵Eliúd lúguchi Eleázar, Eleázar lúguchi Matán, Matán lúguchi Jacób,
¹⁶Jacób lúguchi José le túmari María, tugúyati lúguchuboun Jesúsu le
gíribei Crístu.

¹⁷Catoúrusuñanu lubeíti linébaanfaangu Jesúsu lúmagiñe Abrahám lúmoun
Davíd, catoúrusu lúmagiñe Davíd lúmoun janáanwagúniwa Israelítagu
Babilónioun, catoúrusu lúmagiñe dan ligía lúmoun lagúriajoún Crístu.

Lagúriajóun Cristu
(Lc. 2.1-7)

¹⁸Ítara líña ligáburi lagúriajóun Jesucristu. María to lúguchu, gadáraduñoun lúma José lun tamárieidun lúma, lubáragiñeti jaganoún jámagua, lubáragiñe lasúbudirunun quei wúri, ába tadáriragun túngua láu dagáñu tíña lan láu lubáfu Sífiri Sándu. ¹⁹Quei ában lubei wügúri buídu tigáburi José le tadári, májati lasúbudirúniwa le asúseredubei tun María, busénrügüti lígirunun, míchugunga tidúnrun. ²⁰Dan le niján lubei arítagua luágu cátei le, ligía larúfudagun ában láni Wabúreme Búngiu ánjeli lúngua lun lídan luwénedi, ába laríñagun lun.

—José, ladúgawagun Davíd, manúfudebá lun berésibirunun María queísi búmari, ladúga irájü le lúnbei tagáraüduni, lúmagiñe Sífiri Sándu liábin. ²¹Tagáraüduba ában irájü, ábame bíchuguni líri Jesúsu. Ítara lúba líri ladúga lasálbarubaña lan lumútuniña lídaangiñe jafígoun.

²²Lasúseredunbei sun cátei le lun lagúnfulirun dimúrei le laríñagubei Wabúreme Búngiu liyúmulugugiñe proféta.

²³Tadágeinaduba ában irájü, ábame tagáraüdun ában irájü, Emanuél, ligíaba líri, líla íri ligía, “Búngiu wáma”.

²⁴Dan le lagágudunbei José lídaangiñe uwénedi ligía, ába ladügüni le lubeíbei ánjeli ligía lun, ába lerésibirunun María queísi lúmari, ²⁵masúbudirúngaloún queísi wúri darí tagúriajani furúmiñeti tiraú, ába líchuguni líri Jesúsu.

Jachúlürün chu táu aríjei Jesúsu

2 ¹Lídan fulásu le gíribei Belén, lumúanrugu Judéa, ñi lagúriajoúa Jesúsu dán meja le Heródes lan urúeíbei lídan jageíra juríu. Ábati jachúlürün fiú wügúriña chu táu ubúrugin Jerusalén lueígiñe oúbaü le ñígiñe lubeí labouícha wéyu. ²Ába jálügüdajan.

—¿Jageísan jarúeite juríu le agúriajóubei? Aríja wamáaru luwáruguman le ñígiñe lubeí láfuara wéyu, wayábiñati lun wájuduragun lun.

³Dan le lagáambuni urúei Heródes cátei le, ába medéraguagüdüñaali lan, jáu sun Jerusalénna. ⁴Ábati lagúarun joun sun jábutigu fádírigu lídan jafíñen juríu, jáma ja arúfudajabalin lilúrudun Moisés joun gürígia, ába lálügüdaguniña jalíabei lan libíti fulásu lagúriajoúa Cristu. ⁵Ába jaríñagun lun.

—Belén, le lumúanrugubei Judéa, ladúga ítara líña labúrüdüni proféta.

⁶Amúrü Belén, lumúanruguna Judéa, amúrü ában lídaangiñe ubúrugu weírigutimaati lídan múa le, láu sun biñúraü, ladúga láfuriduba ában ábuti bídaangiñe le lúnbei loúnigiruniña numútuniña ja Israelítagu.

⁷Ábati lagúarun Heródes joun chu táu arámudaguarügü, ába lálügüdüniña luágutima dan le tarúfudaguagüle warúguma túngua joun.
⁸Ábati loúnajaniña Belén, laríñaga joun.

—Jefba, ábame jáluajani irájü le buídu, dánme le darí jumaali, jawísaraname, ñúdüñ námuga gíñe ájuduragua lun.

⁹Lárigiñe jagáambuni chu táu lerérun urúei, ába jóúdin. Warúguma bugáti to jaríjuboun le ñígiñe lubei láfuara wéyu, ába tídin jabá jabá, darí taráramun loúgiñe fulásu le ñí lubei irájü le. ¹⁰Dan le jaríjinun chu táu ja warúguma, ába jagúndaaragun sarágu. ¹¹Dánti le jebélurun tídoun múna, ába jaríjini irájü le túma lúguchu to María. Ábati jájuduragun, ába jabúluchagun lun. Ába jánjunrenchunun jagáfun, ába jedéweejan gólu lúma cupáli jémeti lun, lúma ában luwúyeri árani gifiti. ¹²Lárigiñe, ába jawísarúniwa lídan jawénedi lun magíribudun jamá ñígiñe lubei Heródes, ába jagíribudun jageíroun lídaangiñe ámu úma.

Anúrajani lun Ejíptoun

¹³Lárigiñe jóúdin chu táu jagía, ába larúfudagun ába láni Búngiu ánjeli lúngua lun José lídan luwénedi, ába laríñagun lun.

—Sarába, barúbei irájü le táu sun lúguchu, anúrabá Ejíptoun, ábame beréderun ñi daríme nawísarunibu, ladúga láluajaali Heródes irájü le lun láfaruni jilágubei.

¹⁴Ábati lásaarun José, ába lanúgüni irájü táu sun lúguchu árie bu ligía, ába lídin jáu Ejíptoun. ¹⁵Ába jeréderun ñi darí loúnwen Heródes. Lasúseredunbei sun le lun lagúnfulirun le laríñagubei Búngiu liyúmulugugiñe proféta. “Sagá numuti Niraú Ejíptogiñe.”

Láfaraguágüdüniña Heródes irájüñü

¹⁶Dan le ladáriragun Heródes lúngua luágu yéegua jamá lan chu táu, ába lagáñidun, ába loúnajan áfaraguaña sun irájüñü ja biáma tíña irúmu jáu lun únabun, ja aganoúbaña Belén lúma sun fulásu geyégua láu, según dan le jaríñagubei chu táu luágu lagúriajouñiwa irájü ligía. ¹⁷Ítara líña lagúnfulirun le labúriüjabei proféta Jeremías.

¹⁸Agaambúati lagúarajan ában umálali Ramá láu oúnwenbun igárigu, umálali ligía tumálali Raqué, to ayájuboun jarígi tirájüñü, mabúseeruntu lun támalijoún ladúga jilágua jamá.

¹⁹Lárigiñe loúnwen Heródes, ába liábin ába láni Búngiu ánjeli lun José lídan luwénedi yágüta Ejípto, ába laríñagun lun.

²⁰—Sarába, barúbei irájü le táu sun lúguchu, giríbu jumá jageíroun Israelítagu ladúga jilágua ja abúseerubaña meja jáfaruni irájü le.

²¹Ába lásaarun José, ába lanúgüni irájü táu sun lúguchu jageíroun Israelítagu. ²²Dan le lasúbudiruni José luágu Arqueláo lan agúmadijabei Judéa lewéñegua Heródes le lúguchi, ába lanúfudedun lídin ñíjin, ába laríñawagúniwa lun lídan uwénedi lun lídin Galiléoun. ²³Lachúlürün ñi, ába lídin agánawa lídan fulásu le gíribei Nazarét, le lumúanrugubei Galiléa.

Lasúsiredunbei sun cátei le lun lagúnfulirun le jaríñagubei profétagu luágu Nazarétna lan Jesús.

Lapúrichijan Juan le abásteragüdjabei lídan fulásu mageírawati
(Mr. 1.1-8, Lc. 3.1-9, 15-17, Jn. 1.19-28)

3 ¹Lídoun dan ligía, ába liábin Juan le abásteragüdjabei apúrichija lídan fulásu mageírawati, Judéa, ²ába laríñagun lídan lapúrichijan. —Sáansi jumeí jouuserun, ladúga yaráfaali larúeijan Búngiu.

³Juan le, ligía le uágubei meja labúrüja proféta Isaías ítara.

Agaambúati lumálali ában gürígia agúaraja lídan fulásu mageírawati ítara.

“Aráanse jumoún janígi lubá liábin Wabúreme,

queísi ladárarúniwa úma surúti.”

⁴Lanáangun Juan, láutu lúra caméyu, liábin lagúruga liránaagua, guéru, chigángaru leígubaña lúma síruudu le áraabuna. ⁵Ábaja jayábin ubúrugugiñe Jerusalén, lúma Judéagiñe, lúma lubádugiñe dúna Jordán agáambeí lapúrichijan, ⁶dántija le jagúfesseruni jafígoun, ába labásteragüdüniña lídan dúna le gíribei Jordán.

⁷Dan le laríjin Juan luágu sarágu jáña lan gürígia lídaangiñetiña jadámurin fariséogu jáma saduséogu nübintiña lun jabásterun, ába laríñagun joun.

—¡Jarásan jéwe jugúya le! ¿Ca awísarubadün lun janúrajan lueí lanárima afáyeiragülei luágu figoú le lúnbei liábin? ⁸Oúsera jumá buídu, arijúa lámuga furáangu luágu sáansigua lan ligáburi jouuserun. ⁹Mapántajan jugúyame, aríñaga jídaangua. “Linébaanfaangu Abrahám wagía”, ladúga naríñajare jun luágu gayára lan ladúgün Búngiu linébaanfaangu Abrahám lídaangiñe dübü le. ¹⁰Madíseeli lagúnfulirun le laríñagubei Búngiu, luágu yaráfaali lan lidáani abeichúni luágu figoú, aráanseeru jaráwa lun lánchujajoún wéwe, áni sun wéwe le mabuídunti lin, chaúnwati, ába lagudún. ¹¹Áu, láu dúna nabásteragüdaün, arúfudei luágu sáansi jumáali lan ligáburi jouuserun, ánjeinti le lúnbei liábin nárigi, labásteragüdübadün láu Sífiri Sándu, áni lafáyeiragüdübadün luágu figoú queísi láu wátu geméti. Gabáfuti nueí darí lun madúna nan ni lun narágachunun ligeídin. ¹²Nújeinjaru lichóbulin lújaburugu, larúmadagüdübei tüirígu, ábame lanúadiruni lídaangiñe sagádi mábeijali. Ábame lareíduni tüirígu, ábame láguduni sagádi le mábeijali lídan wátu geméti le méñeguchadibei.

Labásterun Jesús
(Mr. 1.9-11, Lc. 3.21-22)

¹³Dan le liábin Jesús Galiléagiñe, ába lachúlürün luágun dúna le gíribei Jordán le ñí lubei Juan lun labásteragüdüni. ¹⁴Májati yebéti Juan labásteragüdüni, ába laríñagun lun Jesús.

—Nugúya lúnbei babásteragüdüni, ¿amúrü lubeí nübin nun lun nabásteragüdüni?

¹⁵Ába laríñagun Jesús lun.

—Ítara lúba guetó, ladúga lúnti wadúgüini le lubeíbei Búngiu.

Ába labásteragüdüni Juan Jesúsu, ¹⁶lárigiñe labásterun Jesúsu, ába láfuridun dúnarugugiñe. Sódini ába lánjunrenchagun siélu, ába laríjini Jesúsu Sífiri Sándu larárirun camá ában únjun liábin luágun. ¹⁷Ába lagaambún ába umálali siélugiñe le aríñagubei.

—Niraú le jínsiñebei nun le, le áubei oúnwenbun lan nugúndan.

Loúchaguni Máfia Jesúsu

(Mr. 1.12-13, Lc. 4.1-13)

4 ¹Ába lanúgüni Sífiri Sándu Jesúsu lídoun fulásu mageírawati lun loúchaguni Máfia.

²Lárigiñe leréderun Jesúsu bián-wein wéyu lúma bián-wein áriebe meíginga, ába lálámachun. ³Ábati liábin Máfia lubádun, ába laríñagun lun lun loúchaguni.

—Ánjein liraú bubei Búngiu, salíguagüdabeí dúbü le feínme.

⁴Ába loúnabun Jesúsu.

—Taríñajare Lerérun Búngiu. “Mámarügübei táu fein labágarida gürígia, labágariduba gíñe láu sun dimúrei le laríñagubei Búngiu.”

⁵Ábati lanúgüni Máfia Jesúsu Jerusaléoun, ubúru le sándubei joun juríu, ába laweínragüdüni tábulugun témpulu, ⁶ába laríñagun lun.

—Ánjein liraú bubei Búngiu, chubába yágiñe lun únabun, ladúga taríñajare Lerérun Búngiu.

Laríñaguba Búngiu joun láni ánjeligu lun jóunigirunibu.

Janúgübadibu jájaburugu lun machúgeragun lan bugúdi luágu dúbü.

⁷Ába loúnabuni Jesúsu.

—Aríñagatu gíñe Lerérun Búngiu. “Moúchaguabeí Babúreme Búngiu.”

⁸Ába lanúgüni Máfia Jesúsu luágun ában wúbü íñuti, ába larífuduni sun arúejani le ubouágubei lun, lúma buri luweírigun, ⁹ába laríñagun lun.

—Níchugubei sun le bun ánjabu ájuduragua nun.

¹⁰Ábati laríñagun Jesúsu lun.

—¡Beíba nueí, Máfia! ladúga taríñajare Lerérun Búngiu. “Lúnrügüba Babúreme Búngiu bájuduragua, lúnrügüba gíñe besériwida.”

¹¹Ábati ladísedun Máfia lueí, ába jayábin ánjeligu esériwidei.

Lagúmeseruni Jesúsu luwádigimari, Galiléa

(Mr. 1.14-15, Lc. 4.14-15)

¹²Dan le lagáambunbei Jesúsu luágu njein lan Juan furísunrugu, ába lídin lárigoún Galiléoun. ¹³Merédeti Nazarét, ába lídin agánawa Capernaúm, ában fulásu le lárubei dúna lídan jageíra rása le Zabulón lúma Neftalí. ¹⁴Lasúseredunbei sun le lun lagúnfulirun le labúriüjabeí meja Isaías, lé meja proféta.

¹⁵Lageíra Zabulón lúma Neftalí,

lídan úma lubádu barána, lueígiñe oúbaü le ñígiñe lubeí láfuara wéyu libíti Jordán,

Galiléa le ñí lubei jagánawa ja mámabaña juríu.

¹⁶ Jugúya lé meja lídaanbei lubúriga aríjaadün ában oúnwenbun larúgouna, jugúya lé meja lídaanbei lamúñouna le lánina ouweni, jarúgounagädawaali jáu.

¹⁷ Lúmagiñe dan ligía, ába lagúmeserun Jesúsu apúrichija ñi ítara. —Sáansi jumeí jigáburi, ladúga yaráfaali larúeijan Búngiu.

Lagúarun Jesúsu joun gádürü esénijatiña lun lánime disípulugu
(Mr. 1.16-20, Lc. 5.1-11)

¹⁸ Eíbugeina líña Jesúsu láru láru dúna Galiléa, ligía laríjin bián gamúlenuguátiña, ában jádaangiñe, Simón le méme gíribei Pédro, le ában, Andrés. Esénijani jabágaribei, jáguruñati. ¹⁹ Ábati laríñagun Jesúsu joun.

—Falá jumana, ábame mesénijanjadün lan úduraü, anáajarügaadünme gürígia nun lun nánigume.

²⁰ Furése furése ába jígirunun jasénin, ába jóúdin lúma.

²¹ Lubáruaguoun mémeraü Jesúsu, ábaya laríjin bián gamúlenuguátiña, Jacóbo lúma Juan, lirájüñü Zebedéo. Tídaañanu ában ugúnein lúma jáguchi arámadañun jasénin. Ába lagúarun Jesúsu joun lun lánime disípulugu, ²² lídan óra ligía ába jígirunun ugúnein, ígira jáguchi, ába jóúdin lúma Jesúsu.

Larúfudajan Jesúsu joun sarágu gürígia
(Lc. 6.17-19)

²³ Ábajei leíbuguni Jesúsu sun Galiléa arúfudajeina tídan buri jalígilisin juríu to lídaanboun ságü fulásu. Ábaja lapúrichijani ugánu buíti luágu larúeijan Búngiu, areídaguagüda ligía sun luwúyeri sándi le jawáguti gürígia. ²⁴ Ába lagaambúniwa luágu Jesúsu lídan sun Síria, ába janúgiñiña sun ja asúfurirubaña láu ámuñegueinarügü sándi, igárigu, ja gawágubaña lagúburi espíritu, ja goúwejadibaña, jáma ja derégüdaaña úgubu, ába lareídaguagüdüniña. ²⁵ Sarágu jáña gürígia afálaruti Galiléagiñe, lídaangiñe buri fulásu Decápolisna, Jerusaléngiñe, loúbawagugiñe Judéa, lúma lueígiñe oúbaü le ñígiñe lubeí laboucha wéyu libíti Jordán.

Lapúrichijan Jesúsu wúbüwaügügiñe

5 ¹ Dan le laríjinbaliña Jesúsu sun gürígia jagía, ába laweínrun luágun ában wúbü, ába lañúurun ñi. Ábati jóúndaragun láni disípulugu geyégua láu, ² ába lagúmeserun arúfudaja joun ítara.

³ —Fuleíseiwatün jugúya le asúbudirubalin luágu mégei jumáni lídejan Búngiu lun jadúgiñi le labúseerubei, ladúga méreengunbei jun lun jebélurun lídoun larúeijan Búngiu siélu.

⁴ Fuleíseiwatün jugúya le jírubei, ladúga líchuguba Búngiu gurásu jun.

⁵ Fuleíseiwatün jugúya le únabugubei, ladúga jerésibirubei le uágubei laríñaga Búngiu luágu líchugubei lan jun.

⁶Fuleíseiwatün jugúya le weíribei jabúseerun lúaradagun jabágaridun, ladúga líderagubadün Búngiu lun jadúgüni.

⁷Fuleíseiwatün jugúya le gudémejabubei, ladúga gudémegradün gíñe lun Búngiu.

⁸Fuleíseiwatün jugúya le jarúmabei anígi, ladúga jaríjubei Búngiu.

⁹Fuleíseiwatün jugúya le áfaagubei lun jámalijan sun cátei, ladúga lagúarubadün Búngiu queísi lirájüñü.

¹⁰Fuleíseiwatün jugúya le asúfurirubei eíbaajoúni luágu lúaragun jibágari, ladúga jebéluruba lídoun larúeijan Búngiu siélu.

¹¹Fuleíseiwatün dan le janábagunün gürígia, eíbaaja jamaún, aríñaga jagía sun luwúyeri iyéeni juágu, nueígiñe. ¹²Gúndaañu jumá, ladúga jerésibiruba ában oúnwenbun fáyeiti siélu, ítara liñá meja gíñe jeíbaajoúniwa profétagu ja ñúbinbaña jubáragiñe.

Ítara jíña queísi sálu luma lámpu lun ubou
(Mr. 9.50, Lc. 14.34-35)

¹³Ába lasígirun Jesúsu aríñaga.

—Ítara jíña quei sálu joun lílana ubou le lun jeréderuniña lueí jagádeirun, ánjein leféridira sálu lubásuan, ¿cábagi un ju lan? Úaalime ju lan ni ca un lueídügüya lun lágurúniwa, ábame jadúgüraguni gürígia.

¹⁴Ítara jíña quei lámpu joun lílana ubou le. Ában ubúrugü le luáguti ában wúbü siñáti larámudagun, furáanguti larijoúniwa. ¹⁵Mebedúnti gíñe ában lámpu lun líchugúniwa tábugiñe ában gáfu, luágu dábula líchugúa lun larúgoungadágüdün jáu sun ja múnadabaña. ¹⁶Ítara jumá gíñe, durúnguagüda jumeí jilámpun jádan gürígia, lun dánme lan jaríjini buíti le jadúgübei, ábame gíñe jadímurejan buíti luágu Wáguchi Búngiu le siélubei.

Larúfudajan Jesúsu luágu lilúrudun Moisés

¹⁷Marítagua jumátia luágu niábiña lan agídareí lilúrudun Moisés, ni le jarúfudajabei profétagu, máma niábiña agídareí, niábiña arúfudei líla le tímatimaati. ¹⁸Ninárün lubeíti jáu luágu njeingua rügáli ligía lan siélu luma ubou, magídarúnwabei ni ában púntu, ni ában létüra lídaangiñe lilúrudun Moisés daríme suséreeli le lúnbei lasúseredun. ¹⁹Ligía, le lubeí íchuguti mebéreseni luágu furúmierügü gumádi lídaangiñe lúrudu, íbini le lan ñúraütimaabei lídaangiñe, arúfudaja ligía joun gürígia lun jadúgüni líbe le ladúgübei, ñúraüraübei lanügúniwa yágüta siélu lídan larúeijan Búngiu. Ánjeinti le ñúdünbei láu sún buri gumádi lídan lúaragun, ítara gíñe larúfudajan, weíribei lanügúniwa yágüta siélu. ²⁰Naríñajare jun luágu ánjein lan mabuídun ligáburí jouserun sarágu weíyaasu jaweí arúfudajatiña lilúrudun Moisés, jáma fariséogu, mebélubadün lídoun larúeijan Búngiu siélu.

Larúfudajan Jesúsu luágu igáñi
(Lc. 12.57-59)

²¹‘Agáamba jumáli luágu aríñawagúa lán meja joun binádu jagúbürigu lun máfarajan jamá, ladúga furúmieguaugü lan le áfarajati, lagúseragüdúwaba. ²²Wel, naríñajare jun luágu furúmieguaugü lan le agáñiduti lúma gürígia líledi lagúseragüdúwaba. Le anábuti gürígia líledi lagúseragüdúbei luweírin-ágei lúruđu, le aríñaguti lun gürígia líledi, “ibídiougua táu”, luáguñein úma lun máfiougatin. ²³Ítara líña lubeíti, ánjein banúga bedéweejan luágun lání Búngiu latárü, báu ñi ába barítaguni luágu níjein lan cátei lídan furúmieguaugü gürígia bubá, ²⁴ígirabeí le lúnbei bedéweejani ñi ligíbugiñe latárü, ábame bídin aráandara lúma gürígia ligía. Lárigiñemeti, gayáraajalíme bagíribudun luágun latárü íchigei bedéweejan.

²⁵Ánjein abúseera ában gürígia lanúgünibu ligíbugiñoun lúruđu, belúba lídoun úarani lúma luágu jeíbuguniwagu lueí ledéregerunibu lun agúseragüdüti, ledéregerabume agúseragüdüti lun polisía, ábame badaürün. ²⁶Ninárün báu, máfuridunbadibu ñígiñe darí bafáyeiruni lagúmujoún gáwanün.

Larúfudajan Jesúsu luágu adultériu

²⁷‘Agáambaadün luágu aríñawagúa lán meja. “Magámarida jumá jámari ámu, adultériu líra.” ²⁸Áu naríñajare jun luágu furúmieguaugü lan le awámadirutu ában wúri, adúgaali adultériu túma tídan lanígi.

²⁹Ánjabu lubeíti lafigoungüda bágu le lueígiñebei boúnwenren, sagábei, fíbei díse, buítimaati lun beféridirun ában lídaangiñe umégeguni le buágubei sügü láu bídin láu sun búgubu máfiougatin. ³⁰Ánjein bújabu lubeí le boúnwenren afigoungüdúbadibu, dürúbei, fíbei díse, buítimaati lun leféridirün ában lídaangiñe umégeguni le buágubei sügü láu bídin láu sun búgubu máfiougatin.

Larúfudajan Jesúsu luágu ígiraguni
(Mt. 19.9, Mr. 10.11-12, Lc. 16.18)

³¹‘Aríñawagúati meja gíñe luágu furúmieguaugü lan le ígirutu lúmari lúnti líchugun gárada lánina ígiraguni tun. ³²Áu naríñajare jun luágu furúmieguaugü lan wügúri ígirutu lúmari, ánjein máma lubeí ladúga tagámaridun ligíbuagun, ába taganoún lúma ámu wügúri, adúgagüda lumútu furúmiñeti wügúri adultériu. Le gíñe agámaridutu wúri ígiraguaaru ladúgüña gíñe adultériu.

Larúfudajan Jesúsu luágu áfiñuruni

³³‘Agáambaadün gíñe luágu aríñawagúa lán meja joun binádu agúbürigu lun jagúnfulirun láu le jaríñagubei láu áfiñuruni ligíbugiñe Búngiu. ³⁴Áu naríñajare jun luágu moún lumuti lan jáfiñurun ni ca uágu—ni luágu siélu ladúga ñi lan lañúura Búngiu, ³⁵ni luágu múa ladúga ñi

lan líchigei Búngiu lugúdi, ni luágu Jerusalén ladúga ligía lubúrugutebei Warúeite Búngiu le weírigubei, ³⁶ni luágu jichúgü ladúga siñáti ni jájarudagüdün ni jáuridagüdün ában ídiburi. ³⁷Aríñagarügü jumá “ánja” o “uá”, máfiñurunga ni ca uágu, ámu cátei lueí líra lúmaginei Máfia.

Larúfudajan Jesúsu luágu láguugüdüniwa wuríbani
(Lc. 6.29-30)

³⁸‘Agáambaadün luágu aríñawagúa lán meja. “Águu luágu águu, ári luágu ári.” ³⁹Áu naríñajare jun lun máguugüdün jumá wuríbani luágu wuríbani, lubáragiñe líra, ánjein íchiga mútu agúfudein luágu ában louba jigíbu, rúya jumeí le ában oubaü lun. ⁴⁰Le áluguti lanúgünün ligíbugiñoun lúrudu tueígiñe jisímisin, ígira jumeí lun gíñe lanúgünun jabíte. ⁴¹Anjaün lafósura ában gürígia lun janúgün ában anúgüni ában máili, barújumei bián máili. ⁴²Furúmieguarügü le amúriajati ában cátei júma, rújumei lun, míchiga jumeí gíñe janágan luágun le afúredeijati júma.

Ísiñejabuni joun áganiñu
(Lc. 6.27-28, 32-36)

⁴³‘Agáambaadün gíñe luágu aríñawagúa lán meja. “Jínsiñelá bumáda bun, liyéeregudame bágani bun.” ⁴⁴Áu naríñajare jun. Jínsiñe jamá jáganiñu jun, buídulá jayúmajan jabá ja wuríbabei jayúmajan jubá, adúga jumá buíti joun ja iyéreejabúbaña jun, ayúmuragua jumá lun Búngiu jawágu ja anábagubadün, ja wuríbabei ouserunün. ⁴⁵Ítara lúba jagáburiduña lan queísi lirájüñü Jóguchi Búngiu le siélubei, ligía oúnaja lumúti wéyu joun buítiña jáma wuríbatiña, oúnajaleí júya dándu joun múaraantiña queísi joun úaratiña. ⁴⁶Ánjein já rügúbaña lubeí jínsiñejabúbaña jun ínsiñeda jun, ¿cábaga fáyeiti jerésibira luágu líra? Adúga jamúti gíñe ja agúburajabalin liseínsuna gumádi ítara. ⁴⁷Ánjein joún rügúñein lubeí jumádagu jayoúragua, ¿ca buíti jadúgübei láu líra? Íbini ja ibídiñejabubaña lun Búngiu adúga jamúti líra. ⁴⁸Úaragua jumá le gumúti queísi úaragua lan Jóguchi Búngiu le siélubei.

Larúfudajan Jesúsu luágu ladügün cátei buíti

6 ¹Ába lasígirun Jesúsu arúfudaja joun gürígia wúbüwaügügiñe, laríñaga. —Toúnigi jumá lueí jadúgün cátei buíti jagíbugiñe gürígia lúnügü jarjínün. Ánjein jadúga ítara, míchubei Jóguchi Búngiu le siélubei fáyeiti buíti jun. ²Ligía, dánme lubeí jíderagun ában gudémeti, masúbudiragüda jumeí lun sun ubou quei jadúga ja biánguabaña igíbu ligílisirugu lúma úmadarugu. Jagía, jadúgüni líra lúnügü jadímurejan gürígia buídu jawágu. Ninárün jáu luágu láu lan jadúgüni líra, íbíja jamáli jafáyeiruája. ³Dan le jíchugun ában cátei lun gudémeti, masúbudiraleí ni lubuídun-ágei jumáda, ⁴adúga jumeí lábugiñe libídiñewa. Jóguchi Búngiu le aríjubalin le jadúgübei lábugiñe libídiñewa, líchuguba jafáyeiruája.

Larúfudajan Jesúsu luágu ligáburí ayúmuraguni lun Búngiu
(Lc. 11.2-4)

⁵Dan gíñe le jayúmuragun lun Búngiu, mítaran jumá quei ja biánguabaña igíbu ja jinsiñebei joun lun jayúmuragun rára tidan jalígílisin juríu lúma lídan legéyedun úma lun jaríjiniña güirígia. Ninárün jáu luágu láu lan jadúgüni líra ibíja jamáali jafáyeiruája. ⁶Dan le jayúmuragun lun Búngiu, belújuma jirúmurugun, darú jumeíme jubéneri, ábame jayúmuragun lun Jóguchi Búngiu le lábuguabei júma ñi. Jóguchimeti Búngiu, le aríjubalin le jadúgübei lídan límanin, líchuguba jafáyeiruája. ⁷Lídan le jayúmuragun, máguuyuguagüda jumá luágu dimúrei le málati quei jadúga ja ibídiñejabubaña lun Búngiu, jarítaguatiñati luágu lagáambubaña lan Búngiu ladúga líbe jadímurejan. ⁸Mítaran jumá lubefti quei jagía, ladúga lubáragiñe jayúmuragun lun Búngiu subúdi láali ca lan jabúseerubei. ⁹Ítara lúba lubefti jayúmuragun.

Wáguchi Búngiu le siélubei,
inébewalá bíri.

¹⁰Núbinlá bidáani lun barúeijan ya uboúagu,
adúgüwalá bugúndan uboúagu quei ladúgüniwa bugúndan siélu.

¹¹Rúba fein buídurügütu woun lun wéyu le ugúñebei,

¹²ferúdunabeí wuríbati le adúga wamáalibei quei ferúduna wamániña
ja adúgübaña wuríbati woun.

¹³Mígira báwa lun wáburujan lídoun wuríbani,
dísegüdarügü báwa lueí,

ladúga amúrü le arúeijabei, amúrü le Súntibei Gabáfu, amúrü le
weírígubei lun sun dan. Ítaralá.

¹⁴Ítara líña lubefti, ánjaña ferúduna jumá ámu luágu wuríbati le adúga jamáalibei jun, ferúduna lubádün gíñe Jóguchi Búngiu le siélubei, ¹⁵ánjein úa ferúduna jumá ámu, úabei gíñe ferúduna láani Jóguchi Búngiu jifígoun.

Larúfudajan Jesúsu luágu ayúnaruni

¹⁶Ába larinágun Jesúsu.

—Jugúya, dánme le jayúnarun, marúfuda jumá lírun igíbu quei jadúga biángua tigíbu, jagía jadúgünbalin ítara lun jaríjini güirígia luágu jayúnaruña lan. Ninárün jáu luágu láu lan jadúgüni líra ibíja jamáali jafáyeiruája. ¹⁷Ánjein jugúya, dan le jayúnarun, amúriga jumeí jídiburi, chibá jumeíme jigíbu, ¹⁸meféen jamámuga güirígia luágu jayúnaruña lan. Jóguchirügüba Búngiu le júmabei ñi geféen luágu jayúnaruña lan, ábameti líchugun jafáyeiruája.

Írisini siélu
(Lc. 12.33-34)

¹⁹Moúndaragua jumá írisini ya uboúagu le ñí lubei gayára lan jájüchün jamútiri áni gayára ligía lagájüdün ámu luwúyeri írisini, le gíñe ñíjin lubeí

gayára lan jebélurun jíwerutiña lun jíwerujan. ²⁰Oúndaragua jumá irisini siélu, le ñí lubei siña lan jájüchün jamútiri, magájüdadí ni cáta, mebélu jagía jíwerutiña íweruja ñí. ²¹Le ñí lumuti jirisin, ñíñoun gíñe janígi.

Lilámpun úgubu

(Lc. 11.34-36)

²²Ítara líña bágu quei ában lámpu lun búgubu, ánjein lubeíti buídu lubeí bágu, aríja ligía luágun irisini siélu, camá jamuga jarúgoungabeí gíñe láu sun búgubu, áni buídubei gíñe sun bigáburi. ²³Ánjein sándi lubeí bágu, aríja ligía luágun irisini ya ubouágu, camá jamuga lídaanbei lubúriga sun búgubu, áni wuríbabei gíñe bigáburi. Ánjein ñúbin larúgouna le bídaanbei lun lubúrigame, ¡luweírin méfuna líwurin lubúriga ligía!

Búngiu luma seínsu

(Lc. 16.13)

²⁴Úati ni ában gayáraati lesériwidun joun biáma iyúbudirigu, ladúga lísiñeduba ában jádaangiñe lun, liyéreegudáme le ában lun, úraguabei luma ában jádaangiñe, líchigame mebéreseni luágu le ában. Siñáti lesériwidúniwa lun Búngiu luma lun seínsu.

Toúnigi lumútiña Búngiu lirájüñü

(Lc. 12.22-31)

²⁵Naríñajare lubeíti jun, madíjeri jumá luágu cába lan jeíga o cába lan játa lun jabágaridun, ni tuágu anáanguni to lúnboun jadáürunun. ¿Máfunagi gebégitimaati ibágari sügú láu eíginí, gebégi úgubu sügú táu anáanguni? ²⁶Aríja jumá joun dunúru ja ájamajabaña garábalirugu. mábunagun jáña, malúbajan, mareídun jameí alúbajani lídan lágei, láu sun líra, rúti Júguchi le siélubei eíginí joun. ¡Sarágu gebégitima jumá sügú jáu dunúru! ²⁷¿Cáteigi jádaangiñe gayáraabei líchugun bián ugúdi lánwoun lúgubu, ca lan lanárimebei láfaagun luágu?

²⁸¿Ca uágu jadíjerida tuágu anáanguni? Aríja jumá ída líña lan laweínamudun fulúri. láu sun mawádigimari lan, madúgün ligía gamísa, ²⁹ni méja urúei Salomón láu sun luwéndegun, mawéndentí meja ladáüragun quei fulúri. ³⁰Ánjeinti daúguagüda lubálin Búngiu jíduru ítara le ugúñebei lájücha, jarúgabeí yebe lagudúña, ¿gúbumesan líderaguajün lougua tafíñen jugúya le? ³¹Madíjerida jumá lubeíti aríñaga. “¿Cába weíga?” o “¿Cába wáta?” o “¿Cába wadáüra?” ³²Gürígia ja lánigu ubou le, luágu rügüñeín buri cátei le jarítagua, ánjein jugúya, níjein júguchi Búngiu siélu le subúdiabúbei cátei lan jemegeirubei. ³³Seríwi jumá lun Búngiu furúmiñe, áluaja jumeí ibágari surúti le áubei lagúndaara, ábame líchuguni sun le jemegeirubei jun. ³⁴Madíjerida jumá lubeíti luágu jarúga, ladúga barú lumuti gíñe jarúga lidíjeridüna lúmagua. Ságü ában wéyu gíbetei cátei lun.

Míchiga jumá jadúnrun ámu
(Lc. 6.37-38, 41-42)

7 ¹Ába lasígirun Jesúsu aríñaga joun gürígia wúbüwaügügiñe.
—Míchiga jumá jadúnrun ámu, míchugun lámuga gíñe Búngiu jidúnrun,
²ladúga quei ligáburí jíchugun jadúnrun ámu, ítara lúba gíñe líchugun Búngiu
jidúnrun, le áubei jamísuraja, láuba gíñe lamísurajaün Búngiu. ³¿Ída lubásan
gayára lan jaríjini liraúraü ífei le lídaanbei lágu jamúlen áni masándi jumúti
durúsu le lídaanbei jágu? ⁴¿O ída lúba gayára lan jaríñagun lun jamúlen. “Sagáneí
liraúraü ífei le lídaanbei bágu,” áni níjein ában durúsu lídan jágu? ⁵¿Bíangua
tigíbu jugúya le! Sagájumei durúsu le lídaanbei jágu furúmiñe, ítara lúba gayára
lan jaríjin buídu lun jaságaruni liraúraü ífei le lídaanbei lágu jamúlen.

⁶‘Míchiga jumeí arúfudajani luáguti asálbaruni joun gürígia ja
gáñitiña, garábagua jáñein juágun quei oúnli lun jágürünün. Míchiga
jumeí gíñe arúfudajani ligía le gebégibei sarágu joun gürígia ja
büírujuduátiña, dügúgua jañálin.

Agáamba lumúti Búngiu wamúriajan lúma
(Lc. 11.9-13, 6.31)

⁷Jamúriaja lúma Búngiu, ábame líchugun jun, jáluaaja, ábame jadárirun,
daúnjuma luágu béna, ábame lánjunrenchún jun. ⁸Ladúga le amúriajati,
abíjati, le áluguti, daríti, le adaúnjati luágu béna, jurénwati lun.

⁹¿Níjein funági ában jídaangiñe gayáraati líchugun ában dübü lun
lisáani dan le lamúriajan fein lúma? ¹⁰¿o líchugun lan ában jéwe lun dan
le lamúriajan úduraü lúma? ¹¹Ánjein lubeíti láu lubeí sun wuríba jumá,
gíchigaditün cátei buíti joun jisáanigu, jgúbuméti líchiga Júguchi Búngiu
le siélubei cátei buíti joun ja amúriajatiña lúma!

¹²‘Súnwandanlá lubeíti jadúgün joun ámu quei le jabúseerubei lun jadúgüni
jun, ladúga ligía laríñagubei lilúrudun Moisés túma jalíburun profétagu.

Bürúraüti lubéneri siélu
(Lc. 13.24)

¹³‘Belújuma lídaangiñe béna le бүрүрүәйеи. Béna lúma úma le anúgübei
gürígia lídoun féridi, tuléburi líña, gabáranouga ñi, áni sarágu jáña
ebélurutiña lídaangiñe. ¹⁴Ánjeinti béna lúma úma le anúgübei gürígia lídoun
ibágari le magúmuchaditi, бүрүрүәйеи líña, murúgua, míbetiñati adáriruti.

Luágu cátei le wadúgübei lasúbudirúa cátawa lan
(Lc. 6.43-44)

¹⁵‘Tóunigi jumá jawéi yéetiña ja aríñagubaña luágu lerérun lan Búngiu
jadímureja. Jayábin jun quei mudún bougudigiñe jabíti, ánjein múnadagiñe,
ítara jáña quei anímaalu gáñitiña. ¹⁶Jugúya, gayáraabei jasúbudiruniña

luágu le jadúgübei, malúbajoúntu beíbei lídaangiñe jíyü, ni ígo lídaangiñe guríbiyuwa. ¹⁷Sun lubefti wéwe le buíti, buíti lin, wéwe le wuríbatí, wuríbatí lin. ¹⁸Wéwe le buíti, siñáti wuríba lan lin, wéwe le wuríbatí, siñáti gíñe buídu lan lin. ¹⁹Sun wéwe le mabuídunti lin, chaúnwati, ába lágudúniwa. ²⁰Jasúbudirubaña lubefti yéetiña jagía luágu le jadúgübei.

Másubaña ebélura lídoun arúejani le siélubei

(Lc. 13.25-27)

²¹‘Máma sun ja aríñagutiña nun. “Nabúreme, Nabúreme,” jebéluruba lídoun arúejani le siélubei,’ líña Jesúsu. ‘Ja rügúbaña adúgübalin lugúndan Nóguchi Búngü le siélubei ebélura. ²²Dánme lachúlürün wéyu lánina agúseragüdüni, sarágubaña aríñagutiña nun. “Wabúreme, Wabúreme, apúrichijatiwa mejátia luágu bíri, sagá wagía espíritugu wuríbatíña lídan bíri, adúga wagía sarágu miláguru lídan bíri.” ²³Ábamei naríñagun joun. “Íbídiñegubeiñadün nun, díse jumá nueí, jugúya le adúga jumáalibei le wuríbatei.”

Jawúyeri güri-gia ja agáambubalin lerérün Búngü

(Lc. 6.47-49, Mr. 1.22)

²⁴‘Le agáambutina, adúgaleí le nubeíbei, ítara líña quei ában wügüri gunfaráandati le adúgübei lúban ligíbuagu dúbü. ²⁵Ába liábingua júya, ába liñúrun dúna, fúgua garábali tuágun muna tugúya, meíguaduntu ladúga luáguñein lan dúbü tuágaburi. ²⁶Ánjeinti le agáambutina, madúgün lumúti le nubeíbei, ában wügüri ibídiougua táu ligía, le ábunagubei ligíbuagu ságoun. ²⁷Ába liábingua júya, inúra dúna, fúgua garábali tuágun muna tugúya, ¡ma lanárime táburujan!

²⁸Dan lásurun ladímurejan Jesúsu, ¡ma luweírin janígi güri-gia láu le larúfudajabei! ²⁹ladúga láu lan ubáfu larúfudaja, máma quei arúfudajatiña lilúrudun Moisés.

Lareídaguagüdün Jesúsu ában gawáguti gumeín le mareídaguadibei

(Mr. 1.40-45, Lc. 5.12-16)

8 ¹Dan le larárirunbei Jesúsu lueígiñe wúbü, sarágu jáña güri-gia afálaruti. ²Ába liábin ában wügüri gawáguti gumeín le mareídaguadibei, ába lájuduragun ligíbugiñe Jesúsu, ába laríñagun lun.

—Nabúreme, ánjabu busén, gayáraati bareídaguagüdünina.

³Ábati lagúurun Jesúsu luágu láu lújabu, aríñageina ligía.

—Buséntina, areídaguagüda numútibu.

Quei laríñagun ítara, ába lareídagun sánditi ligía. ⁴Ába laríñagun Jesúsu lun.

—Maríñaga beítia ni ca un, ñúdünrügübá arúfudagua búngua lun fádiri, rubeíme edéweejani le uágubei laríñaga Moisés, lun jaríjini güri-gia luágu areídaguadibu lan.

Lareidaguagüdüni Jesúsu lumúsun ában gumándan Rómana
(Lc. 7.1-10)

⁵Dan le lebélurun Jesúsu lídoun fulásu le gíribei Capernaúm, ába liábin ában gumándan Rómana lubároun, ⁶ába layúmuragun lun ítara.

—Nabúreme, njein numúsun roun láu sándi le derégüdaü, lúma sarágu gáriti luágu.

⁷Ába laríñagun Jesúsu lun.

—Neíbuga agáranija lun.

⁸Ába loúnabun gumándan.

—Nabúreme, madúnatina lun bebélurun núbiñoun, aríñagarügübeí dimúrei, ábame lareidagun numúsun. ⁹Naríñagubaalin líra ladúga nugúya lábugiñeñadina gíne gumádi le ínútimaati, áni añájein gíne súdaara lábugiñe nagúmadijan. Dan le naríñagun lun ában jádaangiñe lun lídin, ñúdünti, dan le naríñagun lun ában lun liábin, ñúbinti, dan le naríñagun lun numúsun lun ladúgün furúmieguarügü cátei, adúga lumúti. Ítara lúba, luágu berérün mósu lídin sándi lueí numúsun.

¹⁰Dan le lagáambunbalin Jesúsu le laríñagubei gumándan ligía ába laweíridun lanígi, ába laríñagun joun ja afálarubalin.

—Nínárün jáu luágu madárigidina lan wügúri weíri taffínen ni jádan numútuniña Israelítagu quei wügúri le. ¹¹Naríñajare jun luágu sarágujaba lan já meja ibídiñejabubaña lun Búngiu ñúbintiña luegíñe oúbaü le ñígiñe lubeí laboucha wéyu, jáma le ñígiñe lubeí lálüda, ábame jañúurun eíga lúma Abrahám, Isáac lúma Jacób lídan arúejani le lánina siélu. ¹²Ánjeinti já yebe lúnbaña lídan jamá arúejani ligía jaságarúba bougudín, ábame jádarúniwa lídoun luweírin-ágei lubúriga, ábame jayájuajan, ábame lacúnrinjan jári le luweírin jagárigu.

¹³Ába laríñagun Jesúsu lun gumándan ligía.

—Beíba búbiñoun, le uágubei baffínera, ladügüba bun.

Ába lareidagun músu ligía lídan óra ligía.

Lareidaguagüdünnun Jesúsu límenidi Pédro
(Mr. 1.29-31, Lc. 4.38-39)

¹⁴Ába lídin Jesúsu lúbiñe Pédro, ába ladárirunun límenidi Pédro roun láu abíruaü. ¹⁵Ába lagúurun luágu tújabu, ába lagídarun abíruaü tueí, ába tásaarun, ába tagúmeserun esériwidaña.

Lareidaguagüdünnun Jesúsu sarágu sánditiña
(Mr. 1.32-34, Lc. 4.40-41)

¹⁶Dan le lagúñedunbei, ába janúgün sarágu gürígia ja gawágutiña espíritugu wuríbatiña lun Jesúsu, ába laságajaniña espíritugu wuríbatiña jagía jaweí láurügü ában dimúrei, areidaguagüda láña sun ja sándibaña. ¹⁷Lasúseredunbei sun le lun lagúnfulirun lé meja uágubei ladímureja proféta Isaías dan le laríñagunbei luágu Jesúsu. “Barú lumuti wadébilin, gidálei wasándigu.”

Já yebe abúseerubaña jafálaruni Jesúsu
(Lc. 9.57-62)

¹⁸Dan le laríjin Jesúsu luágu sarágu jáña lan güirigia geyégu láu, ába líchugun dimúrei lun jájiñuragun ligía jáma láni disípulugu loubáfurugun dúna. ¹⁹Ába layarafadun ában arúfudajati lilúrudun Moisés lun Jesúsu, ába laríñagun lun.

—Maésturu, buséntina nafálarunibu le ñíjin lumúti bídin.

²⁰Ába loúnabuni Jesúsu.

—Darítiña gasígamu júyu lun jaganoún ñi, gádibutiña gíñe dunúru, ánjeinti áu le Wügúri Garaúwarügüti, madáritina ni jalába lan nabálachagüdei nichúgü.

²¹Laríñaga ában jádaangiñe láni disípulugu lun.

—Nabúreme, buséntina nafálarunibu, lárigiñeme loúnwen núguchi, buná neíme, ábame nafálarunibu.

²²Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburi.

Lagálumaruni Jesúsu garábali lúma lugúdi barána
(Mr. 4.35-41, Lc. 8.22-25)

²³Ába ladinun Jesúsu tídoun ugúnein, ába jóúdin láni disípulugu lúma. ²⁴Sódini ába láfuragun ában garábali jéreti, ába lebélujan lugúdi barána tídoun ugúnein. Larúmuguñati Jesúsu. ²⁵Ába jagágudajani láni disípulugu, ába jaríñagun lun.

—¡Wabúreme, séfu báwa! ¡Wadíbiragua!

²⁶Ába loúnabuniña.

—¿Cásan uágu janúfudeda? ¡Loúgua taffñen jugúya le!

Ába lásaarun, ába ladeíñjan lun garábali lúma barána, ába lagálumadun. ²⁷Ába laweíridun janígi, ába jaríñagun.

—¿Cáteisan wügúri le, agáamba lubálin garábali lúma barána?

Laságarun Jesúsu espíritugu wuríbatíña jádaangiñe bián wügúriña Gadárana
(Mr. 5.1-20, Lc. 8.26-39)

²⁸Dan le lachúlürün Jesúsu loubáfurugu dúna, jageíroun Gadárana, ába jáfuridun bián wügúriña lídaangiñe buri umúajaü achigíti luágu dúbü, ába jayábin luágun. Biángubei jagía, jáuñanu espíritugu wuríbatíña áni janárimetiti jagáñi darí lun siñá lan jáségürün güirigia lídaangiñe úma ligía. ²⁹Ábati jagúarajan ítara.

—¿Cásan uágu bemétera wámoun, Jesúsu Liraú Búngiu? ¿Biábiña asúfuriragüdawa lubáragiñe dan le lánina asúfuriruni?

³⁰Ñíñanu sarágu buúruju eíga madíse ñígiñe, ³¹ába jayúmuragun espíritugu wuríbatíña ja lun Jesúsu, jaríñaga lun.

—Ánjawa baságara, ígirabá lun webélurun jádoun büüruju ja.

³²Ába laríñagun Jesúsu joun.

—¡Jeíbati jádoun!

Ába jáfuridun espíritugu wuríbatíña jagía jádaangiñe wügúriña jagía, ába jebélurun jádoun büüruju, ába jáguragun büüruju jagía jóungua lueígiñe ában gudúungu, ába jáburujan dúnarugun, ába jañáradagun.

³³Ába janúfudedagun ja oúnigirubaliña büüruju, ába jeíbaagun, jachúlün aúdübü, ába jabájüdaguni le asúseredubei joun büüruju lúma joun wügúriña já buga jáubaña espíritugu wuríbatíña. ³⁴Ábati jayábin sun lílana fulásu ligía lúmoun Jesúsu, ába jayúmurgun lun lun láfuridun jageíragiñe.

Lareídaguagüdün Jesúsu ában wügúri derégüdaali

(Mr. 2.1-12, Lc. 5.17-26)

9 ¹Ábati ládinun Jesúsu tídoun ugúnein tugúya, ába lánjiñuragun loubáfurugun dúna, ába lachúlürün lageíroun. ²Ába janúgün ában wügúri derégüdaali lun, roun tídan lubárari. Dan le laríjinbalin Jesúsu luweírin jaffínen, ába laríñagun lun sánditi ligía.

—Ragúba gurásu, niraú, ferúdunawati bífígon.

³Níñanuti jádaangiñe arúfudajatiña lilúrudun Moisés, aríñagutiña jóunguarügü. “Lanábaguñeigan wügúri le Búngiu láu dimúrei le laríñagubei.”

⁴Quefti subúdi lubálin Jesúsu le uágubei jasáminara, ába laríñagun joun.

—¿Cásan uágu luríbanbei jisáminan ítara? ⁵¿Cátimasan ménreengúnbei laríñawagúniwa. “Ferúdunawati bífígon”, ódi “Sarába, beíbuga”? ⁶Narúfudaaliti jun luágu gabáfu nan, áu le Wügúri Garaúwarügüti, lun ferúduna nan figoú.

Ába laríñagun lun sánditi ligía.

—Sarába, budáboun bubárari, beíba búbiñoun.

⁷Ába lásaarun sánditi ligía, ába lídin lúbiñoun. ⁸Dan le jaríjinbaalin gürígia cátei le, ába laweíridun janígi, ába jadímurejan buíti luágu Búngiu luágu líchuguni ubáfu le joun wügúriña.

Lagúarun Jesúsu lun Matéo lun lánime disípulu

(Mr. 2.13-17, Lc. 5.27-32)

⁹Ába lídin Jesúsu nígiñe, ába laríjinina, áu le gíribei Matéo, le abúrújabarun líburu to. Agúburajatina meja liseínsuna gumádi, ñun níña lídan nubára lánina agúburajani wéyu ligía dán le lásügürünbei Jesúsu nígiñe. Ába laríñagun nun.

—Falábana, queímoun núma queísi náni disípulu.

Ába násaarun, ába nafálaruni.

¹⁰Lárigiñe, ñun líña Jesúsu eíga, sarágu jáña giñéti ja agúburajabalin liseínsuna gumádi jáma ámu gafígountiña eíga lúma úara jáma lání disípulugu. ¹¹Dánti le jaríjini fariséogu cátei le, ába jaríñagun joun lání Jesúsu disípulugu.

—¿Ída liñásan leíginbei jumáesturun jáma agúburajatiña liseínsuna gumádi lúma jáma ámu gafígountiña?

¹²Ába lagáambuni Jesúsu, ába laríñagun joun.

—Ja magádiebaña mabúseeruntiña surúsia, ja sándibaña, jagía busénbaña surúsia. ¹³Furéndeí jumeí ca lan laníchigubei le uágubei laríñaga Búngiu tídan Lerérun. “Buséntina lun gudémejabu jumá, máma lun jadágaragüdüñ anímaalu nun.” Máma niábiña áluajaña ja magádiebaña ligíbugiñe Búngiu, niábiña áluajaña gafígountiña lun jasáansiruni ligáburi jouserun.

Jálügüdüni Jesúsu libúgürü ayúnaruni

(Mr. 2.18-22, Lc. 5.33-39)

¹⁴Ábati jayábin ja láni Juan le abásteragüdjabei disípulugu, ába jaríñagun lun Jesúsu.

—¿Ánsan wagía jáma fariséogu ayúnara wabeí sarágu, ánjaña báni disípulugu mayúnaruntiña?

¹⁵Ába líchuguni Jesúsu jémpulu le joun luágu iséri larúfudajan lúma binádu, laríñaga.

—¿Gayáraati funági jíruñu jamá ja amísurajoúbaña lídoun ában maríei dan le niján lan adári jáma ñi? Lachúlürüba wéyu lun lúadun adári jáma, ligíaalime jayúnarun.

¹⁶‘Siñáti táfadajoun gamísa ñulújaru táu murúsun to derégiru ladúga dánme le tacháwaragun to derégiruboun ábame tajeíridagun to ñulújaruboun, ábatimámeti laweíridun jeíriti. ¹⁷Siñáti gíñe léserúniwa bínu le isérigili lídoun guéru le binádujali, ánjein adügúwa ítara, ábame lafaúñchün guéru dánme le liñúrun bínu, féridiwa ligíameti guéru, féridiwa bínu. Ligía lúnti lubeí léserúniwa bínu iséri lídoun guéru iséri, ítara lúba lesériwidun biángubei.

Liraú Jáiro túma wúri to agúurubarun lanáangun Jesúsu

(Mr. 5.21-43, Lc. 8.40-56)

¹⁸Dan ñíñein lan Jesúsu arúfudajei sún buri cátei le, ligía liábin ában ábuti jádaangiñe juríu, ába lájuduragun ligíbugiñe, ába laríñagun lun.

—Sun líña toúnwen nisáani, ánjabu ñúdüñ lun bíchuguni bújabu tuágu, táguuguba.

¹⁹Ába lásaarun Jesúsu, ába lídin lúma ñi jáma láni disípulugu.

²⁰Ñíñounti ában wúri úmada sánditu, dúusu irúmu táu láu lésejan jítaí tídaangiñe, ába tayárafadun lun Jesúsu lanáangiñe, ába tagúurun luágu táru lanáangun, ²¹tariñaga túnguarügü. “Láurügü nagúurun tuágu lanáangun nareídaguba.” ²²Ába lagáraragun Jesúsu, ába laríjinun, ába laríñagun tun.

—Ragúba gurásu niraú, areídaguaadibu ladúga bafíñen.

Lúmagiñe óra ligía ába tareídagun.

²³Dan le lachúlürün Jesúsu líbiñoun buga ábuti ligía, dan le larjiniña ññaajatiña aráanseña lun ábunajani, añája güri-gia areñcha, ²⁴ába laríñagun joun.

—Furíjuma yágiñe, moúnwengiru irájü to, tarúmuguña.

Ába jéjerajan láu. ²⁵Dan le furígüda láaña sun güri-gia, ába lebé-lurun, ába lárügüdüni tújabu irájü tugúya, ába tásaarun. ²⁶Ába labúruchagun luágu le asúseredubei lídan sun fulásu ligía.

Lareidaguagüdün Jesúsu bián maríjintiña

²⁷Dan láfuridun Jesúsu ñígiñe, ába jóúdin bián wügúriña maríjintiña lárígi, agúarajeina ítara.

—¿Gudéme wamá bun, amúrü le ladúgawagun David!

²⁸Dan lebé-lurun Jesúsu múnadoun, ába jachúlürün maríjintiña jagía lúmoun, ába laríñagun joun.

—¿Affñetün luágu gayára lan nareidaguagüdünün?

Ába jaríñagun.

—Ánja, afíñetiwa, Wabúreme.

²⁹Ába lagúuruni Jesúsu jágu, ába laríñagun joun.

—Ítaralá quei ligáburi jaffñen.

³⁰Ába léfegechun jágu, ába léredun Jesúsu jawágu lun jóuchun lun masúbudirúniwa lan luágu ligía lan agáranijabei joun.

³¹Quei jáfuridun ñígiñe, ába jabájüdaguni le ladúgübei Jesúsu lídan sun fulásu geyégua láu.

Lareidaguagüdün Jesúsu ában meréngaditi

³²Dan le áfurideina jamá, ligía jayábin fiú güri-gia láu ában wügúri meréngaditi, gawáguti ában espíritu wuríbati, ába jayábin láu lun Jesúsu.

³³Lárigiñe laságaruni Jesúsu espíritu wuríbati ligía lueí meréngaditi ligía, ába lagúmeserun adímureja. Ába laweíridun janígi güri-gia, ába jaríñagun.

—Maríjiñajágidiwa líbe le jageíra Israelítagu.

³⁴Jaríñagaídan sun fulásu geyégua ti fariséogu luágu láu lan lubáfu Máfia le jábuti espíritugu wuríbatiña laságaja Jesúsu espíritugu wuríbatiña.

Lugúdemejabu Jesúsu joun güri-gia

³⁵Eíbuga lumúti meja Jesúsu sun fulásu arúfudajeina tídan jalígílisin juríu, apúrichijeí ugánu bufti luáguti arúejani le lánina siélu, areidaguagüdeina sun luwúyeri sándi lúma gáriti. ³⁶Dan larjiniña güri-gia, ába jagúmededagun lun, ladúga nidíjeri jamá, magúraasun jagía, camá mudún ja moúniritiña.

³⁷Ába laríñagun joun láni disípulugu jabúgürü güri-gia jagía.

—Sarágu jáña güri-gia buséntiña jagáambuni ugánu luáguti asálbaruni, ítara jáña quei nádü lun lalúbajoún, áni loúguatiña ñadágimeintiña.

³⁸Lúnti lubeíti jamúriajan lúma Labúreme nádü lun loúnajan ñadágimeintiña lun japúrichijan joun.

Láni Jesúsu dúusu disípulugu

(Mr. 3.13-19, Lc. 6.12-16)

10 ¹Ába lagúarun Jesúsu joun dúusu láni disípulugu, ába líchugun ubáfu joun lun gayára lan jaságajan espíritugu wuríbatíña jawéi gürígia lúma lun jareídaguagüdün sun luwúyeri sándi lúma gáriti. ²Niján jíri dúusu láni Jesúsu disípulugu jagía. Furúmiñeti, Simón le méme gíribei Pédro, lúma Andrés le lamúlen, Jacóbo lúma Juan le lamúlen—lirájüñü Zebedéo, ³Felípe, Bartolomé, Tomás, núma, áu Matéo le agúburajabei meja liseínsuna gumádi, Jacóbo le liraú Álfeo, Lébeo, le méme gíribei Tadéo, ⁴Simón—ában meja wügúri áfaaguti lun jawáanserun jurífu, lúma Júdas Iscarióte, le alúgurubalin Jesúsu.

Loúnajaniña Jesúsu disípulugu apúrichija

(Mr. 6.7-13, Lc. 9.1-6)

⁵Dan loúnajabaliña Jesúsu dúusu ja apúrichija, ába laríñagun joun ítara. —Mídin jumá le ñí jamuti ja mámabaña jurífu, mebélu jugúyame lídoun buri fulásu le láni Samária, ⁶jabúgürülá gürígia féridijaña ja Israelítagu jídin. ⁷Jeíba, apúrichijeina luágu yaráfaali lan larúeijan Búngiu. ⁸Areídaguagüda jumáña ja gawágutiña gumeín luágu jára, jáma ja gawágutiña ámu luwúyeri sándi, sarágüda jumá jiláaña, sagá jumaña espíritugu wuríbatíña. Mafáyeijántün lun jibíjini ubáfu le, magúburaja jumá gíñe luágu.

⁹Manúga jumá seínsu, ¹⁰manügün jugúyame lágei ni cáta. Ábanrügütá simísi janúga, manügün jugúyame sabádu ni bádu, ladúga le ñadágimeinbei garíchatí lun leígin lídaangiñe luwádigimari.

¹¹Dánme le jachúlürün lídoun ában ubúruugu o ában lan liraúraü fulásu, ábame jálugun gürígia ja ánjatiña lun jerésibirunün ñí, ábame jeréderun jáma jábiñe darí jídin. ¹²Dánme jebélurun tídoun ában muna, ábame jabúsurun, ayúmuragueina magádiei jawágu tílana muna tugúya. ¹³Ánjaün jerésibira tílana muna tugúya, ígira jumeí jabúsurun jáma, ánjaün merésibirun jamá, giríbugüda jumeí busúguaü ligía lun úa lan magádiei joun. ¹⁴Ánjaünti merésibirun jamá, mája jagía jagáambunün, ábame jáfuridun tídaangiñe muna tugúya o lídaangiñe lan fulásu ligía, ábame jáfuruduni calíqui lueígiñe jugúdi lun jarúfuduni luágu mabúidun lan jagáburi gürígia jagía, ígira jumáña quei jadáriragun jóungua. ¹⁵Nínárün jáu luágu dánme lan le lachúlürün wéyu lánina agúseruni, weíritimaabei jasúfurirun lílana fulásu ligía sügú láu jasúfurirun lílana Sodóma lúma Gomórra.

Eíbaajóuni le lúnbei jasúfuriruni láni Jesúsu disípulugu

¹⁶Noúnajaadüntia quei mudún jagánaguóun ánimaalu gáñitiña. Aráanseñu jumá lubeíti ítara quei jéwe, áni ítara jumá quei únjun madúgünga wuríbani.

17Toúnigi jumá ladúga j juríu. 18Janügúwaba jagíbugiñoun gumádimatiña lúma jagíbugiñoun urúeigu lueígiñe jesériwidun nun, itara lúba gayára lan jadímurejan nuágu jagíbugiñe, lúma jagíbugiñe ja mámabaña juríu. 19Dánme le jedéregerúniwa joun lúrudugu, májüchüra jumá luágu cába lan jaríñaga o ída lúba lan jaríñaguni, ladúga dánme lachúlürün óra lun jadímurejan, líchugubei Búngiu le lúnbei jaríñaguni jun. 20Mámaba jugúya adímureja, láni Jóguchi Búngiu Espíritu, ligíaba adímureja jídaangiñe.

21‘Jalógurubaña wügúriña jabíriña guánarü lun jafarún jilágubei, alúgura jamáñame agúbürigu jasáanigu, garábagua jagíame isáanigu jawágun jagúbürigu lun jáfaragüdüniña. 22Jeyéreegüdúba lun sun uboú nueígiñe, áni le derégüdagwati darí lúmoun lagúmuchun libágari, lebéluruba siélun. 23Dánme le jeíbaajoún lídan ában fulásu, ábame janúrajan lídoun ámu, ninárün jáu, niábinyaba, áu le Wügúri Garaúwarügüti, lubáragiñe jeíbuguni sún buri jabúrugute Israelítagu.

24‘Úati disípulu íñuguti lueí lumáesturun ni músu lueí liyúbudiri, ánjana asúfurira, lúnti gíñe jasúfurirun. 25Lúnti gúndan lan disípulu láu lachúlürün ítarada quei lumáesturun, lúma músu quei liyúbudiri. Ánjein aríñawagúa lubeí nuágu luágu jábutiná máfianu, gúbume janábawagua ja afálarubalina.

Cába lan ueí lanúfudedúa

(Lc. 12.2-9)

26‘Ligía manúfudeda jumá lubeí jaweí gürígia,’ líña Jesúsu joun láni disípulugu lubáragiñe loúnajaniña apúrichija. ‘Úati cátei darúguati láu lun machúlaagunbei lan, úa ni cáta le arámudagúati lun masúbudirínwabei lan. 27Le naríñagubei jun lídan lubúriga aríñaga jumeí lídan larúgounga, le naríñagubei jun ibídiñoun joun ámu, wágua jumeí íñugiñe tibíti múna. 28Manúfudeda jumá jaweí ja gayáraabei jáfaruni úgubu jilágubei áni siñáti jáfarunun uwáni, Búngiu le gayáraabei lasúfuriragüdüni úgubu túma uwáni máfiougati lun sun dan, ligía lúnbei janúfudedun lueí.

29‘¿Malógurúntiña funági bián jarájüñü dunúru luágu ában liraúraü seínsu? Áni máburujantu ni ában jádaangiñe múarugun ánjein mabúseerun lubeí Jóguchi Búngiu. 30Ásta ídiburi le jábulugubei, abájüdüwati ában ában. 31Manúfude jumá lubeíti, gebégitün sügú jáu dunúru.

Ja mayéedagúnbaña láu Jesúsu jagíbugiñe gürígia

(Lc. 12.8-9)

32‘Sun ja arúfudagutiña jóungua jagíbugiñe gürígia luágu númagiñeánu lan, naríñaguba gíñe ligíbugiñe Nóguchi Búngiu le siélubei luágu nánigu jamá. 33Ja ayéedagutiña náu jagíbugiñe gürígia, nayéedaguba gíñe jáu ligíbugiñe Nóguchi Búngiu le siélubei.

Le busénbei lun lafálaruni Jesúsu
(Lc. 12.51-53, 14.26-27)

³⁴‘Marítagua jumátia luágu niábiña lan lúnrigü níchugun gáluma uboúagu, máma niábiña íchiga gáluma, niábiña íchiga wuríbu. ³⁵Láu niábin, jafánreinraguba ja mafínebaña nuágu jáma ja afínebaña nuágu, lawúribujaba wügúri lúma lúguchi, isáani túma tóguchu, ídiñu túma tágürü, ³⁶lagáganiraguba cáda ában jáma lidújeñu.

³⁷‘Le jínsiñejabuti lun lúguchi o lúguchu sügú láu nísíne lun, madúna lumúti nánigu lan, le jínsiñejabuti joun lirájünü sügú láu nísíne lun, madúna lumúti gíne nánigu lan. ³⁸Le mawándunti asúfuriruni líbe lasúfurirúniwa luágu gurúwa lun lafálarunina, madúna lumúti nánigu lan. ³⁹Le busénbei leséfuragun lúngua ya uboúagu leféridirubei íbágari le magúmuchadibei siélu, ánjein le ánjabei leféridiragun lúngua ya uboúagu nueígiñe, libjubei íbágari magúmuchaditi siélu.

Ja lúnbaña jerésibiruni jafáyeiruaaja lúmagiñe Búngiu
(Mr. 9.41)

⁴⁰‘Le erésibirutün resíbi lumútina, le erésibirutina resíbi lumúti le oúnajabalina. ⁴¹Le erésibiruti ában proféta ladúga liábin láu líri Búngiu, lerésibirubei afáyeiruaaja le libjubei ában proféta, le erésibiruti ában wügúri buíti ladúga lubuídun, lerésibirubei afáyeiruaaja le lerésibirubei ában wügúri buíti. ⁴²Furúmieguarügü le íchuguti ában wéru dúna dilíti lun ában jádaangiñe únabugutiña ja ladúga nánigu jamá, libjuba lafáyeiruaaja lúmagiñe Búngiu.

Ja loúnajabaña Juan le abásteragüdjabei adímureja lúma Jesúsu
(Lc. 7.18-35)

11 ¹Dan le lásurunbei larínaguni Jesúsu le lúnbei jadúgüni láni disípulugu, ába lídin ñígiñe lun larúfudajan, apúrichija ligíame lídan buri fulásu geyégua láu ubúrugü le Capernaúm.

²Dan ligía, furísunruguñein Juan, ába lagáambun luágu sun le ladúgübei Crístu. ³Ába loúnajan biáma jádaangiñe láni disípulugu aríjei Jesúsu lun jálügüdüni itara.

—¿Amúrü Crístubei le lúnbei liábin ódi lúnti wagúrabajan ámu?

⁴Ába larínagun Jesúsu joun.

—Jéíba jarínageime le jaríjubei lúma le jagáambubei lun Juan.

⁵Jabájüdagúame lun luágu aríjaaña lan já meja maríjinbaña, eíbuga já meja meíbugunbaña, areídagua jagía já meja gawágubaña gumeín luágu jára, agáamba já meja magáambubaña, sará jagía jiláaña, apúrichijoúa luágu ugánu buíti le lánina asálbaruni joun gudémetiña. ⁶Áni fuleíseiwati le meféridirunbalin lafíñen nuágu.

⁷Dan le jóúdin, ába lagúmeserun Jesúsu adímureja joun gürígia luágu Juan, ába larínagun.

—¿Cásan jídinbei meja aríja lídan fulásu le mageírawati? ¿Ában wügúri le medéraaguagüdünti larítangun queísi ában mabúru le lánjingichun garábali? ⁸¿Anjein máma lubeí líña, ¿cáti jídinbei aríja? ¿Ában wügúri wéndeti ladáuragun? Subúsiti jun luágu ja lan wéndebaña adáüragun, tídaañanu lan jában urúeigu. ⁹¿Cáteiti jídinbei aríja? ¿Ában proféta? Ánja, ligía, áni ában wügúri weíriguti sügú láu ában proféta Juan. ¹⁰Ligía le uágubei taríñaga Lerérun Búngiu.

Noúnajañein noúnagüle bubáragiñe,
lun laráansejani úma bubá.

¹¹Ninárün jáu, jádan sun gürígia, úagili ni ában weíriguti lueí Juan le abásteragüdjabei, láu sun líra, le únabutimaabei lídan arúejiani le siélubei weíritimaati lueí le anúgarügübalin ugánu luágu arúejiani ligía.

¹²‘Lúmagiñe dan le liábinbei Juan le abásteragüdjabei darí lúmoun dan le, murúgu jáña gürígia áluga jebélurun lídoun larúejian Búngiu. Ja ebélurubaña, ragú jamuti jabára ñi queísi ában cátei le gebégiti sarágu.

¹³Lilírudun Moisés jáma sun profétagu, adímurejatiñá meja luágu larúejian Búngiu, láu liábin Juan, ába lagúmeserun jerérun profétagu jagía luágu larúejian Búngiu agúnfulira. ¹⁴Ánjeinti busén jubeí jafíñerun, Juan ligía proféta Elías lé meja lúnbei liábin lubáragiñe liábin arúejiani ligía. ¹⁵Ja garígeirugubaña lun jagáambun, agáamba jamá.

¹⁶¿Cábasan úma núaradaguágüdaña gürígia ja lánina dan le? Magúndaatiña ni ca áu, ítara jáña quei irájüñü ja añúurubaña adíbirija mágidirugu, ába jagúarajan joun jíbirigu ítara. ¹⁷“Íñaajatiwa fídu jun, mabínajantün, erémuja wagía urému jírutu jun, mayájuntün.” ¹⁸Ladúga liábin Juan meígin líña buídu quei leígin furúmieguariügü, mátun, ába jaríñagun luágu njein lan espíritu wuríbati lídan. ¹⁹Lárigiñe, ába niábin, áu le Wügúri Garaúwarügüti, jou áu quei leígin furúmieguariügü, gurá, ába jaríñagun luágu geígadi nan, gátadi, jamáda áu gafígountiña jáma agúburajatiña liseínsuna gumádi. Wel, ja chúbana áu, subúdi jamúti luágu buídu lan le ladúgübei Búngiu láu lichú láu.

Lílana buri fulásu ja magáambadibaña

(Lc. 10.13-15)

²⁰Ábati lagúmeserun Jesúsu adeíña joun gürígia lídan fulásu buri le ñi lubeí meja ladúgei líbe-ágei láni miláguru, ladúga masáansirun jamágili lan jóuserun. Ába laríñagun.

²¹—¡Fugiábu jugúya Corazínna! ¡Fugiábu jugúya Betsáidana! Lun jamúga lídan lan ubúru le gríbei Tíro luma Sidón ladúguíwa miláguru buri le adügúbei jagánagua, binárü jamúga lasáansiragua jagáburí lílana, ába jamúga jarúfuduni láu jadáuragun kúdu luma balígi. ²²Naríñajare jun luágu dánme lan lachúlürün wéyu lánina agúseraguni, weíritimaabei jabeichún sügú jáu ja Tírobaña jáma ja Sidónbaña. ²³Amúrüti ubúru le Capernaúm, ¿jarítaguatibu luágu weírigubadibu lan queísi siélu? Maweírigúnbadibu ítara quei maweírigun lan máfiougati. Ladúga

lun jamúga lídan lan ubúruugu Sodóma ladúgúíwa miláguru le adúgúíbei bídan, njeingua jamúga fulásu ligía lúmoun dan le. ²⁴Naríñajare jun luágu lídan lánme wéyu lánina agúseraguni, weíritimaabei jabeichún sügú jáu Sodómana.

Jigoúgu lun Jesúsu, eméraagua jumámuga

(Lc. 10.21-22)

²⁵Lídan dan ligía, ába laríñagun Jesúsu lun Búngiu.

—Adímurejatina buíti buágu, Nóguchi le Labúremebei siélu lúma uboú, ladúga barámuduni buri cátei le jaweí chu táu jáma gunfaráandatiña, ába barúfuduni joun ja mafúnrendeirungiñábaña queísi irájüñü. ²⁶Ánja, Nóguchi, ladúga ítara líña lan babúseeruni.

²⁷Derége láali Nóguchi sun cátei nun. Ibídiñeti Búngiu Irájü ni ca un buídu buídu lueídügüya lun Búngiu Úguchili, ibídiñeti gñe Búngiu Úguchili ni ca un buídu buídu lueídügüya lun Búngiu Irájü jáma ja únbaña labúseera Búngiu Irájü lasúbudiragüdüni. ²⁸Jigoúgu númoun, sun jugúya ja bucháañabaña uágu lárígi juwádígimari lúma lijürü janúgün, eméraaguagüda námugaün. ²⁹Resíbi jumeí narúfudajan, furéndeí jugúyame númagine, láu gagúraasun nan, ñulú tugúya nanígi, ábame jadárirun eméraaguni tun juwáni. ³⁰Ménreengunti lun jesériwidun nun, juáliti gñe anúgüni le níchugubei jun lun janúgüni.

Játünjan disípulugu türígu lídan wéyu le eméraaguagülei

(Mr. 2.23-28, Lc. 6.1-5)

12 ¹Luágu ában wéyu le eméraaguagülei efbugeina líña Jesúsu jáma láni disípulugu labádinagua nádü. Ába jalámachun láni disípulugu, ába játünjan lílewe türígu, ába jeígini líla. ²Dan le jaríjini fariséogu cátei le, ába jaríñagun lun Jesúsu.

—Añájatia báni disípulugu adúga wadágimanu le moún lumuti ladügün lídan wéyu le eméraaguagülei.

³Ába laríñagun joun.

—¿Malíjangidiün luágu lé meja ladúgübei Davíd luágu ában dan, dan le lálámachunbei, ligía jáma ja úarabaña lúma? ⁴Ába lebélorun tídoun lúban Búngiu, ába leígin tídaangiñe fein to sagraúboun to moun luboún yebe leíginun, ni ligía ni ja úarabaña lúma, fádírígu rügúñanu lun jeíginun fein tugúya según lilúrúdu Moisés, áni mámati figoú le ladúgübei Davíd ligíbugiñe Búngiu. ⁵¿Ódi malíjangidiün lídan lilúrúdu Moisés luágu ñadágimein jamá fádírígu tídan lúban Búngiu lídan wéyu le eméraaguagülei áni máma figoú? ⁶Naríñajare jun luágu njein lan ában weíriguti sügú táu lúban Búngiu ya, áu. ⁷Jugúya, úagili gunfaráanda jumáni le laríñagubei Búngiu tídan Lerérún. “Jímein numúti lun gudémejabu jumá sügú láu jadágaragüdün anímaalu nun.” Lun jamúga gunfaráanda jumáni, madímurejaantün jamúga wuríbati jawágu gürígia ja madúgünbaña ni cáta wuríbati. ⁸Gabáfutina gñe, áu le Wügúri Garaúwarügüti, lun naríñagun cába lan gayára ladúgüniwa lídan wéyu le eméraaguagülei.

Wügúri le jiláalibei ában lújabu

(Mr. 3.1-6, Lc. 6.6-11)

⁹Ába lídin Jesúsu nígiñe, ába lebélorun tídoun jalígílisin juríu. ¹⁰Ñíñein ában wügúri jiláli ában lújabu, queíti busén jamá fariséogu jáma arúfudajatiña lilúrudun Moisés jadárirun lichára Jesúsu, ába jaríñagun lun.

—¿Gayáraatísan lagáranijoún lun ában sánditi lídan wéyu le eméraaguagülei?

¹¹Ába laríñagun Jesúsu joun.

—¿Ca jídaangiñe, ánjein galúgün lubeí ában mudún, ába teíguadun lídoun ában wélu wéyu le eméraaguagülei, lun mídinbei lan aságaroun?

¹²¡Ma gebégitimaati ában wügúri sùgú táu ában mudún! Gayáraati lubeíti ladúgün buíti lídan wéyu le eméraaguagülei.

¹³Ába laríñagun lun wügúri ligía.

—Tulébei bújabu.

Dan le látuleruni, ába lareídagun quei le ában. ¹⁴Ába jáfuridunga fariséogu, ába jagúmeserun áluaja ída lúba lan jáfaruni Jesúsu jilágubei.

Lé meja laríñagubei Isaías luágu Jesúsu

¹⁵Dan lasúbudirunbalin Jesúsu cátei le, ába lídin nígiñe, ába jafálaruni sarágu gürígia, ába lareídaguagüdüniña sun sánditiña. ¹⁶Ábaja laríñagun joun lun maríñagun jamáni cáteiñein lan. ¹⁷Lasúseredunbei líra lun lagúnfulirun lé meja laríñagubei proféta Isaías.

¹⁸Niján numútun le nanúadirubei lun lesériwidun nun, le jínsiñebei nun, le áubei nagúndaara, líña Búngiu.

Níchugubei náni Espíritu luágu,

ábame larúfudajani joun ja mámabaña juríu ída lúba lan gayára lan júaradun nigíbugiñe.

¹⁹Mageíndagunbei, magúaragun, mareínjabei úmada.

²⁰Gudémejabubei joun gürígia ja gudémebaña queísi ában mabúru le barúguaali, lúma joun ja débilibaña lídan jafíñen queísi ában lámpu le ñegúmemeeli.

Ítara méme lúba daríme adúga láali larúeijan le úraguabei.

²¹Ábame jíchuguni ja mámabaña juríu jeménigi luágu.

Laríñawagún luágu lubáfu lan Máfia lúmabei Jesúsu

(Mr. 3.19-30, Lc. 11.14-23, 12.10)

²²Ábati lanügúniwa ában wügúri lun Jesúsu, maríjin líña, madímurejan, láuñein ában espíritu wuríbati. Ába laságaruni Jesúsu espíritu wuríbati lídaangiñe, ába laríjin, adímureja ligía. ²³Ába laweíridun janígi sun ja níbaña, ába jaríñagun.

—¿Niján funásan ladúgawagunbei Davíd?

²⁴Dan le jagáambunbalin fariséogu cátei le, ába jaríñagun.

—Wügüri le, láu lubáfu Beelzebú, le Máfia, le jábuti espíritugu wuríbatíña laságajaña.

²⁵Quei subúdi láani Jesúsu le jarítagubei, ába laríñagun joun.

—Furúmieguarügü arúejani le afánreinraguti lun jageíndagun jámagua, lagúnrinchaguba, ánjaña gíñe afáreinragua lílana ában ubúrugú o ában lan família ladúga wuríbu, siñábei jadúrarun.

²⁶Ítara líña giñéti, ánjein laságara Máfia máfia guánarügü, ligía guánarügü afánreinragubei, áni ¿ída lubáti ladúrarun lubáfu ítara?

²⁷Jugúya, aríñagatün luágu láu lan lubáfu Beelzebú, o Máfia, naságaja espíritugu wuríbatíña, ánjein ítara líña lubei, ¿cáti íchugubei ubáfu joun ja jánigu jugúya lun jaságajaniña, Máfia ódi Búngiu? Jagía guánarügü arúfuda jamúti luágu bulfeigua jumá. ²⁸Áu, láu lubáfu láni Búngiu Espiritu naságaja espíritugu wuríbatíña. Arúfuda lumúti líra luágu chúlújali lan larúejan Búngiu jídon.

²⁹¿Ída lubági gayára lan lebélurun ában gürígia lúbiñoun ában wügüri jéreti lun lanúgüni lílagu ánjein magúragun lan furúmiñe? Ítara rügüñein lun gayára lan lanúgüni lílagu.

³⁰Le mámabei númagiñe, náганиñein, le míderagun lumútina, güríngua lumúti le nadúgubei.

³¹Jugúya aríñagatün luágu láu lan lubáfu Máfia naságaja espíritugu wuríbatíña, áni láu lubáfu Sífiri Sándu naságajaña. Ligía naríñagunbei jun luágu gayára lan ferúdunawa lan sun figoú kuma sun wuríbati le jaríñagubei gürígia, ánjein lun jadímurejan wuríbati luágu Sífiri Sándu, siñábei ferúdunawa lan figoú líra. ³²Furúmieguarügü gíñe le aríñaguti furúmieguarügü cátei wuríbati nuágu, áu le Wügüri Garaúwarügüti, gayáraati ferúdunawa lan, ánjeinti le adímurejati wuríbati luágu lubáfu Sífiri Sándu le nídaanbei, úabei ferúdunawa lan ni lídan uboú le, ni lídan le ában.

Luágu lin ídibu lasúbudirúa ca lan luwúyeribei

(Lc. 6.43-45)

³³Ánjein buídu lubei ídibu, buídubei gíñe lin, ánjein mabuídun lubei ídibu, mabuídunbei gíñe lin. Luágu lin ídibu lasúbudirúa ca lan luwúyeribei.

³⁴¡Jarásan jéwe jugúya le! Siñáti jadímurejan cátei buíti, wuríbatüangan. Cátei le buínbei tídan anígi, ligía laríñagubei iyúmaü. ³⁵Wügüri le buídubei, cátei buíti laríñagubei ladúga tídaañein lan lanígi ubuíduni, wügüri le wuríbabei, cátei wuríbati laríñagubei ladúga tídaañein lanígi wuríbani. ³⁶Naríñajare jun luágu dánme lan lachúlürün luwéyuri agúseruni, sun gürígia geféenbaña luágu sun dimúrei málati le jaríñagubei, ³⁷ladúga luáguba le baríñagubei bagúseragüdüwa, ligíaba arúfudei ánjein gadúnrun bubei lúmoun madúnrun ban.

Jamúriajan güirígia wuríbatíña seíni láuti miláguru

(Mr. 8.12, Lc. 11.29-32)

³⁸Ába jaríñagun jádaangiñe fariséogu jáma arúfudajatiña lilúrudun Moisés lun Jesúsu.

—Maésturu, buséntiwa waríjin badúgün ában seíni le láuti miláguru luágu lúmagiñe lan Búngiu biábin.

³⁹Ába laríñagun Jesúsu joun.

—Güirígia wuríbatíña áni magúnfuliruntiña amúriajatiña seíni láuti miláguru, míchugúnbei ámu seíni joun luei le asúseredubei lun proféta Jonás. ⁴⁰Ladúga queí leréderun Jonás úríwa wéyu úríwa árie bu lurágeirugu údu, ítara lúba gíñe neréderun, áu le Wügúri Garaúwartügüti, lídan numúaja úríwa wéyu, úríwa árie bu, según ligáburi jabájüdüni jurfu dan.

⁴¹Já meja aganoúbaña Nínive jásaaruba lídan luwéyuri agúseruni dánme jagúseragüdúniwa güirígia ja lánina dan le, ábame jíchugun jadúnrun ladúga sáansiguati jagáburi Nínivena dan le lapúrichijanbalin Jonás lugánute Búngiu joun, áni anája áu, ában weíriguti sügú láu Jonás, áni májatün jagáambunina.

⁴²Tásaaruba gíñe lurúeitena Súru lídan luwéyuri agúseruni dánme le jagúseragüdúniwa güirígia ja lánina dan le, ábame tíchugun jadúnrun, ladúga ñübintu lídaangiñe lidíse-ágei uboú lun tagáambuni lichú láu Salomón, áni anája áu, ában weíriguti sügú láu Salomón, áni májatün jagáambunina.

Espíritu wuríbati le agíribuduti

(Lc. 11.24-26)

⁴³‘Dan le láfuridun ában espíritu wuríbati lídaangiñe ában güirígia, ába eíbugañaja lan lídan fulásu mábeiti áluaja leméraagun, dan madári láani, ába laríñagun lúnguarügü. ⁴⁴“Nagíribuda tídoun núban to ñígíñe lubeí náfurida.” Dan le lagíribudun, ába ladáriruni güirígia buga ligía queísi ában muna to málatu, abuídajouáaru, aráanserúa. ⁴⁵Ábati lídin, ába liábin jáu sédü espíritugu wuríbatimaatiña sügú láu, ába jebélurun sun jagía agánawa lídan güirígia ligía, wuríbatimájaliti le gádaanbalin sügú láu meja furúmiñe. Ítara lúba giñéti lasúseredun joun güirígia wuríbatíña ja lánina dan le.

Lúguchu Jesúsu jáma lamúlen

(Mr. 3.31-35, Lc. 8.19-21)

⁴⁶Ñígili Jesúsu adímureja joun güirígia, ligía tiábin lúguchu jáu lamúlen. Ába jeréderun boúgudi, buséntiña yébe jadímurejan luma.

⁴⁷Ába laríñawagún lun Jesúsu.

—Nuján bíguchu jáma bamúlen ya boúgudi, buséntiña jadímurejan búma.

⁴⁸Ába laríñagun Jesúsu lun le awísarubalin.

—¿Ca nóguchuboun, ca namúlenubaña?

⁴⁹Ába larúfudun jawágun láni disípulugu, ába laríñagun.

—Añája nóguchubaña, jagía gíne namúlenubaña, ⁵⁰ladúga furúmieguaügüi le adúgüti lugúndan Nóguchi le siélubei, ligía namúlenbei, nítu, nóguchu.

Jémpulu luáguti ábunaguti

(Mr. 4.1-9, Lc. 8.4-8)

13 ¹Wéyu ligía, ába láfuridun Jesúsu múnadagiñe, ába lañúurun láru dúna. ²Quei jagíbedagun güri-gia le ní lubei, ába ládinun tídoun ában ugúnein, ába lañúurun, ába jeréderun sun güri-gia láru dúna. ³Ába larúfudajan sarágu cátei joun láu jémpulu, ába laríñagun.

—Níñein ában ábunaguti, ába láfuridun ábunagua. ⁴Lídan afúrujeina láani líla nádü, ába láburujan lídaangiñe luágun úma, ába jayábin dunúru, ába jeígini. ⁵Líbiri, ába láburujan labádinaguoún dúbü le ní lumuti úa lan sarágu múa, ába laboúchun furése ladúga majúlilin lan múa. ⁶Dan le lásüdün wéyu, ába lásäürün quefti málagüile lan, ába loúnwen. ⁷Líbiri ílaü, ába láburujan labádinaguoún jíyu, ába laweínamudun jíyu úara lúma, ába láfaruni. ⁸Níñein lídaangiñe, áburujati lídoun múa bufti, alúbajoúati buídu, níjein lídaangiñe, íchuguti san águu luágu cáda ában águu, líbiri rúti úrüwa-wein, líbiri darándi. ⁹Jugúya le garígeirugubei lun jagáambun, agáamba jumána.

Ca lan laníchigubei jémpulu le

(Mr. 4.10-12, Lc. 8.9-10)

¹⁰Ábati jayábin disípulugu, ába jaríñagun lun Jesúsu.

—¿Cásan uágu badímureja joun güri-gia láu jémpulu?

¹¹Ába laríñagun joun.

—Jugúya, subúdigüda láali Búngiu sun cátei arámudaguati le lánina larúeijan jun, ánjein jagía, siñáti jasúbudiruni. ¹²Le agúnfuliruti lúma inárüni le lagáambubei, líchugúba lánwoun lun, ánjein le maténirunti lun, gidáwarügübei murúsun larúgounga le lúmabei lueí. ¹³Ligía nadímurejanbei joun láu jémpulu ladúga aríja jamáni le nadúgübei, ába jeréderun camá maríjintiña, agáamba jameí le naríñagubei, ába jeréderun úaga gunfaráanda jamá camá jamuga magáambuntiña.

¹⁴Jawágu lagúnfulira lé meja laríñagubei proféta Isaías dan laríñagunbei.

Jugúya, jagáambuba, úabei gunfaráanda jumá,
jaríjuba, ibídiñebei jun ca lan lílabei le jaríjubei,

¹⁵ladúga deréeru janígi,
wuríbaaliti jagáambun,
murúñu líña jágu,
lun maríjin jumá láu,
magáambun láu jarígeirugu,
úa gunfaráanda jumá táu janígi,
magáraragun jugúyame nun lun nareídaguagüdünün.

¹⁶‘Anjeinti jugúya le nánigubei, fuleíseiwatün ladúga aríjatiin láu jágu, agáamba jugúya láu jarígeirugu. ¹⁷Ninárün jáu, sarágu jańá meja profétagu jáma ámu gürígia gúnfulitińa lúma Búngiu abúseerutińa jamúga jaríjinina quei jaríjinina jugúya guetó, maríjin jamútina, buséntińa jamúga meja jagáambuni le jagáambubei jugúya, magáambun jamúti.

Lafúnraanguagüdüni Jesúsu jémpulu luáguti ábunaguti

(Mr. 4.13-20, Lc. 8.11-15)

¹⁸‘Agáamba jumeíti le lílabei jémpulu luáguti ábunaguti. ¹⁹Ja agáambubalin ugánu luáguti arúejani le lánina siélu áni úati gunfaráanda jamáni, ítara jáńa quei úma le ídounbei láburuja lídaangińe líla nádü, ába líabin Máfia, ába laságaruni ugánu buíti le ábunúbei tídaangińe janígi. ²⁰Dúbü le nńjin lubeí láburuja ílaü, ítara líńa quei gürígia ja agáambubalin ugánu, ába jerésibiruni láu ugúndani, ²¹quei márügüdün lubeí buídu tídan janígi, madúrati jádan. Dánti le lachúlürün dan lun jóuchawagún lúma jeíbaajoún lueígińe ugánu ligía, ába leíguadun jarúna. ²²Jíyu le nńjin lubeí láburuja ílaü, ítara líńa quei gürígia ja agáambubalin ugánu, weíritimaati jafúudun luágu cátei le lánina ibágari le, ába leyéedunińa irísini. Sun le, ába láfaruni ugánu tídaangińe janígi, mígiruntiti lun lalúbajoún jádan gürígia jagía. ²³Múa buíti le nńjin lubeí láburuja ílaü, ítara líńa quei gürígia ja agáambubalin ugánu, ába gunfaráanda jamáni, ába jíchugun ában alúbajoúni buíti. Ańájein, ítara jáńa quei ílaü le íchugubei san águu luágu ában, jíbiri quei le íchugubei úrúwa-wein, jíbiri quei le íchugubei darándi.

Jémpulu luáguti jíduru wuríbati labádinagua türígu

²⁴Ábaya líchuguni Jesúsu jémpulu le joun.

—Arúejani le lánina siélu, ítara líńa quei ában wügúri le ábunagubei ílaü buíti lídan lufúlasun, ²⁵dan ańája lan sun ja nńbańa arúmuga, ába lebéłurun ában lágani labúreme fulásu ligía, ába lábunun jíduru wuríbati labádinagua türígu, ába lídin. ²⁶Dan le laweínamudun türígu ába legélewejan, ába gíńe lachúlaagun jíduru wuríbati. ²⁷Ába jóúdin músu, ába jaríńagun lun jayúbudiri. “Wayúbudiri, áńjein buídu lubeí ílaü le bábunagubei bumúanrugu, ¿jalíagińésan lasálira jíduru wuríbati le?” ²⁸Ába laríńagun iyúbudiri joun. “Ladúga ában ágani le.” Ábati jaríńagun músu lun. “¿Buséntibu lun wájulajani jíduru wuríbati le?” ²⁹Ába laríńagun joun. “Uá, ladúga dánme jájulajani jíduru wuríbati, julá jíńein lin gíńe türígu úara lúma. ³⁰Ígiragubei jumeí lun laweínamudun úara daríme lidáani alúbajani, ábame naríńagun joun ñadágimeintińa lun jájulajani jíduru wuríbati furúmińe, ábame jagúraguni lun lágudúniwa, lárigińeme, ábame jareíduni türígu tídan lágei.”

Jémpulu luáguti tíla mostása

(Mr. 4.30-32, Lc. 13.18-19)

³¹Rúlumuti gíñe Jesúsu jémpulu le joun.

—Ítara líña arúejani lánina siélu quei ában tíla mostása le lábunubei ában wügúri lufúlasunrugu. ³²Tíla mostása, ligía ílaü ñúraütimaabei lídaangiñe sun ílaü, áni dan labouchun, ligía weíritimaabei lídaangiñe sun nádü, ába liábin lun ábanbei lan wéwe weíriti darí lun jayábin dunúru adúga jádibu luágu lílímun.

Jémpulu luáguti ísi

(Lc. 13.20-21)

³³Rúlumuti gíñe jémpulu le joun.

—Ítara líña arúejani le lánina siélu quei ísi le tagúbudubei ában wúri tídan úrüwa líburu fulúwaaru, ába terésirun sun fulúwaaru tugúya.

Ca lan lébunabei líchuguni Jesúsu jémpulu buri le

(Mr. 4.33-34)

³⁴Láu jémpulu laríñagei Jesúsu sun cátei le joun gürígia, maríñagunti ni cáta joun mayúsurunga jémpulu. ³⁵Sun cátei le, lun lagúnfulirun le laríñagubei meja Búngiu liyúmulugugiñe proféta.

Nadímurejaba láu jémpulu jun,

nafúnraanguagüdubei cátei lé buri meja arámudaguabei jun
lúmagiñe nadúgüni uboú.

Lafúnraanguagüdüni Jesúsu jémpulu le luáguti

jíduru wuríbati labádinagua türígu

³⁶Ába loúnajaniña Jesúsu gürígia jábiñoun, ába lebélorun múnadoun, ába jayábin láni díspulugu, ába jaríñagun lun.

—Furáanguagüdabeí jémpulu le luáguti jíduru wuríbati woun.

³⁷Ába laríñagun Jesúsu joun.

—Áu le Wügúri Garaúwarügüti, áu le ábunagubalin ílaü buíti, ³⁸múa, ligía uboúbei, ílaü buíti, jagía gürígia ja lílana larúejan Búngiu, jíduru wuríbati, jagía gürígia ja lánigu Máfia, ³⁹áganiti le ábunubalin jíduru wuríbati, Máfia méme, alúbajani, ligía lagúmunchunbei uboú, ja alúbajabaña, ánjeligu. ⁴⁰Ítara quei labúdajouíniwa jíduru wuríbati ába lágurún wáturugun lun lágudun, ítara lúba gíñe lasúseredun dánme lagúmunchun uboú, ⁴¹áu le Wügúri Garaúwarügüti, nouñajabaña náni ánjeligu aságaraña sun ja afigoungüdübaña ámu, jáma ja adúgübaña wuríbati, lídaangiñe narúejan, ⁴²ábame jácharaguniña lídoun wátu geméti lánina máfiougati. Ábame jayájuajan ñi, ábame lacúnrinjan jári. ⁴³Jámeti adúgübalin le lubefbei Búngiu, ábame jámiridun quei wéyu lídan larúejan Wáguchi Búngiu. Agáamba jumána, jugúya le garígeirugubei lun jagáambun.

Jémpulu luáguti irisini le arámudúañubei

⁴⁴Ítara líña arúejani le lánina siélu quei irisini le arámudúañubei lábugiñe múa. Ladárierei ában wügúri irisini ligía, ábaya larámuduni ñi méme, le luweírin lugúndan, ába lídin, ába lalúguruni sun le lúmabei, ába lagáñijani fulásu ligía.

Jémpulu luáguti pérla le weíribei ebégi

⁴⁵Ítara líña gíñe arúejani le lánina siélu quei ában alúgurajati le eíbugañajabei áluaja pérla finuti, ⁴⁶dánti ladárirun ában le weíríti lebégi, ába lídin, ába lalúguruni sun le lúmabei, ába lagáñijani pérla ligía.

Jémpulu tuáguti séni

⁴⁷Ítara líña gíñe arúejani le lánina siélu quei ában séni to agurúboun baránaja, ába tañúgun sun jawúyeri úduraü. ⁴⁸Dan tabuínchun, ába jacháwarunun esénijatiña lárún béya, ába jañúurun ñi anúadajaña úduraü, ába jareíduniña ja buídubaña, ába jachágaruniña ja wuríbabaña. ⁴⁹Ítara lúba dánme lagúmunchun uboú, jayábiba ánjeligu lun jafánreinruniña ja buídubaña jádaangiñe ja wuríbabaña. ⁵⁰Ábame jádaruniña ja wuríbabaña lídoun wátu geméti lánina máfiougati, ñíba lubeí jayájuaaja, acúnrijame jári.

Irisini buri iséri lúma binádu

⁵¹Ábati lálügüdüniña Jesúsu, laríñaga joun.

—¿Gunfaráanda jumútisan sun cátei le?

Ába jaríñagun.

—Ánja, Wabúreme.

⁵²Ábati laríñagun joun.

—Dan le liábin ában arúfudajati lilúrudun Moisés lun gunfaráanda láni luáguti arúejani le lánina siélu, ába ítara lan quei ában iyúbudiri le gaságaraditi cátei iséri buri lúma cátei binádu buri lídaangiñe lirísín lun líchuguni joun tílana lúban dan le jemégeiruni, queígubeirügü, gayáraati larúfudajan joun gürígia luágu lilúrudun Moisés lúma gíñe luágu cátei le narúfudajabei, áu le Jesúsu.

Jesúsu lídan fulásu le gíribei Nazarét

(Mr. 6.1-6, Lc. 4.16-30)

⁵³Dan lagúmunchunbei líchuguni Jesúsu jémpulu buri le, ába lídin nígiñe, ⁵⁴ába lachúlürün lageíroun. Ába lagúmeserun arúfudaja tídan jalígílisin juríu to lídaanboun fulásu ligía, ába laweíridun janígi gürígia, ába jaríñagun.

—¿Jalíasan lafúnrendeirei wügúri le sun lichú áu le? ¿Ída liñásan gayára láani miláguru buri le adúga? ⁵⁵Liraúga saráfangei le, María lúguchuboun, líbugaña Jacóbo, José, Simón lúma Júdas, ⁵⁶ya gíñe jagánawa lamúlenu jáma lítunu wádan. ¿Jalíagiñeti lasúbudirei sun le?

⁵⁷Ába jamájarun lun jerésibiruni. Ába laríñagun Jesúsu joun.
 —Sun gürígia jínsiñeti ában proféta joun, mámarügaali ligía
 lídaangiñeti fulásu le ñí jabeí o tílana lan jában.
⁵⁸Madúgüntiti sarágu miláguru ñi ladúga mafínen jamá luágu.

Loúnwen Juan le abásteragüdajabei

(Mr. 6.14-29, Lc. 9.7-9)

14 ¹Lídan dan ligía, ába lagáambun Heródes, le gumándan lídan fulásu
 le gíribei Galiléa, luágu Jesúsu, ²ába laríñagun joun ja lúmabaña.
 —Juan le abásteragüdajabei le, sará jádaangiñe jiláaña, ligía gabáfu
 lubeí lun ladáagun miláguru.

³Lé meja suséreelibeí, daúlumuti meja Heródes Juan, ába
 lagúraguágüdüni láu güringüri tueígiñe Heródias tó meja lúmari
 Felípe, le lamúlen. ⁴Aríñagaalí meja Juan lun Heródes luágu moun láni
 lagámaridunun lúmari lamúlen, madúgünti Heródes gásu láu.

⁵Busénti yebéti Heródes láfaruni Juan jilágubei, ladúga lanúfude
 jaweí gürígia, madúgun lumúti ladúga sun lan gürígia afíñetiña luágu
 proféta lan Juan. ⁶Dánti le efédujani luágu lagúnfulirun Heródes írúmu,
 ába tiábin tiraú Heródias, ába tabínajan jagíbugiñe amísurajoútiña,
 léti línsiñe tabínajan lun Heródes, ⁷ába laríñagun tun láu fiñún luágu
 líchugubei lan furúmieguarügü cátei le tamúriajan lúma tun. ⁸Ábati
 taríñagun tóguchu tun lun tamúriajani lábulugu Juan le abáste jilágubei,
 ladúga, lun jíchuguni tun lídan ában asíedu, ába tamúriajani lúma ítara.

⁹Ába lírudagun Heródes lueígiñe cátei le, quei aríñaga láali lan láu
 fiñún, agáamba jameí amísurajoútiña, ába laríñagun lun líchugúniwa
 tun. ¹⁰Ábati laríñagun lun ladúrürúniwa lábulugu Juan furísunrugu,
¹¹ába janúgüni lídan ában asíedu, ába líchugúniwa tun irájü tugúya, ába
 tíchuguni tun tóguchu.

¹²Ábati jayábin l-íñagun tun láu fiñún luágu lanigu Juan, ába janúgüni
 lúgubu, ába jábununi, lárigiñe, ába jóúdin awísarei Jesúsu.

Líchugun Jesúsu eígini joun seíngü mílu wügúriña

(Mr. 6.30-44, Lc. 9.10-17, Jn. 6.1-14)

¹³Dan lagáambuni Jesúsu cátei le, ába lídin nígiñe jáurügü láni disípulugu
 tídan ában ugúnein lídoun ában fulásu mageírawati. Ába jasúbudiruni
 gürígia, ába jáfuridun lídaangiñe buri aúdü, ába jóúdin lárigi, eíbu. ¹⁴Dan
 larárirun Jesúsu tídaangiñe ugúnein, ába laríjin luágu sarágu jaña lan gürígia
 jagía, ába jagúdemedagun lun, ába lareídaguagüdüniña ja sándibaña jádan.

¹⁵Queíti agúñedeinaali lubeí, ába jaríñagun láni Jesúsu disípulugu lun.

—Dárüjalitia áni úatiña gürígia aganoútiña lídan fulásu le. Oúnaja
 baña gürígia ja, ñúdün jamámuga lídoun buri lirájüñü fulásu yaráfa
 agáñija eígini lun jeígin.

¹⁶Ába laríñagun Jesúsu joun.

—Mídinbaña, rújuma eígini joun.

¹⁷Ába jaríñagun lun.

—Seíngü rügüñoun fein wáma ya, jáma bián úduraü.

¹⁸Ába laríñagun Jesúsu joun.

—Barújumoun nun ñájoun.

¹⁹Ába laríñagun joun güriquia lun jañúurun luágu jíduru. Ába lanúgünun seíngü fein jáma bián úduraü jagía lújaburugu, ába laríjin siélun, ába leteíngiruni Búngiu tuágu. Ábati lagúbachagunun fein, ába líchugunun joun láni irun Jesúsu tídaangiñe ugúneidisípulugu, ába jafánreinjanun jádan güriquia. ²⁰Sun jagía joútiña quimúle, lárigiñe, ába jabuínchagüdün dúusu faníñe táu to ígiragutu. ²¹Seíngüñanu mílu wügúriña eígitiña, mabájüdunga wúríña jáma irájüñü.

Leíbugun Jesúsu ligíbuagu dúna

(Mr. 6.45-52, Jn. 6.16-21)

²²Ába loúnajaniña Jesúsu láni disípulugu lubá tídan ugúnein tugúya lun jánjiñuragun loubáfurugun sun niján lan oúnajaña güriquia águyu. ²³Lásun loúnajaniña, ába lawefnrún lábua luágun wúbü ayúmuragua lun Búngiu. Dan le lagúñedunbei, ñíñein Jesúsu lábua, ²⁴sun núnguran tan ugúnein lamídan dúna. Ába láfarajan lugúdi barána tuágu ugúnein ladúga tubárouñein lan garábali. ²⁵Ába liábin Jesúsu jawágun lubá larúgan, eíbugeina ligíbuagu dúna. ²⁶Dan jaríjini láni disípulugu eíbugeina ligíbuagu dúna, ába janúfudedagun, ába jagúaragun láu anúfudei.

—¡Úfiaü!

²⁷Ába ladímurejan Jesúsu joun, ába laríñagun joun.

—¡Ragújuma anígi, áu le, manúfueda jumá!

²⁸Ába laríñagun Pédro lun.

—Nabúreme, ánjein amúrü lubeí, eíbugagüda bána gíñe ligíbuagu dúna chülú le ñí bubei.

²⁹Ába laríñagun Jesúsu lun.

—Jigábuti.

Ába larárirun Pédro tídaangiñe ugúnein, ába lagúmeserun eíbuga le ñíjin lubeí Jesúsu ligíbuagu dúna. ³⁰Dan le lasándiruni lére garábali ába lanúfudedagun, ába lagúmeserun abúlucha, ába lagúaragun.

—¡Séfu bána Nabúreme!

³¹Ába lárügüdüni Jesúsu lújabu, ába laríñagun lun.

—¡Louguati gíñe bafíñen! ¿Ca uágu lalóguada bafíñen?

³²Dan jádinun tídoun ugúnein, ába lagálumadun garábali. ³³Játi buga tídaanbaña ugúnein, ába jájuduragun ligíbugiñe Jesúsu, ába jaríñagun.

—Inárüni luágu Liraú ban Búngiu.

Lareídaguagüdüniña Jesúsu sánditiña Genésaret

(Mr. 6.53-56)

³⁴Ába jánjiñuraguni dúna, ába jachúlürün Genésaret. ³⁵Dan le jíchugunbei lílana fulásu fe luágu Jesúsu lan, ába jabúruchaguagüdüni lídan sun fulásu ligía, ába janügüniña sun sánditiña le ñjín lubei. ³⁶Ába jayúmuragun lun lun lígírun lúnrügi jagúuruni táru lanáangun, sun ja agúurubarun, areídaguátiña.

Cátei le marúmadagüdünbaliña gürígia ligíbugiñe Búngiu

(Mr. 7.1-23)

15 ¹Ába jayábin fiú fariséogu jáma arúfudajatiña lilúrudun Moisés, ñúbintiña ubúrugugiñe Jerusalén lúmoun Jesúsu, ába jaríñagun lun.

²—¿Ánsan jáalachagunbalin báni disípulugu binádu jagáburi weíyaaña mútu? Magúnfuliruntiña láu lachibúniwa újabu lubá eíginí, según wagáburi.

³Ába laríñagun Jesúsu joun.

—¿Ánti gíñe jáalachagunbalin lerérun Búngiu lun jafálaruni binádu jigáburi? ⁴Laríñajare Búngiu. “Inébe jamá bagúbürigu bun, le anábagubaliña lagúbürigu, jilála.” ⁵Ánjeinti jugúya, aríñagatün luágu gayára lan laríñagun ában gürígia lun lúguchi o tun lúguchu. “Siñáti níderagunibu ladúga sun le nómabei, aríñagaadina luágu lun lan níchuguni lun Búngiu”, ⁶luágu furúmieguarügü lan le aríñaguti ítara, mámaali lan lúnti líderaguniña lagúbürigu. Láu líra mebégigüda jumáli lagúmadijan Búngiu lun jafálaruni binádu jigáburi. ⁷¡Biángua tigíbu jugúya le! Linárün proféta Isaías laríñagunbei juágu ítara.

⁸Jayumárurügü gürígia ja jíchiga inébesei nun, líña Búngiu, ánjein tídan janígi, mebéresentiña náu.

⁹Málati jájuduragun nun,

ladúga le rügüñein jagúmadijan wügüriña jarúfudaja.

¹⁰Ábati lagúarun joun gürígia, ába laríñagun joun.

—Agáamba jumá, gunfaráanda jugúyame. ¹¹Máma eíginí le leígubei gürígia adügübalin lun marúman lan ligíbugiñe Búngiu, dimúrei wuríbati le laríñagubei wügüri, ligía adügübalin lun marúman lan.

¹²Ábati jayábin disípulugu lúmoun Jesúsu, ába jaríñagun lun.

—¿Subúditisan bun luángiu lun jafálaruni binádu jiggu wuríba lan lábúrujan dimúrei le baríñagubei joun fariséogu?

¹³Ába laríñagun joun.

—Furúmieguarügü nádü to máma lábunun Núguchi Búngiu le siélubei, lájulúba láu sun lílagüle. ¹⁴Ígira jumáña, maríjintiña ja adúndeja maríjintiña jáledi jagía. Áni ánjein adúndeja ában maríjinti ában maríjinti líledi, jeíguaduba biángubei jagía lídoun ában júyu.

¹⁵Ábati laríñagun Pédro lun Jesúsu.

—Furángugüdadeí jémpulu le woun.

¹⁶Ába larínagun Jesúsu.

—¿Úati gíne gunfaráanda jumá? ¹⁷¿Úati gunfaráanda jumá luágu sun lan le ebélurubei lídoun iyúmaü, ába lídin lídoun urágei, lárigiñe ába láfuridun lídaangiñe úgubu? ¹⁸Ánjein dimúrei le áfuridubei lídaangiñe iyúmaü, tídaangiñe anígi liábin, ligíati ádügübalin wügüri lun marúman lan ligíbugiñe Búngiu, ¹⁹ladúga tídaangiñe anígi láfurida samínaü wuríbati, áfarajani, adultériu, salúfuri, íweru, iyéeni, marásualugu. ²⁰Ligía buri cátei le adügübalin wügüri lun marúman lan, ánjeinti leigíniwa machibúnga újabu según jagáburu juríu marúmadagüdün lumúti ligíbugiñe Búngiu.

Ában wúri teréncha to afíneruboun luágu Jesúsu

(Mr. 7.24-30)

²¹Ába láfuridun Jesúsu nígiñe, ába lídin lídoun buri fulásu geyégua láu fulásu le Tíro lúma Sidón. ²²Níñoun ában wúri jádaangiñetu Cananítagu aganoúti lídan fulásu ligía, ába tiábin luágun Jesúsu agúarajeina.

—¡Nabúreme, ladúgawagun David, gudémená bun! Níjein ában espíritu wuríbati tuágu nisáani, weíriti tasúfurirun lurúma.

²³Moúnabun lumútu Jesúsu. Ábati jayábin disípulugu, ába jayúmuragun lun, ába jarínagun.

—Adúgabei le tamúriajabei búma, ladúga nuteíntia agúarajeina wárigi.

²⁴Ába larínagun Jesúsu.

—Joún rügúñein güriquia féridijaña ja Israelítagu loúnajana Búngiu lun níderaguniña.

²⁵Ába tiábin wúri tugúya, ába tájuduragun ligíbugiñe, ába tarínagun.

—¡Nabúreme, íderagua bána!

²⁶Ába larínagun Jesúsu tun.

—Lúnti níderaguniña numútuniña ja juríu furúmiñe, mabuídunti lun tagídarúniwa fein jaweí isáanigu lun tíchugúniwa joun oúnli.

²⁷Ába tarínagun.

—Ánja, Nabúreme, láu sun líra, gayáraati jeígini oúnli ífei le áburujati lueígiñe jadábulan jabúriña.

²⁸Ábati larínagun Jesúsu tun.

—Wúri, ¡weíriti gíne bafíñen! Susérelá le babúseerubei.

Lúmagiñe óra ligía, ába tareídagun tisáani.

Lareídagugüdün Jesúsu sarágu sánditiña

²⁹Ába láfuridun Jesúsu nígiñe, ába lachúlürün lárún dúna Galiléa, lárigiñe, ába laweínrun luágun ában wúbü, ába lañúurun ñi. ³⁰Ába jayábin sarágu güriquia le ñjín lubei barúina jagía meíbuguntiña, maríjintiña, maríñaguntiña, danímaati jarúna, jáma sarágu jawúyeri sánditiña. Ába jíchuguniña lubádu lugúdi Jesúsu, ába lareídagugüdüniña. ³¹Ába laweíridun janígi güriquia láu jaríjin adímurejaña jamá já meja maríñagadibaña, areídagua ja danímaabaña

arúina, eľbuga ja meľbuguñajabaña, aríja ja maríjiñajabaña. Ába jagúmeserun adímureja weírigo luágu Jabúngiute Israelítagu.

Líchugun Jesúsu eĩgini joun gádürü mílu wügúriña
(Mr. 8.1-10)

³²Ábati lagúarun Jesúsu joun láni disípulugu, ába laríñagun joun.
—Gudémetiña gürígia ja nun ladúga úruwaali wéyu jáu núma ya áni úaali ni cáta jáma lun jeĩgin. Mabúseeruntina nouñajaniña jábiñoun meĩginga, dagá líñein falálaü jawágu úmada.

³³Ábati jaríñagun láni disípulugu lun.
—¿Ída lubáti wadárirun eĩgini joun sarágu gürígia ya lídan fulásu le ñi lumuti úa jamá aganoútiña?

³⁴Ába lálügüdüniña Jesúsu.

—¿Átiriñoun fein júma?

Ába jaríñagun.

—Sédü, jáma biánraü úduraü.

³⁵Ába laríñagun joun gürígia lun jañúurun múarugu, ³⁶ába lanúgünun sädü fein jáma úduraü jagá lújaburugu, ába leteñgiruni Búngiu. Ába lagúbachagunun fein, ába líchugunun joun láni disípulugu jáu sun úduraü, ába jafánreinjanun joun gürígia. ³⁷Joútiña sungubei quimúle, buñgüda gñe sädü faníñe táu to ígiraguboun. ³⁸¡Gádürüñanu mílu wügúriña eĩgitiña, mabájüdunga würiña jáma irájüñü! ³⁹Lárigiñe, ába louñajaniña Jesúsu gürígia águyu, ába ládinun tídoun ugúñein, ába lídin louñawagun Mágdala.

Jamúriajan fariséogu jáma saduséogu ában seíni le láuti miláguru
(Mr. 8.11-13, Lc. 12.54-56)

16 ¹Ába joúdin fariséogu jáma saduséogu aríjei Jesúsu. Lun jáburugüdüni tídoun sádara, ába jaríñagun lun lun larúfudun ában seíni láuti miláguru le siélugiñeti joun, afíñe jamámuga luágu lúmagiñe lan Búngiu liábin. ²Ába laríñagun joun.

—Rábounwéyu, ába jaríñagun. “Buídubei dan ladúga funáti siélu.” ³Bináafin, ába jaríñagun. “Wuríbabei dan ugúñe ladúga funáñu líña siélu áni jamúñounga.” ¡Biángua tigíbu jugúya le! Subúditi luáguti ligáburi dan jun, áni ibídiñeti jun luágu chülújali lan lidáani asálbaruni. ⁴Gürígia wuríbatíña, múaraantiña ja, amúriajatiña seíni láuti miláguru lun jafíñerun luágu áu lan anúgübei asálbaruni joun gürígia. Wel, marúfudúnbei ámu seíni joun lueí liseíni Jonás.

Ába lígiruniña, ába lídin.

Ítara líña jarúfudajan fariséogu quei ísi
(Mr. 8.14-21)

⁵Dan le jájiñuragunbei disípulugu lúma Jesúsu loubáfurugun dúna, bulíei jamúti janúgün fein. ⁶Ábati laríñagun Jesúsu joun.

—Toúnigigua jumátia júngua lueí jísite fariséogu jáma saduséogu.

⁷Ába jagúmeserun disípulugu aríñaga jámagua.

—Ladúgattia manúgün wamá fein laríñagunbei ítara.

⁸Ába lasúbudiruni Jesúsu, ába laríñagun joun.

—¿Ca uágu jadíjerida luágu úa tan fein júma? ¡Loúguati gíñe jaffñen!

⁹¿Uágili gunfaráanda jumá, marítangun jugúya tuágu seíngü fein to nafánreinjaboun jádan seíngü mílu wügúriña lúma átiriñein lan faníñe táu ígiragutu? ¹⁰¿Bulfeiguatün funásan tuágu sédü fein to nafánreinjaboun jádan gádürü mílu wügúriña lúma átiriñein lan faníñe táu ígiragutu?

¹¹¿Ída liñági mefeén jubeí luágu máma lan tuágu fein nadímureja dan le naríñagunbei jun lun joúnigiragun júngua lueí jísite fariséogu jáma saduséogu?

¹²Ába gunfaráanda jamáni luágu máma lan luágu tísitena fein laríñaga joun, lueí lan arúfudajaní le jáni fariséogu jáma saduséogu lawéridiraña.

Laríñaguni Pédro luágu Jesúsu lan Crístubei

(Mr. 8.27-30, Lc. 9.18-21)

¹³Dan le lachúlürün Jesúsu ubúrgu Cesaréa le Filípo ába lálügüdüniña láni disípulugu.

—¿Cátanasan lídan jarítangun gürígia, áu le Wügúri Garaúwarügüti?

¹⁴Ába jaríñagun.

—Añájein aríñagutiña luágu Juan lan lé meja abásteragüdajabei amúrü, jíbiri aríñaga luágu Elías ban, añájeingua aríñagutiña luágu Jeremías ban o ámu lan proféta.

¹⁵Ábati laríñagun joun.

—Ánti jugúya, ¿cátanati lídan jarítangun?

¹⁶Ába laríñagun Simón Pédro lun.

—Crístu le Liraú Búngiu le wínwanbei amúrü, le ñúbinbei asálbaraña gürígia uboúagu.

¹⁷Ába laríñagun Jesúsu lun.

—Fuleiseiwatibu Simón, liraú Jonás, ladúga máma lasúbudirágüdün ni ába gürígia cátei le bun, lasúbudirágüdün Núguchi Búngiu le siélubei bun. ¹⁸Naríñajare bun luágu Pédro lan amúrü, líla íri ligía, “dúbü”, luáguba ébuu le nábunaguoun nilígílisin, áni ni íbini oúweni mabáfubei tuágu. ¹⁹Níchugubei ligélen arúejani le lánina siélu bun, le cátei le uáguti baríñaga luágu moun lan jadúgüni affñetiña, ligía gíñe uágubei laríñaga Búngiu luágu siñá lan ladügúniwa, le cátei le uáguti baríñaga luágu gayára lan ladügúniwa, ligía gíñe le uágubei laríñaga Búngiu luágu gayára lan ladügúniwa.

²⁰Ábati laríñagun Jesúsu joun láni disípulugu lun maríñagun jamá ni ca un luágu ligía lan Crístubei.

Ladímurejan Jesúsu luágu loúnwen

(Mr. 8.31-9.1, Lc. 9.22-27)

²¹Lúmagiñe dan ligía, ába lagúmeserun Jesúsu aríñaga joun láni disípulugu furáangu luágu lúnti lan lídin Jerusalén, luágu gíñe jasúfuriragüdübei lan wügúriña weírigutiña lídan jafínen juríu, jáma jábutigu jafádirigun juríu, jáma arúfudajatiña lilúrudun Moisés. Aríñagati joun luágu láfarúba lan jilágubei, áni lásaaruba lan luágu lúrüwan wéyu. ²²Ába ladíñurun Pédro láu Jesúsu nígiñe murúsun, ába laríñagun lun táu sun lanígi.

—¡Mabúseeraleí Búngiu líra, Nabúreme! ¡Siñáti lasúseredun cátei le bun!

²³Ába lagáraragun Jesúsu, ába laríñagun lun Pédro.

—¡Dísebá nueí, Máfia! Babúseerúña beréderuni ladügúniwa lugúndan Búngiu. Masáminaruntibu quei Búngiu, basáminarun quei wügúri.

²⁴Ábati laríñagun Jesúsu joun láni disípulugu.

—Le busénti lafálarunina, bulíleleí cáteinein lan, awándaleí sun luwúyeri asúfuriruni le lúnbei liábin lun nueígiñe queísi lanúgúni ában wügúri lugúruwan, falálana. ²⁵Ladúga le abúseeruti leséfuragun lúngua ya uboúagu lefériidirubei ibágari le magúmuchaditi, ánjein le ánjabei lefériidiruni libágari ya uboúagu nueígiñe, libíjubei ibágari le magúmuchaditi siélu. ²⁶¿Cági ju lan lun gürígia lagáñeiruni sun le lánina uboú le, lefériidireime lubára siélu? Úati ni cáta lánina uboú le áuti gayára lan lagáñijan gürígia ubáraü siélu. ²⁷Nagíribuduba, áu le Wügúri Garaúwarügüti, úara jáma náni ánjeligu, niábinba láu uweíriguni le meme láni Nüguchi. Ábameti nafáyeiruniña gürígia quei ligáburi le adúga jamáalibei. ²⁸Ninárün jáu luágu añájein lan jádaangiñe ja yábaña guetó, moúnwenbaña daríme jaríjini liábin narúeijan, áu le Wügúri Garaúwarügüti.

Lámuñedagun larijín Jesúsu

(Mr. 9.2-13, Lc. 9.28-36)

17 ¹Sísi wéyu lárigiñe, ába lanúgúniña Jesúsu Pédro, Jacóbo, lúma Juan le lamúlen Jacóbo, ába lídin jáu luágu ában wúbü íñuti, jagía rügúñanu ñi. ²Ába lámuñedagun larijín Jesúsu ñi jagíbugiñe, ába lámiridun ligíbu quei wéyu, ába tájarudun lanáangun quei larúgounga. ³Sódini ába jaríjini Moisés lúma Elías (já meja abágaridubaña lídan dan le sügújalibei) ayánuja lúma Jesúsu. ⁴Ába laríñagun Pédro lun Jesúsu.

—Nabúreme, ¡lídan dan awánja lan ya! Ánjabu busén, adúga wagíame úrüwa dibásein ya, ában bun, ában lun Moisés, ában lun Elías.

⁵Dan niján lan Pédro adímureja, ába liábin ában juánriñu miríti, ába loúburaguniña, ába lagaambúniwa ában umálali lídaangiñe juánriñu ligía le aríñagubei.

—Niján niraú le jínsiñebei nun, le aúbei oúnwenbun lan nugúndan, adúga jumeí le lubeíbei.

⁶Dan jagáambuni disípulugu, ába jabúluchagun láu jagíbu múarugu le luweírin janúfude. ⁷Ába liábin Jesúsu jawágun, ába lagúrurun jawágu, ába laríñagun joun.

—Sarájuma, manúfudeda jumá.

⁸Dan le jaríjinbei, maríjinjaña ámu lueídügü Jesúsu.

⁹Dan le arárireina jamáni wúbü, ába laríñagun Jesúsu joun.

—Mabájudagua jumeítia cátei le aríja jumáalibei lun ni ában daríme saráadina, áu le Wügúri Garaúwarügüti, lídaangiñe ouweni lúnya nabágaridun.

¹⁰Ábati jaríñagun disípulugu lun Jesúsu.

—Guetó subúdi wamáali luágu amúrü lan Crístubei. Quei ítara líña lubeí, ¿cáti uágu jaríñaga arúfudajatiña lilúrudun Moisés luágu lúnti lan liábin Elías lubáragiñe liábin Crístu?

¹¹Ába laríñagun Jesúsu joun.

—Inárüni luágu liábinba lan Elías, ábame líchugun sun cátei lídoun lubúdubu, ¹²áni naríñajare jun luágu ñúbinjali lan Elías, masúbudirun jamúti gürígia, adúgarügü jamúti sun le jabúseerubei láu. Ítara lúba gíñe jasúfuriragüdünina, áu le Wügúri Garaúwarügüti.

¹³Ábati jasúbudiruni disípulugu luágu Juan lan lé meja abásteragüdajabei, ligía lan Elíasbei le uágubei ladímureja Jesúsu.

Lareídagugüdün Jesúsu ában irájü goúwejaditi

(Mr. 9.14-29, Lc. 9.37-43)

¹⁴Dan le jachúlürünbei le ñíjin jabeí gürígia, ába liábin ában wügúri lúmoun Jesúsu, ába lájuduragun ligíbugiñe, ába laríñagun lun.

¹⁵—Nabúreme, gudémelá nísáani bun, goúwejaditi, weírititi lasúfurirun, níjein dan jeíguati wáturugun, níjein dan dúnarugun. ¹⁶Barú numuti ñájoun joun báni disípulugu, siñá jamuti areídagugüda.

¹⁷Ába loúnabun Jesúsu.

—¿Gürígia mafíñeraditiña, gürígia wuríbatíña! ¿Átiribeísan dan lun neréderuni júma lubá gayára lan jafíñerun nuágu? ¿Ídame lagúmucha mafíñeni le jídaanbei? Barújumei irájü ligía ñájoun.

¹⁸Ábati ladeíñan Jesúsu lun espíritu wuríbatí ligía, ába láfuridagüdüni lídaangiñe lúmagiñe óra ligía, ába lareídagun irájü le.

¹⁹Lárigiñe, ába jadímurejan disípulugu lúma Jesúsu jábugua, ába jálügüdüni.

—¿Cásan uágu siñá wabalin espíritu wuríbatí ligía aságara?

²⁰Ába laríñagun Jesúsu joun.

—Ladúga liloúguan jafíñen. Ninárün jáu luágu ánjein lan ibíja jubeí fe íbini núraüraü lan quei ában tágu mostása, jaríñaguba lun wúbü le. “Gidába yágiñe, beíba lídoun ámu fulásu”, ábame lagídarun wúbü ligía. Úabei ni cáta jásiñerun ánjein ibíja jubeí fe le tímatimaati. ²¹Ánjeinti jíbe espíritugu ja, láu rügúñein ayúmuraguni lun Búngiu lúma ayúnaruni gayára lan jaságarúniwa.

Ladímurejaanya Jesúsu luágu loúnwen
(Mr. 9.30-32, Lc. 9.43-45)

²²Dan le efbugeina jamá úara loúbawagu Galiléa, ába laríñagun Jesúsu joun luágu ledéregerúaba lan, ligía le Wügúri Garaúwarügüti, jájaburugun wügúriña wuríbatíña, ²³ábame jáfaruni jilágubei, áni lásaaruba lan lídaangiñe ouweni luágu lúrwun wéyu. Ába jírudagun sarágu dan le jagáambuni cátei le.

Lafáyeirúniwa tiseínsuna témpulu

²⁴Dan lachúlürün Jesúsu jáma láni disípulugu Capernaúm, ába jóúdin ja agúburajabalin tiseínsuna témpulu to Jerusalénboun lúmoun Pédro, ába jaríñagun lun.

—¿Mafáyeijantisan jumáesturun tiseínsuna témpulu?

²⁵Ába loúnabun Pédro, ába laríñagun lun.

—Afáyeijati.

Dánti lebéłurun Pédro múnadoun, ába lálügüdüni Jesúsu Pédro lubáragiñe gayára lan ladímurejan.

—¿Ída líña baríjin lun líra, Simón? ¿Cátaña jagúburajabaña urúeigu ja lánina ubou le, jásan lílana fulásu ódi ja teréncha?

²⁶Ába laríñagun Pédro lun.

—Ja teréncha.

Ába laríñagun Jesúsu lun.

—Játi lílana fulásu jáledi moún lumuti lubefti jafáyeijan, áu le Liraú Búngiu, moún lumuti nafáyeijan tiseínsuna lúban Núguchi. ²⁷Lun magáñidagüdün wamá ni ában, beíba, ábame bachúrunun bürünjüre dúnarugun, ábame badígini furúmiñeti úduraü le eígiti bun. Badáriruba ában seínsu liyúmulugu úduraü ligía, buídurügübei lun bafáyeijan wawougua láu, ábame bafáyeiruni.

¿Cáteisan weírigutimaabei lídan larúeijan Búngiu?
(Mr. 9.33-37, Lc. 9.46-48)

18 ¹Lídan dan ligía, ába jayábin disípulugu lúmoun Jesúsu, ába jáłügüdüni.

—¿Cáteisan weírigutimaabei lídan larúeijan Búngiu?

²Ába lanúgün Jesúsu ában irájü, ába líchuguni jamídan jámagua, ³ába laríñagun.

—Nínárün jáu luágu ánjaün lan mayábin lun jítaradun quei irájüñü, mebelubadün lídoun larúeijan Búngiu. ⁴Ítara líña lubefti, le ñúraüti lanáangun lúngua, ñúbin ligía lun ítarabei lan quei ában irájü, ligía weírigutimaabei lídan arúeijani le lánina siélu. ⁵Gürígia gíñe le erésibiruti ában irájü lídan níri resíbi lumútina gíñe.

Luríban lafígoungüdüniwa ában gürígia

(Mr. 9.42-48, Lc. 17.1-2)

6‘Furúmieguaugü le afígoungüdüti ában jádaangiñe ja isérigiñabaña lídan jafíñen nuágu, buítimaati jamúga lun lun lagurúniwa baránajóun láu ában oúnwenbun dúbü le amúligülei güráñu luágu ligíña sügü láu ladügüni cátei líra. 7¡Wuríbati lun ubou, níjein lán buri cátei le afígoungüdúbaliña gürígia! Súnwandan níbei lan, áni ¡fugíabu le wügüri le lébunabei!

8‘Ligía ánjein lubeí lafígoungüdúbadibu lubeí bújabu o bugúdi lan, dūrúbei, fíbei díse buáriua, buítimaati lun bebélurun siélun mājabuga o magúdiga, sügü láu badarún láu biángubei bújabu luma biángubei bugúdi máfiougatin le ní lubei wátu le méneguchadibei. 9Ánjein bágu lubeí afígoungüdúbadibu, sagábei, fíbei díse buáriua, buítimaati lun bebélurun siélun máguga sügü láu badarún láu biángubei bágu máfiougatin.

Jémpulu tuáguti mudún to eféridiruboun

(Lc. 15.3-7)

10‘Manúga jumá ni ában jádaangiñe ja únabugububaña ja quei ni cáta. Naríñajare jun luágu ligíbugiñeñanu lan Núguchi Búngiu le siélubei ánjeligu ja aríjubaña jáu afíñetiña ja súnwandan. 11Ladúga asálbarei le féridijalibei yebe níabin, áu le Wügüri Garaúwarügüti.

12‘¿Ída líña jaríjin lun? Ánjein añájein lubeí san mudún luma ában wügüri, teféridira ában jádaangiñe, ¿ma lígirubaña jíbiri luágu wúbü, ábame lídin áluajoun to ayúridaguboun? 13Ánjounti ladárra, choúruti luágu gúndaabei lan táu sügü jáu ja mayúridagunbaña. 14Ítara líña giñéti, mabúseerunti Júguchi Búngiu le siélubei lun leféridirun ni ában jádaangiñe únabugutiña ja.

Ligáburi ferúdunawa jamá idújeñu lueígiñe Jesucrístu

(Lc. 17.3)

15‘Ánjein adúga bidúje ában wuríbani bun, badímureja luma jábuguarügü, ábame basúbudiragüdüni lidúnrun lun. Ánjein adúga gásu báu, gamádaguayáadün. 16Ánjein madúgün gásu báu, ábame banúgün ában o bián gürígia jánwoun lun sun lan le aríñawagüti, añájein jamámuga ámu geféentiña luágu. 17Ánjein madúgün gásu jáu, ábame baríñaguni lun jadámurin afíñetiña, ánjein madúgün gásu láu adámurini, ábame banúgüni quei ában mafíñeti luágu Búngiu o quei lan ában agúburajati liseínsuna gumádi, gayára lámuga lasáansiruni luríban ligáburi.

18‘Nináriün jáu luágu le lan cátei le uáguti jaríñaga jugúya disípulugu luágu moun lan jadügüni afíñetiña, ligía gíñe uágubei laríñaga Búngiu luágu siñá lan ladügúniwa, le cátei le uágubei jaríñaga luágu gayára lan ladügúniwa, ligía gíñe le uágubei laríñaga Búngiu luágu gayára lan ladügúniwa.

¹⁹‘Naríñajare gíñe jun luágu ánjaña lan úarada biáma jídaangiñe ya ubouágu lun jamúriajan ában cátei lúma Búngiu le siélubei, líchugubei jun, ²⁰ladúga le ñí jamuti biáma o úrüwa oúndaragu lídan níri, anájein ñi jamídaangua.

²¹Ába layárafadun Pédro lun Jesúsu, ába laríñagun lun.

—Nabúreme, ¿átiribeísan weíyaasu ladúgün nibíri ában wuríbani nun lun ferúduna méme náani? Darí sédü weíyaasu?

²²Ába laríñagun Jesúsu lun.

—Maríñaguntina bun luágu darí lan sédü weíyaasu lúnti ferúduna báani, darí úrüwa-wein-díisi weíyaasu sédü.

Jémpulu luáguti músu le májabei ferúduna lan

²³‘Ligía ítara líña lubeí arúejani le lánina siélu quei ában urúei le núbinbei lun laráansejan luágu seínsu jáma lumúsuniña. ²⁴Lagúmesera adúgei, ába janúgün ában le adúweirubalin sarágu mínun fiádürü, ²⁵quei maseínsun lan lun lafáyeijan, ába laríñagun urúei lun lalúgurúniwa idámunime táu sun kúmari, lirájüñü, lúma sun le lúmabei lun lafáyeiruni ladúweijan. ²⁶Ába lájuduragun músu ligía ligíbugiñe urúei, ába layúmuragun lun ítara. “Nabúreme, gagúraasunbá nubá, nafáyeirubei sun le nadúweirubei bun.” ²⁷Ába lagúdemedagun lun urúei, ába ferúduna láani ladúweiruni, ába lígiragüdüni. ²⁸Quei láfuridun músu ligía ñígiñe, ítara ladúnragun lúma ában músu líledi le adúweirubalin átiri fiádürü. Ába lárügüdüni lueígiñe ligíña, ába lagúmeserun achócurei, ába laríñagun lun. “Fáyeibeí le badúweirubalina.” ²⁹Ábati lájuduragun ligíbugiñe, ába layúmuragun lun ítara. “Gagúraasunbá nubá, nafáyeirubadibu.” ³⁰Májati le ában, núdünrügü ligía ába ládaruni furísunrugun darí lafáyeiruni ladúweijan. ³¹Dan le jarjínbaalin ja jíbiri músu cátei le, ába lagáridun joun sarágu, ába jóúdin, ába jabájüdaguni lun urúei. ³²Ába louñajan urúei ougei, ába laríñagun lun. “¡Músu wuríbati! Ferúduna numúti sun badúweijan ladúga bayúmuragun nun. ³³Lúnti yebe gíñe gudéme lan bouba bun quei bagúdemedun nun.” ³⁴Ába lagáñidun urúei sarágu, ába líchugun dimúrei lun jasúfuriragüdüni daríme lafáyeiruni sun ladúweijan.

³⁵Ába lásurun Jesúsu aríñageina.

—Ítara lúba gíñe ladúga Nóguchi Búngiu le siélubei jun ánjaün úa ferúduna láani cáda ában jídaangiñe libíri tídaangiñe lanígi.

Larúfudajan Jesúsu libúgürü ígiraguni

(Mr. 10.1-12, Lc. 16.18)

19 ¹Lárigiñe laríñaguni Jesúsu sun cátei le, ába lídin Galiléagiñe lun loubawagun Judéa le lueígiñebeí oubaü le ñígiñe lubeí laboucha wéyu libíti Jordán. ²Sarágu jáña gürigia afálaruti, ába lareídaguagüdüniña sánditiña ñi.

³Ábati jayábin fiú fariséogu lúmoun Jesúsu áluga jáburugüdüni tídown sádara, ába jálügüdüni.

—¿Según barítangun, gayáraatísan lígírunun gürígia lúmari lueígiñe furúmieguarügü cátei?

⁴Ába loúnabun Jesúsu.

—¿Malíjjangidün tídán Lerérún Búngiu luágu lúmagine lan furúmiñeti dan, dan le ladügünbaliña Búngiu gürígia, adúga lumúti wügúri, adúga wúri? ⁵Aríñagati gíñe. “Ligia lígirubei lubei wügúri lúguchi túma lúguchu lun laganoúniwa túma lúmari, ábame jeréderun quei ábanrügü.” ⁶Mámaaña lubeiti bíama, ábanrügaaña. Ligia moún lubei lafánreinraguni wügúri le ladúnraguagüdübei Búngiu.

⁷Ábati jálügüdüni.

—¿Cáti uágu laríñaga lilúrudun Moisés lun lan tíchugúniwa gárada lánina ígiraguni tun wúri lun tigrún?

⁸Ába laríñagun Jesúsu joun.

—Ladúga tidére janígi lánjarunbei Búngiu lun jígiragun jáma júmarigu, máma líña meja furúmiñe. ⁹Naríñajare jun luágu furúmieguarügü lan le ígirutu lúmari ába lagámaridun ámu, ladügüña adultériu, mámarúgaali ligia ladúga tagámaridun ligíbuagun, le gíñe agámariduti wúri to ígiraguaaru, ladügüña gíñe adultériu.

¹⁰Ábati jaríñagun láni disípulugu lun.

—Ánjein ítara líña lubei luáguti wügúri túma lúmari, buítimaati lubei lun magámaridun jamá gürígia.

¹¹Ába laríñagun Jesúsu joun.

—Másutiña gayára jabágaridun mámariga, ja rügúñanu únbaña rújali lan Búngiu ubáfu. ¹²Ámuñegueinarügüti lébuna magámaridun jamá wügúriña, añájein, ítargubeíñanu lúmagine jagúriajóun, jíbiri, adügúwarügüti joun, jíbiri, reídeitiña magámaridunga lun jedéregeragun jóungua le gumúti lun jesériwidun lun Búngiu. Le gabáfubei lun magámaridun lan, magámaridalá.

Labíniruniña Jesúsu irájüñü

(Mr. 10.13-16, Lc. 18.15-17)

¹³Ába janügúniwa irájüñü lun Jesúsu lun líchuguni lújabu jawágu lúma lun layúmuragun lun Búngiu jawágu, ába jagúmeserun disípulugu adefnja joun ja anáajabaliña. ¹⁴Ába laríñagun Jesúsu joun.

—Ígira jumá lun jayábin irájüñü nun, mamájara jumá, ladúga ja jarúmabaña afíñe quei irájüñü, jagía lílana arúejiani le lánina siélu.

¹⁵Ába líchuguni lújabu jawágu irájüñü jagía, lárigiñe, ába lídin lídaangiñe fulásu ligía.

Ladímurejan ában wügúri ñúraügili lúma Jesúsu

(Mr. 10.17-31, Lc. 18.18-30)

¹⁶Ába lídin ában wügúri ñúraügili aríjei Jesúsu, ába laríñagun lun.

—Maésturu buíti, ¿cásan cátei buíti lúnbei nadügüni lun nibíjini ibágari le magúmuchaditi?

¹⁷Ába laríñagun Jesúsu lun.

—¿Ca uágu baríñaga nun “buíti”? Ában rügüñein buíti, Búngiu. Ánjein busén bubei bibíjini ibágari magúmuchaditi, gúnfulibá lúma gumádi.

¹⁸Ába laríñagun wügúri ligía lun.

—¿Cáteigi buri?

Ába laríñagun Jesúsu lun.

—Máfarajabá, magámaridabá wúri gámaritu, míwerujabá, madímurejabá iyéeni luágu ni ában, ¹⁹inébe jamá bagúbürigu bun, jínsiñe jagíame gürígia bíledigu bun quei bínsiñegua búngua.

²⁰Ába laríñagun lun.

—Gúnfuli numúti sun le lúmagiñe ñúraügidina, ¿cági ámu nemégeirubei?

²¹Ába laríñagun Jesúsu lun.

—Ánjein busén bubei buídu ban le gumúti, alúgurabeí sun le búmabei, ábame bíchuguni lebégi joun gudémetiña, ábame bibíjin irisini siélu, ábameti biábin, ábame bafálarunina.

²²Dan lagáambunbalin wügúri ligía cátei le, májati, ladúga weíribalin Jesúsu cába lan ladúgti lirísín, ába lídin láu írúni.

²³Ábati laríñagun Jesúsu joun láni disípulugu.

—Nináriün jáu luágu jénreengu lan lun lebélorun ában rísiti lídoun arúejani le lánina siélu. ²⁴Aríñagaya numúti jun luágu ménreenguntima lan lásügürün ában caméyu lídaangiñe lujúyun ában agúsa, sügú láu lebélorun ában rísiti lídoun arúejani le lánina siélu.

²⁵Dan jagáambuni disípulugu cátei le, ába laweíridun jan-balin Jesúsu cába lan ladúgigi sarágu, ába jálügüdagun jámagua.

—¿Cáteiti gayáraabei lasálbarun?

²⁶Ába laríaguniña Jesúsu, ába laríñagun joun.

—Siñáti jasálbaragun gürígia jóungua, ánjein Búngiu, gayára lumúti sun cátei adúga.

²⁷Ábati laríñagun Pédro lun.

—Nabúreme, wagía, ígira wamáali sun lé meja wámabei lun wafálarunibu. ¿Cábasanti wabíja?

²⁸Ába laríñagun Jesúsu joun.

—Nináriün jáu luágu lídan lánme dan ligía dánme iséri lan sun cátei, dánme le nañúurun, áu le Wügúri Garaúwarügüti luágu nála yágüta siélu lun narúejan láu sun nuweírigun, jugúya le afálarubalina jañúuruba gíñe luágu dúusu jalaú lun jagúseragüdüniña dúusugubei láni Israel türíbu.

²⁹Súnti ja ígiraañábaña jában, o jamúlenu, o játunu, o jagúbürigu, o jasáanigu, o jamúan, nuágu, jerésibiruba san weíyaasu lánwoun, resíbi jameíme ibágari magúmuchaditi. ³⁰Áni sarágu jáña ja furúmiñetiñábaña guetó, jagíaba agúmujoúni, sarágu ja agúmujoúnibaña guetó, jagíaba furúmiñe.

Jémpulu jawáguti ñadágimeintiña

20 ¹Ába laríñagun Jesúsu. —Ítara líña arúejiani le lánina siélu quei ában labúreme ichári le áfuridubei bináafingua áluaja ñadágimeintiña lun talúbajoún linádirigu. ²Ába ladúgün darádu jáma ñadágimeintiña lun líchugun fiádürü joun luágu wéyu, ába loúnajaniña ñadágimein lichárirugu. ³Lárigiñe, ábaya láfuridun quei buri ladaúnrün néfu bináafin, ábaya ladárirun ámu wügúriña mafisiutetiña, mágidirugu. ⁴Ába laríñagun joun. “Jeíba gíñe ñadágimein nichárirugu, ábame nafáyeiruni lebégi juwádigimari jun.” Ába jóúdin. ⁵Ábaya láfuridun amídirugu, furí ligía ladaúnrün úrüwa rábounwéyu, ligía méme ladúga. ⁶Quei buri ladaúnrün seíngü rábounwéyu, ábaya lídin mágidirugu, ábaya ladárirun wügúriña mafsiutetiña ñi, ába laríñagun joun. “¿Cásan uágu yá jubei sun wéyu mawádigimariga?” ⁷Ába jaríñagun lun. “Úagili ni ában álugutiwa.” Ába laríñagun joun. “Jeíba gíñe ñadágimein nichárirugu, ábame nafáyeiruni lebégi juwádigimari jun.” ⁸Dan le lagúñedunbei, ába laríñagun labúreme ichári lun jábuti ñadágimeintiña. “Wába joun ñadágimeintiña, fáyei bámugaña, bagúmeserame jámagiñe ja atátirubaña agúmujoúni, bagúmuchame jáma ja atátirubaña furúmiñe.” ⁹Ábati jayábin ja atátirubaña ñadágimein quei buri ladaúnrün seíngü rábounwéyu, ába jibíjin fiádürü cáda ában. ¹⁰Lárigiñe, dan le lachúlürün jadáani ja atátirubaña furúmiñe, ába jarítagn luágu gíbetimaabei lan jabíjin. Ába gíñe jabíjin fiádürü cáda ában. ¹¹Dan le jerésibiruni jaseínsun, ába magúndan jamá lúma labúreme ichári, ¹²ába jaríñagun. “Ja ñúbinbaña agúmujoúni, ában rügúñein óra jawádigimari, ában lábu bafáyeiruniña quei wagía, wagía le awándubalin wadágimanu lúma lísiuga sun wéyu.” ¹³Ába loúnabun labúreme ichári, ába laríñagun lun ában jádaangiñe. “Numáda, máma nadúgüña ni murúsun maríchaü jun. ¿Ma funági luágu ában fiádürü jadúga darádu núma? ¹⁴Barújumei jiseínsun, jeíba. Nafáyeiruñanu ja atátirubaña agúmujoúni quei nafáyeirunün ladúga ítara líña lan nabúseerun. ¹⁵¿Maríchatina funági lun nadúgüni le nabúseerun láu niseínsun? ¿Ódi gimúgatün ladúga nubuídun?” ¹⁶Ítara líña lubeíti, sarágu jáña ja agúmujoúnibaña guetó, jagíaba furúmiñetiña, sarágu jáña gíñe ja furúmiñetiñaábaña guetó, jagíaba agúmujoúni. Ladúga sarágu jáña agúarútiña áni míbetiña anúadirútiña.

Ladímurejaanya Jesúsu luágu loúnwen

(Mr. 10.32-34, Lc. 18.31-34)

¹⁷Dan le niján lan Jesúsu luágu úma lun Jerusaléoun, ába ladíñurun jáu láni dúusu disípulugu jawef ja jíbiri gürígia ja luágubaña úma úara jáma, ába laríñagun joun.

¹⁸—Quei lubeí jaríjini, aweínreina wáña Jerusaléoun le ñíba lubeí nedéregerúa, áu le Wügúri Garaúwarügüti, joun jábutigu jafádirigun

juríu lúma joun arúfudajatiña lilúrudun Moisés, ja lúnbaña jasiadirunína lun nouñwen. ¹⁹Ábame jedéregerunina joun ja mámabaña juríu lun jéjerajan náu, áfara jamáname, ábame jádaragunina luágu gurúwa, áni násaaruba lídaangiñe ouweni luágu lúrtiwan wéyu.

Le tamúriajabei jáguchu Jacóbo láu Juan lúma Jesúsu
(Mr. 10.35-45)

²⁰Ábati tiábin jáguchu Jacóbo láu Juan, ja lisáanigu Zebedéo, lúmoun Jesúsu jáu tisáanigu, ába tájuduragun lun tamúriajan ában fuleísei lúma.

²¹Ába laríñagun tun.

—¿Ca babúseerubei?

Ába taríñagun lun.

—Aríñagabá lun jañúurun bián nisáanigu ja, ában lueígiñe bouñwenren, ában lueígiñe bubaúna yágüta lídan barúeijan.

²²Ába laríñagun Jesúsu joun.

—Ibidiñeti jun ca lan jamúriajabei. ¿Gayáraati jawánduni luweírin igárigu le lúnbei nawánduni, gayára ligíame júaradun núma lídan nasúfurirun?

Ába jaríñagun.

—Gayára wabeí.

²³Ába laríñagun joun.

—Inárüni, lúnti jawánduni igárigu le lúnbei nawánduni, úara jugúyame núma lídan nasúfurirun, ánjeinti lun jañúurun lueígiñe nouñwenren lúma lueígiñe nubaúna, máma áu lúnbei níchuguni, líchugúaba joun ja ubáabaña laráanserei Búngiu.

²⁴Dan le jagáambunbalin jíbiri díisi díspulugu cátei le, ába jagáñidun jáma bián amúlenugu jagía. ²⁵Ába lagúarun Jesúsu joun, ába laríñagun joun.

—Queísi jasúbudiruni, ja agúmadijabaña jádan ja mámabaña juríu arúfudaguatiña jóungua camá jamuga jabúriña lílana fulásu ligía, játi weínamubaña jádan, arúfuda jamúti jabáfu. ²⁶Ánjein jídan, máma kúba, le abúseeruti lun weíri lan jídan, lúnti lesériwiduniña jíbiri. ²⁷Furúmieguartigü jídaangiñe le abúseeruti lun ligíaba lan furúmiñeti, lúnti idámuni lan joun jíbiri ²⁸ítara quei máma lan niábiña, áu le Wügúri Garaúwarügüti, lun nesériwidúniwa, niábiña lun nesériwidun lúma lun níchuguni nibágari lebégime jasálbarun sarágu.

Lareídaguagüdün Jesúsu bián maríjintiña
(Mr. 10.46-52, Lc. 18.35-43)

²⁹Dan le áfurideina jabeí Jesúsu jáma láni díspulugu Jericógiñe, sarágu jáña gürígia afálaruti Jesúsu. ³⁰Ñíñanu bián maríjintiña ñun láru úma, dan le jagáambun luágu Jesúsu lan le ásügürübei, ába jagúaragun.

—¡Wabúreme, ladúgawagun Davíd, gudéme wamá bun!

³¹Ába jadeíñjan gürígia joun lun jámanichun, ligíatima jagúaragun.

—¡Wabúreme, ladúgawagun Davíd, gudéme wamá bun!

32Ába leréderagun Jesúsu, ába lagúarun joun, ába laríñagun joun.

—¿Ca jabúseerubei nadúgün jun?

33Ába jaríñagun lun.

—Wabúreme, buséntiwa waríjin.

34Ába jagúdemedagun lun Jesúsu, ába lagúurun luágu jágu. Lúmagiñe óra ligía ába jaríjin, ába jafálaruni.

Lebélurun Jesúsu Jerusaléoun

(Mr. 11.1-11, Lc. 19.28-40, Jn. 12.12-19)

21 ¹Dan le yaráfaaña lubei lun Jerusalén, ába jachúlürün ligíbugiñe fulásu le gíribei Betfajé, le únabubei libíti wúbü le Olívos, ²ába laríñagun Jesúsu joun biáma jádaangiñe láni disípulugu.

—Jefba lídan liraúraü fulásu le wagíbugiñebei, jadáriruba ában burígü güiráñu ñi láu ában liraúraü burígü túma, ábame jafáragaduniña, ábame janúgüniña nun. ³Ánjein ñi adímurejati jun lueígiñe jadúgüni, ábame jaríñagun lun luágu busén lániña Jesúsu, luágu láguyugüdübaña lan.

⁴Lasúseredunbei líra lun lagúnfulirun lé meja laríñagubei proféta dan le labúrñanbei ítara.

⁵Aríñaga jumá lun ubúrugun Sión.

“Niteín Burúeite bun láu únabuni,

waríñu lanágawagu ában burígü,

waríñu luágu ában liraúraü burígü, anímaalu anáajati ílaü.”

⁶Ába jóudin disípulugu, ába jadúgüni quei laríñaguni Jesúsu joun. ⁷Ába janúgünun burígü tugúya láu sun tiraü, ába jíchugunun janáangun jawágu, ába lawárirun Jesúsu. ⁸Sarágu jañáti güirígia, ába jábudunun janáangun luágu úma, jíbiri, ába jáchuañan tilímun wéwe, ába jíchaañani luágu úma.

⁹Dáñdu güirígia ja ubáraübaña quei ja árigibaña, ába jagúmeserun agúaraja.

—¡Uweíriguni lun ladúgawagun urúei Davíd! ¡Biníwati wügüri le ñúbinbei lídan líri Wabúreme Búngiu! ¡Uweíriguni lun Búngiu!

¹⁰Dan lebélurun Jesúsu ubúrugun Jerusalén, ába jafúudun sun ja ñíbaña, ába jaríñagun sarágu.

—¿Cáteisan güirígia le?

¹¹Ába jaríñagun güirígia.

—Jesúsu le, le Nazarétna, fulásu le lídaanbei Galiléa. Ligía ában proféta.

Larúmadagüdünun Jesúsu témpulu

(Mr. 11.15-19, Lc. 19.45-48, Jn. 2.13-22)

¹²Lárigiñe, ába lebélurun Jesúsu tídoun láni Búngiu témpulu, ába labúgaguniña sun alúgurajatiña jáma agáñijatiña ja ñíbaña. Ába lagáragaguni dábula buri le jadábulan asáansijabaña seínsu ñi joun güirígia, luma jála ja alúgurajabaña únjun.

¹³Ába laríñagun joun.

—Laríñajare Búngiu tídan Lerérún. “Núban fulásu le ní lubei gayára lan jayúmuragun güirígia nun”, ánjein jugúya, barú jumaaru quei jában jíwerutiña.

¹⁴Ába jayábin fiú maríjintiña jáma danímaatiña lúmoun Jesúsu ní témpulurugu, ába lareídaguagüdüniña. ¹⁵Dan le jaríjinbaalin jábutigu fádirigu jáma arúfudajatiña lilúrudun Moisés miláguru buri le ladáagubei, lúma dan le jagáambuni jagúarajan irájüñü témpulurugu. “¡Uweiríguni lun ladúgawagun urúei David!”, ába jagáñidun. ¹⁶Ába jaríñagun lun Jesúsu.

—¿Agáamba bumútisan le jaríñagubei ja?

Ába laríñagun Jesúsu joun.

—Ánja, agáamba numúti. ¿Malíijan jumágili tídan Lerérún Búngiu le ní lubei laríñawagúa lun Búngiu.

Adúgaadibu lun jerémujan núbüriña jáma irájüñü ja machúlaagiña, cátei buíti buágu?

¹⁷Ába lígiruniña, ába lídin ubúrugugiñe lun Betánioun, ába lásügürüni áriebeu ní.

Líñaragunun Jesúsu tídibu ígo to mীনboun

(Mr. 11.12-14, 20-26)

¹⁸Larúgan bináafin, dan le lagíribudun Jesúsu ubúrugun, ába lálámachun. ¹⁹Ába laríjin ában tídibu ígo láru úma, ába lídin tuágun, madáriti ni cáta tuágu luefidügüya ubánaü. Ába laríñagun tun tídibu ígo tugúya.

—¡Magíindadügüyabá!

Lídan óra ligía ába tásaürün. ²⁰Dan jaríjini disípulugu cátei le, ába laweíridun janígi, ába jaríñagun lun Jesúsu.

—¿Ída liñasan tásaürübei tídibu ígo to ítara oúfun?

²¹Ába laríñagun Jesúsu joun.

—Nínáürün jáu, ánjaün affíne le gumúti, mámarügübei líbe le nadügübei tun tídibu ígo to gayára jumá adúga, gayáraabei jaríñagun lun wúbü le. “Gidába yágiñe, dabúba baránajoun”, ábame lasúseredun. ²²Súnme gíñe cátei le jamúriajan lúma Búngiu, ánjein affíne jubeí, jibíjubei.

Lubáfu Jesúsu

(Mr. 11.27-33, Lc. 20.1-8)

²³Ábati lebélurun Jesúsu témpulurugun, dan niján lan arúfudaja ní, ába jayábin jábutigu fádirigu jáma wügüríña ábutigu lídan jafíñen juríu, ába jaríñagun lun.

—¿Aríñagabeí woun ca lan biríchabei lun badügüni cátei le? ¿Ca íchugubalin ubáfu le bun?

²⁴Ába laríñagun Jesúsu joun.

—Nálügüdaadün gíñe ában cátei, ánjein jóunaba nun, ábame naríñaguni jun ca lan áu ubáfu nadúgei buri cátei le. ²⁵¿Ca óunajabalin Juan abásteragüdaja? ¿Búngiu, ódi wügüríña?

Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan oúnajabalin, laríñaguba woun ca lan uágu mafíñerun wabeí lun. ²⁶Ánjawa aríñaga luágu joúnajan lan wügüríña, jóuserubadiwa gürgía wuríba ladúga súngubei affíñetiña luágu proféta lán.

²⁷Ábati jaríñagun lun Jesúsu.

—Ibídiñeti woun.

Ába giñeti laríñagun joun.

—Maríñagun nubeí giñéti jun ca lan áu ubáfu nadúgei buri cátei le.

Jémpulu jawáguti bián isáanigu

²⁸Ába laríñagun Jesúsu joun.

—Nabájüdagua ában cátei jun, jaríñageime nun ída líña lan jaríjin lun. Níñein ában wügüri, biámananu lisáanigu. Ába laríñagun lun ában jádaangiñe. “Niraú, beíba ñadágimein ugúñe lídan talúbajoún ninádirigu.”

²⁹Ába laríñagun lisáni lun. “Mabúseeruntina nídin.” Lárigiñe, ába lasáansiragun laritagun, ába lídin ñadágimein. ³⁰Lárigiñe, ába lídin úguchili aríjei le ában, aríñageinaleí le méme laríñagubeí buga lun le furúmiñeti lun. Ába loúnabun le. “Ánja, nídiba.” Mídinti. ³¹Aríñaga jumeí nun, ¿cági jádaangiñe biángubei adúgübalin le labúseerubei úguchili?

Ába jaríñagun.

—Le furúmiñebei.

Ábati laríñagun Jesúsu joun.

—Ninárün jáu luágu choúrutima lan jebélurun agúburajatiña liseínsuna gumádi jáma jórugu lídoun larúeijan Búngiu sügü jáu, ³²ladúga nüúbinti Juan le abásteragüdjabeí arúfudaja jun ída lúba lan ligáburi jabágaridun, mafíñeruntün lun, ánjañati ja agúburajabaña liseínsuna gumádi jáma jórugu, affíñeratiña lun. Jugúya, láu sun aríja jumáni sun líra, masáansiragunti jigáburi lun jaffíñerun lun.

Jémpulu jawáguti ñadágimeintiña ja wuríbabaña

(Mr. 12.1-12, Lc. 20.9-19)

³³Agáamba jumeí ábaya jémpulu le. Luáguti ában wügüri labúreme ában ichári, ában lábunagun tídibu beíbei lichárirugu, ába ladúgün baríeru láu, adúga ligía ában ágei lun laríbichawagún tíra beíbei lídoun lúma ában wáyelesi lun gayára lan loúnigiruni sun cátei.

‘Ába lájayajani ichári joun ñadágimeintiña, ába lídin adúga weíyaasu. ³⁴Dan le lachúlürün dan lun alúbajani, ába loúnajan jádaangiñe lumúsuniña amúriajei lufánran jámagiñe ñadágimeintiña. ³⁵Ábarüga járügüdüniña ñadágimeintiña músu jagía, buleísei jameí ában, áfara jameí ában jilágubei, rúgua jagía dúbü luágu le ában. ³⁶Ábaya loúnajan labúreme ichári gbetimaajaña sügü jáu ja loúnajabaña furúmiñe, ligía méme jadúga ñadágimeintiña joun.

³⁷‘Agúmujoúni, ába loúnajani liraú, ába laríñagun lúnguarügü. “Inébebei niraú joun.” ³⁸Dan le jaríjinbaalin ñadágimeintiña liraú, ába

jaríñagun jámagua. “Nijánba le erésibirei alágan, wáfaraali jilágubei, reídei wamámuga láu alágan.” ³⁹Ábati járügüdüni, ába jaságaruni lídaangiñe ichári, ába jáfaruni jilágubei.

⁴⁰Ába lálügüdajan Jesúsu.

—Dánmeti liábin labúreme ichári, ¿cábagi ladúga jáu ñadágimeintiña ja?

⁴¹Ába jaríñagun lun.

—Láfaragubaña wuríbatíña jagía jilágubei, magúdemedagúnbaña lun, ábame lájayajani ichári joun ámu ñadágimeintiña ja lúntíña jedéregeruni lufánran lun lídaangiñe alúbajani lídan dan.

⁴²Ábati laríñagun Jesúsu joun.

—¿Malíjañaña jumágiru Lerérun Búngiu? Taríñajare nuágu.

Le meja dúbü le mabúseerun jabeí ábunagutiña,
ligíaali furúmiñeti.

Wabúreme Búngiu adúgübalin lun furúmiñebei lan,
áni aríja wamúti quei ában cátei weíriguti.

⁴³Ligía naríñagunbei jun luágu lagídarúaba lan larúeijan Búngiu jueí, jugúya le weírigubei lídan jafínen jurú, ábame líchugúniwa joun gürígia ja edéregeruti alúbajani le láni larúeijan Búngiu. ⁴⁴Ánjeinti áu, le dúbü ligía, furúmieguarügü le eíguaduti nuágun lañaúrudagúba, léti uáguti leíguada nigáñi, lagúmuchaguagüdübei. Ligíaba asúsereda joun gürígia ja májabaña nun.

⁴⁵Dan le jagáambunbalin jábutigu fádirigu jáma fariséogu jémpulu buri le líchugubei Jesúsu, ába jasúbudiruni luágu jawágu lan ladímureja.

⁴⁶Ábati jabúseerún yebe járügüdüni, madúgün jamúti ladúga janúfude jaweí gürígia, ladúga afíñe jamá gürígia luágu proféta lan.

Jémpulu luáguti maríei

22 ¹Ábaya lagúmeserun Jesúsu adímureja joun láu jémpulu, ába laríñagun joun.

²—Nijánya ában jémpulu luáguti arúeijani le lánina siélu. Níñein ában urúei adúgüti ában fédu lubá lamárieidun lisáani. ³Ába loúnajaniña lumúsuniña oúgaña amísurajoútiña, májatiña amísurajoútiña jayábin. ⁴Ábaya loúnajan ámu músu, ába laríñagun joun. “Aríñaga jumá joun amísurajoútiña luágu aráanseeli lan eígini. Áfaragüda náaña bágasu jáma nilúgüniña anímaalugu dibúnetiña, aráanseeli sun cátei, lun jayábin maríeirugu.” ⁵Madúgüntiña amísurajoútiña gásu. Ába lídin ában jádaangiñe lichárigu, ñúdün ában adúga ámu wadágimanu, ⁶ja jíbiri, ába járügüdüniña lumúsuniña urúei, ába jóuseruniña wuríba, ába jáfaraguniña jilágubei. ⁷Ábati lagáñidun urúei sarágu, ába loúnajaniña lisúdaaranigu áfaraguaña gáfarajatiña jagía jilágubei lúma águdei jageíra. ⁸Ába laríñagun joun lumúsuniña. “Aráanseeli sun cátei lun maríei, áni amísurajoútiña jagúra madúnamatiña lun jamísurajoúniwa. ⁹Jefba lubeíti luágu buri larígei úma, ábame jamísurajaniña sun ja úmatiña jadúnragua.” ¹⁰Ába

joúdin músu luágu buri úma, ába joúndaruniña sun ja úmabaña jadúnragua, buítiña jáma wuríbatíña, ába tabuíñchun múna jáu gürígia.

¹¹ ‘Ábati lebélurun urúei aríjaña amísurajoútiña, ába laríjin ában wügúri le madáüragunti quei lun ában maríei ñi. ¹² Ába laríñagun lun. “Numáda, ¿ída liñági bebélurunbei ñájoun madáüragunga quei lun ában maríei?” Maní ligía. ¹³ Ába laríñagun urúei joun ja eténirubaña lún buri dábula. “Gürágua jumei lugúdi lúma lújabu, fíjumei lídoun lubúriga le boúgudibei, le ñíba lubei layájuaaja, acúnríjame lári.” ¹⁴ Ába laríñagun Jesúsu joun ja agáambubalin.

—Gíbetiña agúarútiña lun jebélurun lídoun larúeijan Búngiu, míbetiña anúadiruña.

Luáguti lafáyeirun liseínsuna gumádi

(Mr. 12.13-17, Lc. 20.20-26)

¹⁵ Ába joúdin fariséogu, ába júaradun aríja cába lan gayára lan jadúgün lun jaríñagagüdüni Jesúsu cátei le uáguti gayára lan jadárirun lidúnrun. ¹⁶ Ábati joúnajan jádaangiñe jánigu úara jáma jádaangiñe lánigu Heródes, aríñaga lun Jesúsu.

—Maésturu, subúdi wamúti luágu inárüni lan baríñagubei, luágu gíñe arúfuda báani lémeri Búngiu láu inárüni, manúfudeiga lueí ni ában, ladúga ni cáta lan luweírigun gürígia bun. ¹⁷ Rúbei lubeíti barítagun woun. ¿Buítisan lun lafáyeirúniwa seínsu lun urúei Rómana ódi mabuídunti?

¹⁸ Aríagu líña Jesúsu lun luríba jayúmajan, ába laríñagun joun.

—¿Bíángua tigíbu jugúya le! ¿Ca uágu jíchaaja sádara nubá? ¹⁹ Arúfuda jumei seínsu le áubei lafáyeijoúa liseínsuna gumádi nun.

Ába janúgün ában seínsu le denáriu lun. ²⁰ Dan laríjini, ába lálügüdüniña.

—¿Ca iyáwa le luágubei seínsu le, lúma íri le bürúwañubei luágu?

²¹ Ába jaríñagun lun.

—Láni urúei Rómana.

Ábati laríñagun Jesúsu joun.

—Rújumeiti láni urúei lun urúei, rújumeime láni Búngiu lun Búngiu.

²² Dan jagáambunbalin le, ába laweíridun janígi, ába jígiruni, ába joúdin.

Álügüdajani libúgürü ásaaruni lídaangiñe ouweni

(Mr. 12.18-27, Lc. 20.27-40)

²³ Wéyu méme ligía, ába joúdin fiú saduséogu aríjei Jesúsu. Jaríñajare saduséogu luágu úa lan ásaaruni lídaangiñe ouweni. Ábati jaríñagun lun Jesúsu.

²⁴ —Maésturu, aríñagatí meja Moisés luágu ánjein lan ouwe ában wügúri le maríeiti masáaniguga táu lúmari, lúnti lan lamárieidun lamúlen túma wúri to ueíboun louwe, lun gasáanigu lan táu lun líbugaña le ouwebei. ²⁵ Wel, ñíñanu méjati sédü gamúlenuguátiña ya wádan, ába lamárieidun le furúmiñeti, ába loúnwen. Quei masáanigu lubei táu

lúmari, ába lígirunun lun lamúlen. ²⁶Ligía méme suséreti lun jabíaman, lárigiñe lun jürüwan darí lúmoun jasédün. ²⁷Lárigiñe, ába gíñe toúnwen wúri. ²⁸Dánmeti jásaarun lídaangiñe oúweni, ¿cábatí úmari wúri tugúya jádaangiñe sédú gamúlenuguátíña ja, lárigiñe maríei jamá sun jagía túma?

²⁹Ába laríñagun Jesúsu joun.

—Bulíeiguatün ladúga libídiñe tuáguti Lerérun Búngiu jun, ni luáguti lubáfu Búngiu. ³⁰Dánme le jásaarun jiláaña lúnya jabágaridun, ámujalime jabágari, magámaridun jába, míchugun jamáñame jasáanigu lun maríei, queísi magámaridun jamá ánjeligu siélu. ³¹Ánjeinti luágu sará jamá jiláaña lúnya jabágaridun, ¿malíjan jumágili le laríñagubei Búngiu gúanarü jun? ítara líña laríñagun. ³²“Áu Lubúngiutebei Abrahám, Lubúngiute Isác, Lubúngiute Jacób.” Ítara líña lubeíti, ánjein jamúga jiláañu jáña lubeí wügúriña jagía lun sun dan, maríñagunti jamúgati Búngiu luágu Jabúngiute lan, ladúga máma Jabúngiute jiláguaaña Búngiu, Jabúngiute wínwangíña.

³³Dan jagáambunbalin gürígia cátei le, ába laweíridun janígi láu le larúfudajabei.

Gumádi le weírigutimaabei

(Mr. 12.28-34)

³⁴Dan le jasúbudirunbalin fariséogu luágu manígüda láaña lan Jesúsu saduséogu, ába joúndaragun, ³⁵ñíñein ában jádaangiñe le arúfudajati lilúrudun Moisés, abúseeruti laríjin lábun Jesúsu, ába laríñagun lun.

³⁶—Maésturu, ¿cásan gumádi weírigutimaabei lídan lilúrudun Búngiu?

³⁷Ába laríñagun Jesúsu lun.

—“Jínsiñelá Babúreme Búngiu bun táu sun banígi, táu sun buwáni, láu sun bisáminan.” ³⁸Níján gumádi weírigutimaabei, furúmiñeti gíñe lídaangiñe sun lugúmadin Búngiu. ³⁹Áni le libíaman lídan uweíriguni lenége le, ítara líña. “Jínsiñe jamá bíbirigu bun quei bínsiñegua búngua.” ⁴⁰Bián gumádi le, ligía ébuubei lun sun lilúrudun Moisés lúma jarúfudajan profétagu.

¿Ca adúgawagun Crístu?

(Mr. 12.35-37, Lc. 20.41-44)

⁴¹Sun añája lan fariséogu oúndaragu, ⁴²ába laríñagun Jesúsu joun.

—¿Cásan jarítagubei libúgürü Crístu le lanúadirubei Búngiu lun lasálbaruniña gürígia? ¿Cásan adúgawagun?

Ába jaríñagun lun.

—Ladúgawagun Davíd.

⁴³Ábati laríñagun Jesúsu joun.

—¿Ída liñáti lagúarunbalin Davíd quei Abúremein, láu lubáfu Sífiri Sándu? Aríñagatiga Davíd.

⁴⁴Laríñajare Búngiu lun Nabúreme.

“Nurúba núma lueígiñe noúnwenren

daríme níchuguniña báganiñu bújaburugun.”

⁴⁵ ¿Ída lubáti ladúgawagun lan Davíd Crístu ánjein wá lubali Davíd guánarü Crístu Nabúreme?

⁴⁶ Úati ni ában gayáraati louñabun ni ában dimúrei, lúmagiñeti wéyu ligía, manígiti ni ában lun liábin álügüdaguei.

Líchugun Jesúsu jadúnrun fariséogu jáma arúfudajatiña lilúrudun Moisés
(Mr. 12.38-40, Lc. 11.37-54, 20.45-47)

23 ¹ Ábati laríñagun Jesúsu joun láni disípulugu jáma jíbiri gürígia ja ñíbaña.

²—Gabáfutiña arúfudajatiña lilúrudun Moisés jáma fariséogu lun jafúnraanguagüdüni líla lilúrudun Moisés. ³ Agáamba jumáña lubeíti, adúga jumeíme sun le jaríñagunbei jun, le jadúgübei, mafálara jumeí ladúga aríñagatiña ában cátei, jadúga ámu. ⁴ Rújamuti gumádi joun gürígia queísi anúgüni júrüti le siñábei lanügüniwa, ánjein jagía, madügüntiña ni cáta lun jíderaguniña gürígia luágu buri anúgüni lánina lúru le jíchugubei jawágu. ⁵ Jadúgüni sun cátei lun jaríjiña gürígia. Jínsiñeti joun lun jíchugun tirájüñü gáfu táu Lerérün Búngiu jeréberugu lúma luágu buri jarúna, lúma lun jadáüragun anáanguni to durúrutu. ⁶ Buséntiña járügüdüni lubuídun-ágei ubáraü lídan eíginí lúma jalaú le jála weírigutiña tídan jalígílisin. ⁷ Buséntiña lun jabúsurun gürígia joun láu sarágu inébesei úmada, lun gíñe lagúarúniwa joun, “maésturugu”.

⁸ Ánjein jugúya, mígira jumá lun laríñawagúniwa jun, “maésturugu”, ladúga sun jugúya ában jáu, áni ában rügüñein gíñe Jumaésturun, áu le Crístubei. ⁹ Maríñaga jumá gíñe “núguchi” lun ni ában wügüri uboúagu lídan ligáburi jagúaruni Búngiu le siélubei “Núguchi”. ¹⁰ Mígirun jugúyame lun laríñawagúniwa jun “ábutigu” ladúga Crístu rügüñein Jábuti. ¹¹ Le esériwidubei joun jíbiri, ligía weírigutimaabei jídan, ¹² ladúga le anáanguti lúngua weíri, lúnabudagüdüwaba, ánjein le anáanguti lúngua únabu, laweíridagüdüwaba.

¹³ ¡Fugíábugu jugúya arúfudajatiña lilúrudun Moisés jáma fariséogu! ¡Biángua tigíbu!, ladúga darú jumuti lubéneri arúejani le lánina siélu lueí jebélurun ámu, mebélú jugúyati, mígirun lun jebélurun ja busénbaña jebélurun.

¹⁴ ¡Fugíábugu jugúya, arúfudajatiña lilúrudun Moisés jáma fariséogu! ¡Biángua tigíbu! Gídá jumutu jában würiña ja jiláaña úmari jaweí, lúnti ibídiñewa lan, ába jadáagun ayúmuraguni lun Búngiu le migínaguti. Ligía weíritimaabei lubeí jasúfurirun lueígiñe.

¹⁵ ¡Fugíábugu jugúya arúfudajatiña lilúrudun Moisés jáma fariséogu! ¡Biángua tigíbu! Eíbuga jumúti múa, áfayaja jumeí barána áluaja gürígia lun jánigume, dánti le ibíja jumáli le jabúseerubei, ába jadúgüniña gürígia jagía bián weíyaasu lúntima jóúdin máfiougati sügü jáu.

¹⁶ ¡Fugíábugu jugúya, adúndejetiña maríjintiña! Aríñagatün luágu le lan gürígia íchuguti dimúrei, ánjein áfiñura tuágu témpulu mála lan líra, áni

ánjein lan áfiñura luágu tigóluna témpulu, aná lan líra, lúnti lan lagúnfulirun. ¹⁷¡Ibídiongua líña jáu, maríjin! ¿Cági weírigutimaabei, gólu ódi témpulu to adúgüboun lun sagraubei lan gólu? ¹⁸Aríñagatün gíñe luágu ánjein lan íchiga güirígia dimúrei lun láfiñurun luágu latárü, mála lan líra, áni ánjein lan áfiñura luágu cátei le adágaragüdúwabei luágu latárü, aná lan líra, lúnti lan lagúnfulirun. ¹⁹¡Ibídiongua líña jáu, maríjin! ¿Cági weírigutimaabei, cátei le luágubei latárü ódi latárü le adúgübalin cátei ligía lun sagraubei lan? ²⁰Le áfiñurubei luágu latárü, máma rügüñein luágu latárü láfiñurun, láfiñuruña gíñe luágu sun le ligíbuagubei latárü. ²¹Le gíñe áfiñurubei tuágu témpulu, máma rügüñein gíñe tuágu témpulu láfiñura, láfiñuruña gíñe luágu Búngiu le aganoúbei tídan. ²²Le gíñe áfiñurubei luágu siélu, láfiñuruña gíñe luágu lála Búngiu, lúma gíñe luágu Búngiu le añúurubei luágu jalaú ligía.

²³¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adúgatün dísi fáreinti láu jíduru le ménta, anísi, lúma comíno lun jíchugun ában fáreinti lun Búngiu, áni mebéresentün láu arúfudajani le weírigutimaabei lídan lilúrudun Búngiu, queí buri lun jadúgüni sun cátei láu úraguni, lúma lun jagúdemedun güirígia jun, lúma lun jagúnfulirun lúma Búngiu. Ligía buri cátei le lúnbei jadúgüni, mígirunga jumeíme jadúgüni le líbiri. ²⁴¡Jugúya, adúndejatiña maríjintiña jugúya le, áseja jumúti ában minímini áni julútün ában caméyu!

²⁵¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adúgatün lun jarítapun güirígia luágu buídu lan jigáburi. Ítara jíña queí wéru lúma asfedu le jachíbubei bougudigiñe libíti, ánjein múnadagiñe jibíti, buin jíña láu buri luweínamu-águu lúma íweruni. ²⁶Fariséogu maríjintiña. jarúmagüda jumeí wéru lúma asfedu lurágeirugugiñe furúmiñe, ábame gíñe larúmadun bougudigiñe libíti.

²⁷¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Ítara jíña queí umúajaü le afeíndijoúti láu jarúti bougudigiñe libíti, buídumeraüti larijín, ánjein lurágeirugugiñe, buín líña láu jábu jiláaña lúma sun luwúyeri iwíyei. ²⁸Ítara jíña, bougudigiñe jibíti, ma lubuídun jarijíniwa jagíbugiñe güirígia, ánjein múnadagiñe, buín jíña láu iyéerejabuni lúma wuríbani.

²⁹¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Rújumuti dúbü arítaguagüleme luágu jamúaja profétagu, wédegüda jumeí umúajaü le jáni güirígia já meja buídubaña. ³⁰Ábati jaríñagun. “Lun jamúga meja awánjeinjadiwa lan le jadáani binádu wagúbürigu, míderagun wamútiña jamúga áfaraguaña profétagu.” ³¹Láu líra, subúdiguatün júngua luágu jádaangiñetün lan ja áfaragubaliña profétagu jagía. ³²¡Gumújumeiti jadúgüni lé meja jagúmeserubei binádu jagúbürigu adúga!

³³¡Jéwegu! ¡Jarásan jéwegu! ¿Ída lubásan jeséfurun lueí asúfuriruni le lánina máfiougati? ³⁴Ligía noúnajaba lubeí profétagu, jáma ja chúbaña

áu, jáma arúfudajatiña, jun. Áni jugúya, jáfaragubaña jádaangiñe, dágua jumáñame jíbiri luágu gurúwa, bei jumáñame jíbiri tídan jalígilisin juríu, efbaaja jumáñame lídan sun fulásu. ³⁵Ítara lúba láburujan dúru juágun luágu sun jítaü le áwiyurubei jádaangiñe sun wügúriña buítiña ja jáfarawagúbaña, lúmangiñe meja Abél le richáguabei darí lúmoun Zacarías, liraü Berequías lé meja jáfarubei tabádinagua témpulu lúma latáriü. ³⁶Ninárün jáu luágu láburujaba lan dúru jawágun gürígia ja lánina dan le luágu buri sun cátei le.

Layájun Jesúsu jawágu lílana Jerusalén

(Lc. 13.34-35)

³⁷¡O jugúya Jerusalénna! ¡Áfaragua jumáña profétagu, chúgua jugúya dúbü jawágun ja loúnajabaña Búngiu láu ugánu buíti jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarúna, májatün! ³⁸Ígira láadün Búngiu, ³⁹áni naríñajare jun luágu maríjindügüya jumáadina lan queísi jasálbaragüle daríme lachúlürün dan lun jaríñagun. “Biníwati le nübinbei lídan líri Wabúreme Búngiu.”

Laríñagun Jesúsu luágu tagúnrinchawagúba lan témpulu

(Mr. 13.1-2, Lc. 21.5-6)

24 ¹Dan le láfuridun Jesúsu témpulurugugiñe, leíbuga yebe, ligía jayábin láni disípulugu lúmoun, ába jarúfudun tuágun témpulu lun. ²Ába laríñagun Jesúsu joun.

—¿Aríja jumútu sun to? Ninárün jáu luágu merédebei lan ni ában dúbü ligíbuga dúbü, tagúnrichawagúba sun to.

Seíni buri lubáragiñe lagúmunchun uboú

(Mr. 13.3-23, Lc. 21.7-24, 17.22-24)

³Ábati jóudin luágu wúbü Olívos, dánti ñun lan Jesúsu ñi, ába jóudin láni disípulugu agúlülüja lúma, ába jaríñagun lun.

—Buséntiwa lun baríñaguni woun ídaba lan tagúnrinchawagúa témpulu. ¿Cába liseíni bagríbudun uboúagun, lúma lagúmuchagüle?

⁴Ába laríñagun Jesúsu joun.

—Toúnigi jumá lun úa lan ayéedutiün, ⁵ladúga sarágujaba nübintiña aríñageina. “Áu Crístubei”, áni sarágujaba jayéedun. ⁶Jugúya jagáambuba lamúri wuríbu yaráfa jun lúma ugánu luáguti buri wuríbu díseti jueí, manúfudedagua jumá. Lúnti ítara lan, mámagilíme lagúmuchagüle uboú líra. ⁷Lageíndaguba ában ageíraü lúma ában, lawúribujaba ában fulásu lúma ában, ñíbei ilámaü, sándi, jarabaganáli lídan sarágu fulásu. ⁸Sun líra lagúmesejarügigili le kúnbei lasúfurirúniwa.

⁹Jugúyati, jedéregerúaba lun lúrudu lun jasúfurirawagiüdün, lun gíñe jáfarawagúniwa jilágubei, jiyéeregudúba lun sun uboú nueígiñe. ¹⁰Lídaanme dan ligía, sarágujaba eféridiruti jaffínen nuágu, ábame jeyéeregudún jóuniwagua, ábame jalúguragun jóuniwagua. ¹¹Jachúlaaguba sarágu yéetiña aríñaga luágu

profétagu jamá áni sarágujaba güirgía jayéedun. ¹²Níbei sarágu wuríbani daríme lun jeféridiruni sarágu jádaangiñe lánigu Búngiu insiñejabuni jádaangua. ¹³Le asígiruti derégüidagu darí lúmoun lagúmujóun, lasálbarúba. ¹⁴Lapúrichijoúba ugánu buíti le luáguti larúejan Búngiu lídan sun uboú lun lasúbudirúniwa lídan sun fulásu, ligíaalúmeti lagúmuchun uboú.

¹⁵‘Abúrújatí meja proféta Daniél luágu cátei iyéereguti le gagúnrinchaguagüdadibei, dánme le jarjín chülújali lan cátei le lídoun fulásu le sánduti—le alíjabei, gunfaráandalá—, ¹⁶jámeti Judéabaña, kúntime janúrajan luágun buri wúbü. ¹⁷Léme tábulugubei lúban wéyu ligía, maráriralá aságara ni cáta múnadagiñe, ¹⁸le áraabubei, magíribudalá ni abúdoun lanáangun. ¹⁹¡Fugiábugume wúrínja ja dageínatiña o ja lan gasáanigutiña ja gurágiña lídounme wéyu ligía! ²⁰Amúriaja jumá kúma Búngiu lun máma lan lídan lidlíga ni lídan luwéyuri eméraaguni janúraja. ²¹Ladúga níbei sarágu sáfuri le úagili líbe lúmagiñe lagúmeserun uboú, úabei gíñe lárigiñe. ²²Lun jamúga madúraagun lubéi lan Búngiu dan ligía, úati jamúga ni ában asálbaruti, ladúraagubei jawágurügü ja lanúadirubaña lun lánigu jamá.

²³‘Ánjein lubéti aríñawagua jun. “Niján Crístu” o “Ningítan lan”, maffínera jumá, ²⁴ladúga jayábinba ayéejatiña lun jarífudagun jóungua camá Crístu, camá buri profétagu, áni jadáguba oúnwenbun buri seíni lúma miláguru lun jeyéedaguniña ja anúadira láañabaña Búngiu ánjaña gayára. ²⁵Aríñaga náali le jun lubáragiñe lasúseredun, ²⁶ligía lubéti, ánjein aríñawagua jun. “Níjein Crístu yára lídan fulásu le mageírawati”, mídín jumá ní, ánjaña aríñaga jun. “Niján ya rúmurugu”, maffínera jumá. ²⁷Quei larijíníwa labírichagun luegiñe ában oúbaü libíti siélu lun luágun le ában, ítara lúba dánme le niábin, aú le Wügúri Garaúwartügüti. ²⁸Ábame láburujan ligáñi Búngiu jawágun gafígountiña quei wadúbi luágun úgubu jiláali.

Seíni buri lubáragiñe lagíribudun Crístu uboúagun
(Mr. 13.24-37, Lc. 21.25-33, 17.26-30, 34-36)

²⁹‘Lárigiñerügüme lásügürün wéyu buri lánina sáfuri ligía, ábame labúrigadun wéyu, marúnijalime játi, ábame jeíguadúnga warúguma ja siélubaña, ábame ladádagarun sun siélu. ³⁰Ábamei jarjini niseíni siélu, súnme güirgía wuríbatiña uboúagu, jayájuajaba láu jarjini niábinya, áu le Wügúri Garaúwartügüti, lídan juánriñu siélugiñe láu oúnwenbun ubáfu lúma uweíriguni. ³¹Dánme línwirúniwa fidu rein, ábame nouñajaniña nání ánjeligu ja siélubaña lun jóundaruniña nánigu ja anúadira náañabaña lídaangiñe gádürü larígei uboú.

³²‘Furéndei jumeí jémpulu le tuáguti tídibu ígo. Dan le ñulúgili tilímun, ába laboúchun tubána, subúdi jumúti luágu yaráfaali lan lubáchouga. ³³Ítara méme, dánme gíñe jarjini sún buri cátei le, subúdi jumeí luágu yaráfaali lan niábin. ³⁴Nináriün jáu, luágu lagúnrinchawagúba lan sun ubúru le Jerusalén lubáragiñe jówegun güirgía ja lánina dan le. ³⁵Lagúmuchaguba siélu lúma uboú, ánjein nerérun, merédebei magúnfulirúnga.

³⁶‘Ánjeinti luágu wéyu lúma óra le lúnbei nagríbudun uboúagun, ibídiñeti ni ca un, ni joun ánjeligu ja siélubaña, ni nun, áu le Liraú Búngiu, Búngiu rügúñein Úguchili asúbudirei.

³⁷‘Ítara queí meja lasúseredun lídan meja lidáani Noé, ítara lúba gíñe dánme le niábin, áu le Wügúri Garaúwarügüti. ³⁸Lídan meja dan ligía, lubáragiñe ladíbirun uboú, jerédera meja gürigia eíga, áta, amárieidagua, íchaajaña jasáanigu lun maríei, darí wéyu le lebélurunbei Noé tídown ugúnein. ³⁹Meféentiña, darí ladíbirun uboú, ába jañáradagun súnigubei. Ítara lúba gíñe dánme niábinya, áu le Wügúri Garaúwarügüti uboúagun. ⁴⁰Lídaanme dan ligía, ñíbaña bián wügúriña áraabu, lanügúba ában, igirúame le ában según jaffínen nuágu. ⁴¹Ñíbaña bián würiña amúlija, tanügúba ában, igirúame to ában.

⁴²‘Agágudúañu jumá, ladúga ibídiñeti jun cába lan óra niábin, áu le Jabúreme. ⁴³Subúdi jumeí le, luágu ánjein lan jamúga lasúbudira tabúreme ában muna cába lan óra liábin jíweruti áriebe, leréderuña jamúga marúmugunga, mígirunti jamúga lun lebélurúniwa íweruja lúbiñe. ⁴⁴Ligía aráanseñu jumá lubeí, ladúga léme óra magáradajan jumá, ligíame niábin, áu le Wügúri Garaúwarügüti.

Músu le úaraguabei, lúma le múaragúnbei

(Lc. 12.41-48)

⁴⁵‘Ítara jumá queísi músu úaraguati, gunfaráanda ligía, le lígirubei liyúbudiri lun laríjin jáu ja lúbiñebaña lun líchugun eígini joun lídan dan. ⁴⁶Gúndaabei músu le dánme le liábin liyúbudiri ánjein ladárira agúnfulira lúma lifisiute. ⁴⁷Ninárün jáu luágu líchugubei lan liyúbudiri lun laríjin láu sun lumégen. ⁴⁸Ánjein ában lubeí wügúri wuríbatí músu ligía, ábame larítapun luágu lúgili lan liábin liyúbudiri, ⁴⁹ábame lagúmeserun oúseraña jíbiri músu wuríba, reídei ligíame eíga lúma áta jáma bacháruatiña, ⁵⁰ábameti liábin liyúbudiri lídan wéyu le magúrabun láani, lídan óra le ibídiñeti lun. ⁵¹Ábame líchuguni luweírin-ágei abeichúni luágu, lasíadireime lun máfiougatin úara jáma biángua tigíbu, ábame layájun, acúnrijame lári.

Jémpulu jawáguti díisi würiña irájüñü

25 ¹Ába laríñagun Jesús. —Ítara lubáti arúejani le lánina siélu quei díisi würiña irájüñü ja anügübaña jalámpun le gálati gási, ába jáfuridun lun jadúnragun lúma adári, núdün jamámuga úara lúma maríeirugun. ²Seíngü jádaangiñe, maráanseruntiña, seíngü aráansetiña. ³Ja maráanserunbaña, dan le janúgünbalin jalámpun, manúgüntiña ámu gási lueí le lídaanbei jalámpun, ⁴ánjañati ja aráansebaña, barútiña jabúdein láu gási bougudin lueí le lídaanbei jalámpun. ⁵Queísiti ladárasarun adári, ába ladábudunga jágu súnigubei, ába jarúmugun. ⁶Queí buri luágu amídi áriebe, ligía lagaambúniwa

agúiaraguni. “Niteín adári, furíjuma adúnraguei.” ⁷ Sun wüirña irájüñü jagía, ába jásaarunga, ába jagúmeserun aráansejei jalámpun. ⁸ Ába jaríñagun ja maráanserunbaña joun ja aráansebaña. “Rújuma murúsun lídaangiñe jigásin woun, ladúga léñeguchuña walámpun.” ⁹ Ába jaríñagun ja aráansebaña joun. “Siñáti, ladúga loúguabei woun, loúguame jun. Jeíbagubei le ñí lubei lalúgurajoúa agáñija jumámuga júngua.” ¹⁰ Léti añángüra lan ja maráanserunbaña agáñija gási, ligía liábin adári. Játi aráansebaña, ába jebélurun lúma marfeirugun, ába ladaurúniwa béna. ¹¹ Lárigiñe, ligía jachúlürün jíbiri wüirña irájüñü jagía, ába jaríñagun. “¡Wabúreme, wabúreme, darábei béna wabá! ¹² Ába laríñagun joun. “Ninárün jáu, ibídiñetün nun.”

¹³ Ábati laríñagun Jesúsu joun.

—Agágudúañu jumá, ladúga ibídiñeti jun cába lan wéyu, ni cába lan óra nagíribudun, áu le Wügüri Garaúwarügüti, ubouágun.

Jémpulu luáguti seínsu

¹⁴ Ítara líña arúejiani le lánina siélu quei ában wügüri le dan lébei laráansejan lun ladügün weíyaasu lídoun ámu fulásu, ába lagúarun joun lumúsuniña, ába líchuguni liseínsun lábugiñoun jaríaaan.

¹⁵ ‘Lun ában jádaangiñe, rúti quei buri seíngü-mílu fiádürü, quei buri bián-mílu lun ában, quei buri mílu lun ában. Lafánreinjani joun quei jabáfu lun jawádigimariduni. Ábati lídin luágu luweíyasun. ¹⁶ Le músu le erésibirubei seíngü-mílu fiádürü, ába luwádigimariduni, ába lagáñeirun seíngü-mílu fiádürü ligíbuagun. ¹⁷ Ítara méme le erésibirubei bián-mílu, gáñeiti bián-mílu lánwoun. ¹⁸ Ánjeinti le erésibirubei mílu, ába lídin, ába lachígin ában júyu, ába larámuduni liseínsun liyúbudiri ñi.

¹⁹ ‘Sarágu dan lárigiñe, ába lagíribudun iyúbudiri, ába lagúmeserun aráanseja jáma luágu seínsu. ²⁰ Furúmiñe, ába liábin le erésibirubei seíngü-mílu fiádürü, ába ledégereruni lun liyúbudiri láu seíngü-mílu le lagáñeirubei ligíbuagun, ába laríñagun lun. “Niyúbudiri, seíngüñein-mílu fiádürü bíchugun nun, niján seíngü-mílu nagáñeirun ligíbuagun.” ²¹ Ába laríñagun iyúbudiri lun. “Buíti, ában músu buíti amúrü, úaragua, quei úaragua bubei lídan le murúsunrügüti, níchiga gíbetimaati lábugiñe baríaaan. Queímoun, gúnda amúrüme úara núma.” ²² Lárigiñe, ába liábin le erésibirubei bián-mílu fiádürü, ába laríñagun. “Niyúbudiri, biámañein-mílu fiádürü bíchugun nun, niján bián-mílu nagáñeirun ligíbuagun.” ²³ Ába laríñagun liyúbudiri lun. “Buíti, ában músu buíti amúrü, úaragua, quei úaragua bubei lídan le murúsunrügüti, níchiga gíbeti lábugiñe baríaaan. Queímoun, gúnda amúrüme úara núma.” ²⁴ Ligía liábin le erésibirubei mílu fiádürü, ába laríñagun lun liyúbudiri. “Niyúbudiri, subúdigubei numúti luágu wügüri ban jéreguti, alúbaja ban le ñí lumuti mábunagun ban, abúdaja amúrü le ñí lumuti machágarun ban ni cáta. ²⁵ Ligía nanúfudedunbei, ába nídin arámudei biseínsun lábugiñe múa. Niján le bání.” ²⁶ Ába laríñagun iyúbudiri lun. “Músu wuríbati, moúnti. Subúdigubei bíñein luágu alúbaja nan le ñí lubei

mábunagun nan, abúdaja áu le ñí lubei machágajan nan ni cáta. ²⁷Ligía lúnti lubei jamúga bíchuguni niseínsun bánciurugun lun dan lan jamúga nagíribudun, nerésibiruni le nání láu agáñeiruni.” ²⁸Ába laríñagun joun ja ñíbaña. “Gidájumei seínsu le lúmabei lueí, rújumei lun le láubei dísi-mílu, ²⁹ladúga le adúgübei buíti láu le lúmabei, líchugúba lánwoun lun, ábanme lígiragun lun, ánjein le madúgübei buíti láu murúsun le lúmabei, lagídarúaba lueí. ³⁰Músuti móunti le, fíjumei lídoun lubúriga le boúgudíbei, le ñíba lubei layájuaaja, acúnrijame lári.”

Jagúseragüdúniwa sun gürígia

³¹‘Dánme nagíribudun, áu le Wígúri Garaúwarügüti, uboúagun, niábinba quei urúei geyégu ánjeligu náu, ábame nañúurun luágu nála láu uweíriguni lun nagúseragüdúniña sun gürígia. ³²Ábame joúndaragun gürígia ja lílana sun fulásu nigíbugiñe, ábame nafánreinraguniña jawáriuagua quei lafánreinraguniña joúniri mudún, mudún jádaangiñe gábara. ³³Ja richáguabaña ligíbugiñe Búngiu, ábame níchuguniña lueígiñe noúnwenren, ja wuríbabaña ligíbugiñe Búngiu, lueígiñebaña nubaúna. ³⁴Naríñagame joun ja lueígiñebaña noúnwenren. “Jigoúgu, jugúya le biní laalíbei Núguchi, resíbi jumei arúejiani le aráanserúbei jubá lúmagiñe ladúgüni Búngiu uboú. ³⁵Ladúga dan le nalámachunbei, rúttün eíginí nun, dan le namágürabudunbei, rúttün dúna nun, dan le eíbugañaja nubei quei chúlúdügüti, rúttün múna nun. ³⁶Dagáti manáanguni nuágu, rúttün anáanguni nun, dan le nasándirunbei, ñúdüntün aríjana, dan le nadaürúnbei, ñúdüntün aríjana.” ³⁷Ábameti jaríñagun richáguatiña jagía nun. “Wabúreme, ¿ída bugagí waríjabu láu ilámaü, ába wíchugun eíginí bun? ¿ída bugagí waríjabu láu mágürabu, ába wíchugun dúna bun? ³⁸¿ída bugagí waríjabu quei chúlúdügüti, ába wíchugun múna bun? ¿o manáangunga, ába wíchugun anáanguni bun? ³⁹¿ída bugagí waríjabu láu sándi o furísunrugu, ába woúdin aríjabu?” ⁴⁰Ábame naríñagun joun. “Nínárün jáu, furúmieguaügü cátei le jadúgübei lun ában jádaangiñe namúlenu, ca lan lúnabunbei, nun méme jadúgei.”

⁴¹‘Naríñagameti joun ja lueígiñebaña nubaúna. “Díse jumá nueí, jugúya le lúnbei jasúfurirun lun sun dan, jeíba lídoun wátu geméti le méneguchadíbei, le aráanserúbei lubá Máfia jáu lánigu. ⁴²Ladúga dan le nalámachunbei, míchutün eíginí nun, dan le namágürabudunbei, míchutün dúna nun. ⁴³Eíbugatina quei chúlúdügüti, míchutün múna nun, mégeitina anáanguni, míchutün nun, sánditina, daúwa áu, mídintün aríjana.” ⁴⁴Ábame jaríñagun wuríbatiña jagía nun. “Wabúreme, ¿ída bugagí waríjabu láu ilámaü o mágürabu, o quei chúlúdügüti, o manáangunga, o láu sándi, o furísunrugu, míderagun wamútibu?” ⁴⁵Naríñagame joun. “Nínárün jáu, luágu furúmieguaügü lan cátei le madúgün jubei joun gürígia, ca lan lúnabunbei, madúgün jumúti gíñe nun.” ⁴⁶Ábameti joúdin ja máfiougatin lun jasúfurirun ñi lun sun dan, jámeti richáguabaña ligíbugiñe Búngiu, ábame joúdin siélun lun jagúndaarun ñi lun sun dan.

Aráansejani lun lárügüdúniwa Jesúsu
(Mr. 14.1-2, Lc. 22.1-2, Jn. 11.45-53)

26 ¹Dan aríñaga láali Jesúsu sun cátei le, ába laríñagun joun láni disípulugu.

²—Quei jasúbudiruni, bián wéyu lárigiñe le, ligíame fédu le páscua, áni nedéregerúaba, áu le Wügúri Garaúwarügüti, lun nádarawagún luágu gurúwa.

³Ába joúndaragun jábutigu fádirigu, arúfudajatiña lilúrudun Moisés, jáma wügúriña weírigitíña lídan jafíñen juríu tigíbugiñe lúban Gáifasi, fádiri le íñutimaabei. ⁴Ñi jaráanseja luágu Jesúsu lun járügüdúni láu yéguai, lun jáfaruni jilágubei. ⁵Jaríñagati.

—Máma látia fédurugu lueí jachágaragun gürigia.

Tájuduraguni ában wúri lábulugu Jesúsu
(Mr. 14.3-9, Jn. 12.1-8)

⁶Betániañein Jesúsu, lúbiñe Simón lé meja gawágubei gumeín luágu sun lúra, ⁷ába tiábin ában wúri luágun, gámeina tugúya ában lágei ibíñei le weíríti lisérún. Dan luáguñein lan dábula Jesúsu, ába téseruni ibíñei ligía lábulugun. ⁸Dan jaríjinbaalin disípulugu cátei le, ába jamágunдарun, ába jaríñagun.

—¿Cámesan leféridirúa le ítara? ⁹Gayáraati jamúgagu lalúgurúniwa le luágu sarágu seínsu lun jíderawagún gudémetiña.

¹⁰Ába lagáambuni Jesúsu le jaríñagubei, ába laríñagun joun.

—¿Ca uágu jañáwuriya tun wúri to? Cátei buíti le tadúgübei.

¹¹Súnwandan yábaña lan gudémetiña júma, ánjein áu, mámaba súnwandan júma nan. ¹²Le tadúgübei wúri to láu téseruni ibíñei le nuágun, taráanseruñádina lubá nábuluníniwa. ¹³Ninárün jáu luágu le lan ní lumuti lapúrichijouá ugánu luáguti asálbaruni lídan sun uboó, labájüdawagúaba gíñe le tadúgübei wúri to, lun larítawagún tuágu.

Lalúguruni Júdas Jesúsu
(Mr. 14.10-11, Lc. 22.3-6)

¹⁴Ába lídin ában jádaangiñe dúusu disípulugu, le gíribei Júdas Isarióte, adímureja jáma jábutigu fádirigu. ¹⁵Ába laríñagun joun.

—¿Atiribei jíchugun nun ánjein nedéregera Jesúsu jun?

Ába jíchugun darándi murúsun pláta lun. ¹⁶Lúmagiñeti óra ligía, ába láluajan Júdas ída lúba lan luwúyeri ledéregeruni Jesúsu joun.

Lagúmujoún leígin Jesúsu jáma lánigu
(Mr. 14.12-25, Lc. 22.7-23, Jn. 13.21-30, 1 Co. 11.23-26)

¹⁷Le furúmiñeti wéyu lídan fédu le ní lubei teigúa fein magánatu ísi, ába jayábin disípulugu lúmoun Jesúsu, ába jaríñagun lun.

—¿Jalía babúseera waráanserun lun ñíba lan wadúgei eígini le lánina páscua?

¹⁸Ába laríñagun joun.

—Jeíba ubúrugú, lúbiñe ítaga wügúri, ábame jaríñagun lun. “Ítara líña laríñagun Maésturu. Yaráfaali nórate, búbiñeba nefédujei páscua jáma nání disípulugu.”

¹⁹Ába jadúgüni disípulugu quei laríñaguni Jesúsu joun, ába jaráanseruni eígini le lánina páscua.

²⁰Dan le lagúñedunbei, ába lañúurun Jesúsu luágu dábula jáma lání dúusu disípulugu, ²¹súnti añája lan eíga, ába laríñagun joun.

—Nínárün jáu luágu lalúgurubadina lan ában jídaangiñe.

²²Ábati jajírudagun, ába jagúmeserun áltügüdei ában ában.

—Nabúreme, ¿nugúya funásan?

²³Ába laríñagun joun.

—Le éderutu leígan fein núma lídan asíedu, ligiába alúgurana. ²⁴Nídiña, áu le Wügúri Garaúwarügüti, luágu úma le uágubei taríñaga Lerérün Búngiu, áni ifugíabutia wügúri le alúgurutina! Buítimaati jamúga lun magúriajouágubei lan.

²⁵Ábati ladímurejan Júdas, ába lálügüdajan.

—Maésturu, ¿nugúya funásan?

Ába laríñagun Jesúsu lun.

—Ánja, bugúya.

²⁶Dan añája lan eíga, ába lanúgünun Jesúsu fein lújaburugu, ába letefngiruni Búngiu tuágu, lásun lagúbachagunun, ába líchugunun joun lání disípulugu, aríñageina.

—Joujuma, núgubu le.

²⁷Lárigiñe, ába lárügüdün ában wéru buin táu diweín lújaburugu, ába letefngiruni Búngiu tuágu, ába lásügüragüdüni joun, aríñageina.

—Gurájuma lídaangiñe le, sun jugúya. ²⁸Níta le, le añúuragüdübalin iséri darádu, le giñe áwiyrubei joun sarágu gürígia lun ferúdunawa lan jafígoun. ²⁹Naríñajare jun luágu mátundügüyaadina lan diweín daríme wéyu le lúnbei nátunun iséri tuwúyeri diweín júma lídan larúeijan Nóguchi Búngiu yágüta siélu.

Laríñaguni Jesúsu luágu leyéedaguba lan Pédro láu

(Mr. 14.26-31, Lc. 22.31-34, Jn. 13.36-38)

³⁰Lárigiñe jerémujani urému luágu Búngiu, ába jouúdin luágu wúbü Olívos. ³¹Ába laríñagun Jesúsu joun lání disípulugu.

—Sun jugúya, jasándiraguba júngua láu magúraasuni nuágu árieibu le, ladúga laríñajare tídan Lerérün Búngiu. “Náfarubei jóúniri mudún jílágubei, ábame jeréderun mudún chagágu.” ³²Lárigiñeme násaarun lídaangiñe ouweni lúnya nabágaridun, nídiba Galiléa jubáragiñe.

³³Ába laríñagun Pédro lun.

—Gayáraati járügüdün súnigubei magúraasuni buágu, nugúya no.

³⁴Ábati laríñagun Jesúsu lun.

—Ninárün báu luágu áriebe méme lan le, lubáragiñe layúgurujañ gáyu, beyéedaguba náu úrüwa weíyaasu.

³⁵Ába laríñagun Pédro lun.

—Gayáraati nouñwen búma, meyéedagunbadina báu.

Ligía méme gíñe jaríñaga sun disípulugu.

Layúmuragun Jesúsu lun Búngiu, Getsemaní

(Mr. 14.32-42, Lc. 22.39-46)

³⁶Ábati lachúlürün Jesúsu jáu láni disípulugu lídoun ában fulásu gíriti Getsemaní, ába laríñagun joun.

—ñurújuma ya, neíbuga ayúmuragua lun Búngiu yára.

³⁷Ába lanúgüni Pédro jáma bián lirájüñü Zebedéo lúmagua, ába jagúmeserun asándira íruni lúma tigári anígi. ³⁸Ábati laríñagun joun.

—Sandítina ában íruni le lánina ouweni tidan nuwáni. Reidei jumá ya, agágudúañu jugúyame núma.

³⁹Ábati lídin Jesúsu lubáruaguóin mémeraü, ába lájuduragun láu ligíbu múarugun, ába layúmuragun lun Búngiu ítara.

—Núguchi, áñjein gayára lubeí, adúgabá lun masúfurirun náani cátei le lúnbei nasúfuriruni, mámala quei nabúseerun, queflá babúseerun.

⁴⁰Ábati lagíribudun le ñjín jabeí láni disípulugu, ába ladáriruniña arúmuga, ába laríñagun lun Pédro.

—¿Siñátísan buga jeréderun agágudúañu núma ni ában óra?

⁴¹Agágudúañu jumá, ayúmuragua jugúyame, máburujan jumámuga lídoun íchajoúni lun jeféridiruni jafíñen nuágu. Inárüni luágu ánja tan juwáni lun cátei le buídubei, áñjeinti júgubu, débiliti.

⁴²Ábaya lídin luágu libíaman weíyaasu, ába layúmuragun ítara.

—Núguchi, áñjein siñá lubei masúfurirun náani le lúnbei nasúfuriruni, adügúwalá bugúndan.

⁴³Ábaya lagíribudun, ábaya ladáriruniña láni disípulugu arúmuga ladúga weírijali lidábu jágu. ⁴⁴Ába lígiruniña, ábaya lídin ayúmuragua luágu lúruwan weíyaasu, aríñageina méme dimúrei ligía. ⁴⁵Ábati lídin le ñjín jabeí láni disípulugu, ába laríñagun joun.

—¿Jarúmuguña mémesan, eméraagua jugúya? Chúlújali óra lun nedéregeruníwa, áu le Wügúri Garaúwarügüti, jájaburugun gafígountiña. ⁴⁶Sarájuma, queímoun lubároun le lúnbei lalúgurunina, níteeli.

Janúgüni Jesúsu adáüra

(Mr. 14.43-50, Lc. 22.47-53, Jn. 18.2-11)

⁴⁷Ñígili Jesúsu adímureja, ligía liábin Júdas, le ábanbei jádaangiñe dúusu disípulugu, jáu sarágu gürígia táu efeín lúma wéwe. Jayábin

lueígiñe joúbadina jábutigu fádorigu jáma wügúriña weírigutiña lídan jafíñen juríu. ⁴⁸Aríñagaaliti buga Júdas joun.

—Le nachúurun, ligía, járügüdeime.

⁴⁹Ábati layárafadun lun Jesúsu, ába laríñagun.

—¡Buíti gúnoun, maésturu!

Ába lachúuruni. ⁵⁰Ába laríñagun Jesúsu lun.

—Numáda, ¿ca bálugubei?

Ábati jayábin, ába járügüdüni Jesúsu, ába janúgüni adáúra.

⁵¹Ábati laságarunun ában jádaangiñe láni Jesúsu disípulugu lefeínte, ába láchuguni ában larígei lumúsun fádiri le íñutimaabei. ⁵²Ába laríñagun Jesúsu lun.

—Areídaboun befeínte, ladúga sun ja áfarajatiña táu efeín, táuba gíñe efeín jáfarúa. ⁵³Íbidiñeti bun luágu ánjana lan jamúga busén, gayára lan namúriajan úrüwa-wein-dísi-mílu jádaangiñe láni Núguchi ánjeligu, áni loúnajañanu lan jamúga? ⁵⁴Lun jamúga nadúgüni ítara, ¿ida lubági lagúnfulirun le tídaanbei Lerérün Búngiu to aríñaguboun luágu kúnti lan lasúseredun le ítara?

⁵⁵Ábati laríñagun Jesúsu joun mútu jagía.

—¿Jiábin táu efeín lúma wéwe lun járügüdünina camá jamuga jíwerutina? Ságüñaja wéyu nañúurun témpulurugu jagánagua arúfudaja, madaú jumútina. ⁵⁶Wel, lasúseredunbei sun le lun lagúnfulirun le jaríñagubei profétagu tídan Lerérün Búngiu.

Ábati jígiruni sun disípulugu Jesúsu lábugua, ába janúrajan.

Jesúsu ligíbugiñe líñun-ágei lúrudu

(Mr. 14.53-65, Lc. 22.54-55, 63-71, Jn. 18.12-14, 19-24)

⁵⁷Ja adáürübalin Jesúsu, ába janúgüni ligíbugiñoun Gáifasi, fádiri le íñutimaabei, le ní lubei adámurigu jamá arúfudajatiña lilúrudun Moisés jáma wügúriña weírigutiña lídan jafíñen juríu. ⁵⁸Ánjeinti Pédro, falá lumuti dísegiñe darí tübüürürugun lúban fádiri le íñutimaabei le ñíjin lubeí lebélera, ába leréderun ñun jáma oúnigirutiña témpulu lun laríjin jaláaba lan lébeda cátei le.

⁵⁹Jáluajati jábutigu fádorigu, jáma sun jíbiri líñun-ágei lúrudu lidúnrun Jesúsu láu iyéeni lun gayáraabei lan jasiadiruni lun loúnwen, ⁶⁰madáritiña, láu sun sarágu jáña lan güirigia nüdüntiña aríñaga iyéeni luágu. Agúmujoúni, ligía jayábin biáma yéetiña íchiga fe luágu, ⁶¹ába jaríñagun.

—Aríñagati wügúri le luágu gayára lan lagúnrichagunun láni Búngiu témpulu, ábaya lánme laráramagüdúnun lídan úrüwa wéyu.

⁶²Ábati laráramun fádiri le íñutimaabei, ába laríñagun lun Jesúsu.

—¿Móunabuntíbusan ni cáta? ¿Cáteigi le, le aríñawagúbei buágu?

⁶³Reídeiti Jesúsu maníñu. Ábati laríñagun fádiri le íñutimaabei lun.

—Luágu líri Búngiu le wínwanbei báfiñura lun baríñaguni inárüni. Aríñagabeí woun ánjein amúrü lubeí Crístubei le Liraú Búngiu, le lanúadirubei Búngiu lun lasálbaruniña güirigia ubouágu.

⁶⁴Ába laríñagun Jesúsu lun.

—Ánja, áu, quei baríñaguni. Aríñagatina gíñe jun luágu jaríjubadina lan, áu le Wügúri Garaúwarügüti, ñun lueígiñe loúnwenren Búngiu le Súnti Gabáfu, jaríjubei gíñe niábin lídan juánriñu siélugiñe.

⁶⁵Ábati lajeíridagunun fádiri le ínutimaabei lanáangun, le ligáñi, ába laríñagun.

—¡Anába láali wügúri le Búngiu láu lerérun! Mabúseerunjadiwa ámu lun líchugun fe luágu, agáamba jumáali anábuni le laríñagubei, ⁶⁶¿da líña jaríjin lun? Ába jaríñagun.

—Gadúnrunti, lúnti loúnwen.

⁶⁷Ábati jásuerauni ligíbu, buleísei jameí, jíbiri, ába jagáyuajan ligíbuagun, ⁶⁸ába jaríñagun lun.

—Quei amúrü lan Crístubei, jaríñaga beígia ca lan agáyuajabei buágu! Jaríñagunbei lun ítara ladúga gürágu líña lan lágu.

Laríñagun Pédro luágu ibídiñe lan Jesúsu lun
(Mr. 14.66-72, Lc. 22.56-62, Jn. 18.15-18, 25-27)

⁶⁹Súnti lasúseredun sun cátei le, ñun líña Pédro boúgudi tübüürürugu lúban fádiri le ínutimaabei, ába tiábin ában esériwijatu luágun, ába taríñagun lun.

—Bugúya, lúmañadibútia giñéñaja Jesúsu le Galiléana.

⁷⁰Ába leyéedagun Pédro jagíbugiñe súngubei, ába laríñagun.

—Ibídiñeti nun ca lan uágu badímureja.

⁷¹Leíbuga yebe Pédro luágun béna, ligía taríjini ábanya, ába taríñagun joun ja ñíbaña.

—Eyéri le, lúmañajañein gíñe Jesúsu le Nazarétna.

⁷²Ábaya leyéedagun Pédro láu fiñún, ába laríñagun.

—Ibídiñeti wügúri ligía nun.

⁷³Murusun lueígiñe, ába jayábin ja ñíbaña lúmoun Pédro, ába jaríñagun lun.

—Inárüni luágu ában lan jádaangiñe amúrü, arijúati luágu ligáburi badímurejan.

⁷⁴Ába lagúmeserun íñaragua lúngua aríñaga láu fiñún.

—¡Ibídiñeti gürígia ligía nun!

Lídan méme óra ligía, ába layúgurujan ában gáyu. ⁷⁵Ábati larítangun Pédro luágu le laríñagubei Jesúsu lun. “Beyéedaguba náu úrüwa weíyaasu lubáragiñe layúgurujan gáyu.” Ába láfuridun Pédro ñígiñe, ába layájuaan láu igárigu.

Ledéregerúniwa Jesúsu lun Piláto
(Mr. 15.1, Lc. 23.1-2, Jn. 18.28-32)

27 ¹Dan larúgadunbei, ába jadámuridagun sun jábutigu fádirigu jáma wügúriña weírigutiña lídan jafíñen juríu aríja cába lan jadúga lun lasíadirúniwa Jesúsu. ²Ába janúgüni gürágu, ába jedéregeruni lun Póncio Piláto le gumádimati.

Loúnwen Júdas

³Dan le laríjinbei Júdas, le alúgurubalin Jesúsu, luágu siádi jamáali lan Jesúsu lun loúnwen, ába laságürijan, ába lágu yugüdüni darándi murúsun pláta ligía joun jábutigu fádirigu lúma joun wügüriña weírigutiña, ⁴ába laríñagun joun.

—Afígounjaadina láu nedéregerun ában wügüri madúnrunti lun loúnwen. Ába jaríñagun lun.

—¿Cámegi le warúma? ¡Bugúya lun baríjini líra!

⁵Ába lachágaruni Júdas seínsu ñi témpulurugu, ába lídin átigiragua lúngua.

⁶Ába jabúduni jábutigu fádirigu seínsu ligía, ába jaríñagun.

—Siñáti wíchuguni seínsu le tídoun gáfu to lágei liseínsuna Búngiu ladúga lebégi ouweni.

⁷Ába júradun lun lagáñijoún lufúlasun ában wügüri le adáagubei barámbi láu seínsu ligía lun jábunajoún teréncha ñi. ⁸Ligía Lufúlasun Jítaü lubei líribei fulásu ligía chülú lúmoun dan le. ⁹Ítara líña lagúnfulirun lé meja laríñagubei proféta Jeremías. “Barú jamuti darándi murúsun pláta ligía, ebégi le jíchugubei Israélitagu luágu wügüri ligía, ¹⁰ába jagáñijani lufúlasun ában wügüri le adáagubei barámbi láu, quei laríñaguni Nabúreme nun.”

Jesúsu ligíbugiñe Piláto

(Mr. 15.2-5, Lc. 23.3-5, Jn. 18.33-38)

¹¹Barúwati Jesúsu ligíbugiñoun gumádimati, le gíribei Piláto, le álügüdubalin.

—¿Amúrúsan Jarúeitebei Juríu?

Ába laríñagun Jesúsu lun.

—Ánja, áu quei baríñaguni.

¹²Dán buriti jíchugun jábutigu fádirigu jáma wügüriña weírigutiña lidúnrun, moúnabuntija Jesúsu ni cáta. ¹³Ábati laríñagun Piláto lun.

—¿Magáambun bumútisan le jaríñagubei buágu?

¹⁴Moúnabunti Jesúsu ni cáta, ábati laweíridun lanígi gumádimati.

Lasiádirún Jesúsu lun loúnwen

(Mr. 15.6-20, Lc. 23.13-25, Jn. 18.38-19.16)

¹⁵Gagáburi lumúti mejáti gumádimati lígiragüdún ában adaürúti joun güriá lídán fédu, furúmieguaügü adaürúti le jamúriajan lúma.

¹⁶Ñíneinti ában adaürúti, díseti leíbaajan líri, gíriti Barabási, ¹⁷dánti le adámuriñujaña lan sun güriá, ába lálügüdüniña Piláto.

—¿Ca jabúseerubei nígiragüdün jun, Barabási, ódi Jesúsu le únbei laríñawagua Crístu?

¹⁸Líridubalin gíñe Jesúsu ladúga subúdi láali lan luágu ladúga lan jagímugan lun jedéregerei.

¹⁹Sun ñun lan Piláto luágu lála le lánina agúseruni, ába toúnajan lúmari aríñaga lun. “Madúgabá ni cáta láu gürígia úaraguati le, ladúga gewéreditina buga ában uwénedi wuríbatí áriebuga ladúga gürígia le.”

²⁰Ába jádaruni jábutigu fádírigu jáma wügüríña weírigitíña jádoun gürígia lun jamúriajan lun láfuridun Barabási, lun lafarún Jesúsu. ²¹Ábaya ladímurejan gumádimati joun sun gürígia jagía, ába laríñagun joun.

—¿Ca jádaangiñe biángubei jabúseerubei lun nígiragüdüni jun?

Ába jaríñagun.

—Barabási.

²²Ába laríñagun Piláto joun.

—¿Cábatí nadúga láu Jesúsu le únbei laríñawagúa Crístu?

Ába joúnabun súngubei.

—¡Dáguabeí luágu gurúwa!

²³Ába laríñagun Piláto joun.

—¿Cáti wuríbatí ladúgübei?

Ábatima jagúaragun.

—¡Dáguabeí luágu gurúwa!

²⁴Dan le laríjinbalin Piláto luágu siñá lan ladúgün ni cáta lueídügüya chagáguaü, ába lamúriajan dúna, ába lachífbuni lújabu jagíbugiñe gürígia, aríñageina.

—Máma áu lúnbei naríjin láu loúnwen wügüri madúnrunti le, jugúya lun jaríjini ñi.

²⁵Ába jaríñagun sun gürígia.

—¡Wagía jáma warájüñü, wanúgüba furúmieguarügü dúru wawouguoun luágu loúnwen!

²⁶Ábatí lígiragüdüni Piláto Barabási, ába loúnajan abeíchei Jesúsu, ába ledéregeruni lun ládarawagún luágu gurúwa.

²⁷Lárigiñe, ába janúgüni lisúdaaranigu gumádimati Jesúsu tídoun lúban Piláto, ába joúndaraguagüdüniña sun súaara geyégua láu. ²⁸Ába jarágachunun lanáangun, ába jíchugun ában anáanguni funátu luágu, ²⁹ába jíchugun ában rídi láuti jíyu lábulugu, lúma ában mabúru lújaburugu le loúnwenren. Ábatí jájuduragun ligíbugiñe, ába jéjerajan láu, ába jaríñagun lun.

—¡Gabágarilá Jarúeite Juríu!

³⁰Ába gíñe jásuereguni, janúgeija mabúru ligía, jíchaguei lábulugu.

³¹Lárigiñe jéjerajan láu ítara, ába jagídarunun anáanguni funátu lueí, ába jadáürünun lanáangun luágu. Ába janúgüni lun ládarawagún luágu gurúwa.

Ládarawagún Jesúsu luágu gurúwa

(Mr. 15.21-32, Lc. 23.26-43, Jn. 19.17-27)

³²Dan le áfurideina jáña lan, ába jadúnragun lúma ában wügüri Cirénena, gíriti Simón, ába jafósurun lun lanúgüni lugúruwan Jesúsu.

³³Ítara líña jachúlürün lídoun ában fulásu gíriti Gólgota, líla líra, Lufúlasun Lábu Ichúgü. ³⁴Ñi jíchiga diweín láu árani tídan lun Jesúsu lun látunun, jóucharügü lumútu, mátun lumútu.

³⁵Dan le dágua jamáali luágu gurúwa, ába jájurerun súdaara ubúnuruni lun jafánreinjanun lanáangun Jesúsu jádaangua. Ítara líña lagúnfulirun lé meja labúrűjabei proféta. “Ájureratiña ubúnuruni lun jarűjin cába lan jádaangiñe erédera táu nanáangun.” ³⁶Ába jañúurun ñi lun jóúnigiruni. ³⁷Ába jíchugun ában abúrűjóuni lougiñe lichúgü le ñi lubei larínaga ca lan lídúnrunbei. Abúrűjóuni ligía ítara líña. “Jesúsu le, le jarűeitebei jurú.”

³⁸Dáwaguatiña gíñe bián jíwerutiña luágu gurúwa luma, ában lueígiñe loúnwenren, ában lueígiñe lubaúna. ³⁹Já buriti ásügürübaña ñígiñe, ába janábuni, ába jánjingichuni jachúgü, ⁴⁰arínageina.

—Bugúya le gayáraabei bágurunun témpulu ábaya baráramagüdünun lídán úrűwa wéyu, sálbaguabá búngua. Ánjin Liraú bubei Búngiu, raríba lueígiñe gurúwa.

⁴¹Ítara líña gíñe jéjerajan jábutigu fádirigu jáma arúfudajatiña lilúrudun Moisés, fariséogu, jáma wügűriña weírigutiña, láu, ábaja jarínagun jámagua.

⁴²—Sálbati ámu, ánjin lűngua, siñati lasálbaragun. Ánjin ligía lubei Jarűeitebei Israelťagu, raríla lueígiñe gurúwa, affíne wamámuga luágu. ⁴³Rúlaali laffínen luágu Búngiu, sálbaleíti Búngiu guetó ánjin inárűni lubei luágu jínsiñe lan lun, quei arínagaali lan woun luágu Liraú lan Búngiu.

⁴⁴Anába jamúti gíñe jíwerutiña ja dáwaguñubaña luágu jagúruwan úara luma.

Loúnwen Jesúsu

(Mr. 15.33-41, Lc. 23.44-49, Jn. 19.28-30)

⁴⁵Ábati labúrűgadun sun fulásu lűmagiñe amídirugu darí ladaúnrun úrűwa rábounwéyu. ⁴⁶Quei buri óra méme ligía, ába lagúaragun Jesúsu jére.

—Elí, Elí, ¿láma sabáctani? —líla líra. Nubúngiute, Nubúngiute, ¿cásan uágu bígirana?

⁴⁷Ñínanu agáambuti jádaangiñe ja ñíbaña, ába jarínagun.

—Lagúajaña wügűri le lun proféta Elías.

⁴⁸Ába lídín ában jádaangiñe eíbaagueina anűga ában mudúsi, lárigiñe ladúdüragűdűni táu diweín garűjűtu ába líchuguni luágu ában wéwe, ába línchunun lun lun lachúrunun. Ába lachúrunun. ⁴⁹Ába jarínagun ja jíbiri.

—Ígirabeí, waríja ánjin nűbin Elías asálbarei.

⁵⁰Ábaya ladűgűn Jesúsu ában agúaraguni jéreti, ábati loúnwen. ⁵¹Lídán óra ligía, ába tajeíridagun tubélun témpulu lídán bián murúsun, ínugiñe lun únabun. Ába ladágarun ában jarabaganáli, ába láwarajan dúbű. ⁵²Ába lánjunrenchúnga umúajaű, águyuguatiña sarágu jádaangiñe afíñetiña luágu Búngiu já meja jíláguaañábaña. ⁵³Ába jáfuridunga lídaangiñe jamúaja lárigiñe lásaarun Jesúsu lídaangiñe oúweni. Ába jebélurun lídoun ubúrugu Jerusalén le biníwabei, le ñi lubei jaríjaña sarágu gűrgia.

⁵⁴Léti jábuti súaara jáma súaara ja oúnigirubalin Jesúsu, dan jasándirunbalin járabaganáli lúma dan jaríjinbaalin líbiri buri cátei le asúseredubei, ába janúfudedagun sarágu, ába jaríñagun.

—Inárúni, Liraü Búngiu wügüri le.

⁵⁵Ñíñanu sarágu würlña aríagua dísegiñe, ja afálarubalin Jesúsu lúmagiñe Galiléagiñe íderagua jameí. ⁵⁶Ñíñoun María Magdaléna jádan, María to lúguchu Jacóbo lúma José, túma jáguchu lirájüñü Zebedéo.

Labunúniwa Jesúsu

(Mr. 15.42-47, Lc. 23.50-56, Jn. 19.38-42)

⁵⁷Dan le agúñedeina líña lubeí, ába liábin ában wügüri rísiti gíriti José, lídaangiñeti fulásu le gíribei Arimatéa, jádaangiñeti giñe ja afálarubalin Jesúsu. ⁵⁸Ábati lídin aríjei Piláto, ába lamúriajani lúgubu Jesúsu lúma. Ábati laríñagun Piláto lun líchugúniwa lun, ⁵⁹ába lanúgüni José, ába louburaguni tídan ában gamísa jarúmatu. ⁶⁰Ába líchuguni lídoun lumúaja iséri lé yebe lachíagagüdübei lubárua luágu dübü. Lárigiñe ladáuruni umúajaü láu ában dübü weíriti luágu lubéneri, ába lídin. ⁶¹Ñíñounti María Magdaléna túma to ában María ñun ligíbugiñe umúajaü.

Oúnigirutina ligíbugiñe lumúaja Jesúsu

⁶²Larúgan, lárigiñe aráansejani lubá luwéyuri eméraaguni, ába jóúdin jábutigu fádirigu jáma fariséogu aríjei Piláto, ⁶³ába jaríñagun lun.

—Wábuti, jarítagua wamúti luágu aríñaga lán meja yéeti ligíra dán meja moúnwengili luágu lásaaruba lan luágu lúrwüwan wéyu lárigiñe louñwen.

⁶⁴Oúnajagubeibá achoúruri umúajaü daríme lúrwüwan wéyu, mayábin jamámuga láni dísipulugu áriebe íwerujei lúgubu, ábame jaríñagun joun güriágu luágu saráli lan. Weíritimaajalímeti lagúmujoún iyéeni le sügú láu le furúmiñeti.

⁶⁵Ába laríñagun Piláto joun.

—Barújuma fiú súaara, jeíba choúru jumeí umúajaü le lubuídun-ágei juáraati.

⁶⁶Ábati jóúdin, ába jachóururuni dübü le luágubei umúajaü, ába jígiruniña súaara lun jóúnigiruni.

Lásaarun Jesúsu lídaangiñe ouweni

(Mr. 16.1-8, Lc. 24.1-12, Jn. 20.1-10)

28

¹Dan le lásügürünbei luwéyuri eméraaguni áni arúgadeina líña dimáasu, ába jóúdin María Magdaléna túma to ában María aríjei umúajaü. ²Sódini, ába ladágarun ában járabaganáli jéreti óra ligía láu larárirun ában láni Wabúreme ánjeli siélugiñe, ába liábin luágun umúajaü, ába lagídaruni dübü le áubei ladaurúa, ába lanúurun luágu.

³Miríti ánjeli ligía quei ában labírijanoúga, tiábin lanáangun, jarú jarú.

⁴Dan le jaríjinbalin súaara, ába jadádagarun láu anúfudei, ába jeréderun camá jiláguaaña. ⁵Ábati laríñagun ánjeli ligía joun würlña jagía.

—Manúfude jumá. Subúsiti nun luágu jáluajañein lan Jesúsu le ádarawagúbei luágu gurúwa. ⁶Úati ya, saráali quei laríñaguni. Jigoúgu jaríjei fulásu le ñíjin lubei líchugúa, ⁷ábame jídin furése, ábame jaríñagun joun láni disípulugu luágu saráali lan, luágu níngiran lan jubá jubá Galiléoun, ñíba jaríjei. Niján ugánu lé buga lúnbei naríñaguni jun.

⁸Ába jóúdin wúríña jagía oúfudagueina, láu anúfudei lúma sarágu ugúndani, ába jóúdin eíbaagueina aríñagei joun disípulugu. ⁹Súnti añája lan luágu úma, ligía larúfudagun Jesúsu lúngua joun, ába labúsurun joun. Ábati jayárafadun lun, ába jájuduragun lun, ába jóúburuni lugúdi. ¹⁰Ába laríñagun joun.

—Manúfude jumá. Jeíba awísaraña nánigu lun jóúdin Galiléoun, luágu ñíba lan jaríjana.

Cátei le jabájüdagubei súdeara

¹¹Dan le jóúdiña lubei wúríña, ligía jóúdin jádaangiñe súdeara ja oúnigirubaña, ába jóúdin ubúругu, ába jabájüdaguni le asúseredubei joun jábutigu fádírugu. ¹²Ába jóúdin ábutigu ja adímureja jáma wügúríña weírigutiña lídan jafíñen jurú lun jebélurun jáma lídoun ában úarani, ába jíchugun sarágu seínsu joun súdeara, ¹³ába jaríñagun joun.

—Jaríñagame luágu dan lan le anjúnja lan arúmuga áriebe, ába lan jayábin láni Jesúsu disípulugu, ába jíwerujani lúgubu. ¹⁴Ánjein lasúbudira gumádimati cátei le, wadímurejaba luágu jáni fuleísei lúma lun madügún lan ni cáta jáu.

¹⁵Ábati jerésibiruni súdeara jagía seínsu, ába jóúdin adúgei le uágubei laríñawagúa joun. Ítara liñáti jaríñaguni jurú chülú lúmoun dan le.

Líchugun Jesúsu jadásin disípulugu (Mr. 16.14-18, Lc. 24.36-49, Jn. 20.19-23)

¹⁶Ába lubeíti jóúdin únsu disípulugu Galiléoun luágu wúbü lé meja uágubei laríñaga Jesúsu joun lun jóúdin. ¹⁷Dánti le jaríjinbalin Jesúsu, ába jájuduragun lun, láu sun añájein lan jádaangiñe, loúguati jafíñen luágu ligía lan. ¹⁸Ába liábin Jesúsu jawágun, ába laríñagun joun.

—Rúaali sun ubáfu nun siélu lúma uboúagu. ¹⁹Jeíbati jabúgürü gürgia ja lílana sun fulásu, adúga jumáña nánime disípulugu, badíseigüda jumáña lídan líri Búngiu Úguchili, Búngiu Irájü, lúma líri Sífiri Sándu. ²⁰Arúfudaja jugúyame joun lun gagáambadi jamá lun sun le uágubei naríñaga jun. Subúdi jumei luágu añájein lan júma ságü wéyu daríme lagúmunchun uboú. Ítaralá.